

J. K. Մարտիրոսյան

ԱԵՐԱԿ
ԱՆՎԱՐԵԼՅԱՆ



АКАДЕМИЯ НАУК АРМЯНСКОЙ ССР
Институт Искусства

В.А. МАТЕВОСЯН

СЕДРАК
АРАКЕЛЯН

ИЗДАТЕЛЬСТВО АН АРМЯНСКОЙ ССР

ЕРЕВАН
1963

ՀԱՅԿԱԿԱՆ ՍՍՌ ԳԻՏՈՒԹՅՈՒՆՆԵՐԻ ԱԿԱԴԵՄԻԱ

արգեստի ինստիտուտ

75(47-925)(092Առաջնայի)

Վ.Հ. ՄԱԹԵՎՈՍՅԱՆ

ՄԵԴԱԿ
ԱՐԱՔԵԼՅԱՆ

A 7
4823



ՀԱՅԿԱԿԱՆ ՍՍՌ Գ.Ա. ՀՐԱՏԱՐԱԿՉՈՒԹՅՈՒՆ

Ե Ր Ե Վ Ա Ն

1963



Խնքնանկար

ԵՐԿՈՒ ԽՈՍՔ

Հայ կերպարվեստի անխոնջ մշակներից մեկին՝ Սեղրակ Առաքելյանին նվիրված այս աշխատությունը արվեստագիտական հետազոտության մի փորձ է, որի առանցքը կապմում է նկարչի ապրած ստեղծագործական հվոյուցիայի, նրա աշխարհայացքի բացահայտումը։ Զայլ առ քայլ ընթանալով Առաքելյանի անցած ուղղու հետքերով, ջանք է թափված ի հայտ բերելու օբյեկտիվ ու սուբյեկտիվ այն գործոնները, որոնք շարժման որոշակի հունի մեջ են դրել նրա գեղանկարչական մտածողությունն ու հասարակական դիրքորոշումը։

Առաքելյանի ոչ բոլոր երկերն են նկարագրվում, վերլուծվում կամ հիշատակվում գրքում։ Քննվում են այն գործերը, որոնք, մեր կարծիքով, ներառում են նկարչի հվոյուցիայի տվյալ էտապի մի ամբողջ խումբ աշխատությունների հական գծերն ու առանձնահատկությունները։

Առաքելյանի հվոյուցիայի հետ կապված ու նրա արվեստից բխող պրոբլեմների մեջ նույնպես ընտրություն է կատարված։ Որոշ պրոբլեմներ դիտվում են տարբեր կողմերից ու տարբեր կա-

պակցություններում, անընդհատ պահվում են ուշադրության կենտրոնում: Դրանք այն պրոբլեմներն են, որ անդրադարձնում են նկարչի աշխարհըմքոնման ձևալորման ու ընթացքի, գեղարվեստական մեթոդի ու սրա կրած փոփոխությունների ռեալ էությունը:

Առաքելյանի մասին եղած արվեստաբանական գրականությունը սահմանափակվում է մի քանի հոդվածներով ու նյութերով, որոնց դրույթներն ու տվյալները քննաբար օգտագործվում են այս գրքի համապատասխան տեղերում:

Մենագրության վերջում տրված հավելվածը ներկայացնում է նկարչի կենսագրությունը:

Հ ե ղ ի ն ա կ

Գ Լ Ո Ւ Խ Ա Ռ Ա Զ Ի Ն

Հայ գեղանկարչության ականավոր վարպետ Սեղրակ Առաքելյանը ուսանեց ակադեմիական նպաստավոր պայմաններում: Նրա բացառիկ տաղանդը ծևավորվեց կուլտուրական կյանքի հետաքրքիր միջավայրում ու ազատամիտ ուսուցիչների դեկավարությամբ: Բավական է նշել, որ նա իր մասնագիտական կրթությունը հիմնականում ստացավ Մոսկվայի գեղանկարչության, քանդակագործության և ճարտարապետության ուսումնարանում (1908—1916) որը, նախաստվետական Ռուսաստանի ամենահեղինակավոր գեղարվեստական օջախներից մեկն էր: Մի հաստատություն էր դա, ուր նկարչական բարձր պրոֆեսիոնալիզմը զուգորդվում էր հանրակրթական առարկաների

որակյալ դասավանդմանը, ուր ուսանողները դաստիարակվում էին հասարակական-քաղաքական առաջադեմ գաղափարների, դեմոկրատիզմի, հայրենասիրության, հումանիզմի ոգով: Բավական է ասել, որ նրա ուսուցիչները ուսական գեղանկարչության նշանավոր վարպետներ Կ. Կորովինն ու Ա. Արխիպովն էին, որոնց սաները հնարավորություն ունեին հաղորդակից լինելու ժամանակի կերպարվեստի առողջ սկզբունքներին, ազատորեն ցուցաբերելու և զարգացնելու սեփական մղումները, կարողություններն ու անհատականությունը: Այս մթնոլորտը, ուսումնառության առաջին իսկ օրերից սկսած, հարազատ էր Առաքելյանի հոգուն ու համահնչուն՝ նրա իդեալներին: Բանն այն է, որ, մինչ Մոսկվայում սովորելը, նա մասնագիտական գիտելիքներ էր ստացել Թիֆլիսի նկարչական դրագոցում՝ առանձնապես հմայվելով ուսուցիչ՝ հայ կերպարվեստի կլասիկ Եղիշե Թադևոսյանի անձնավորությամբ և արվեստով: Վերջինս Մոսկվայի նույն ուսումնարանի նախկին սաներից էր և Թիֆլիսի նկարչական դպրոցում դասավանդում էր ուսումնարանից ժառանգած մեթոդներով: Նա իր աշակերտների նկատմամբ ցուցաբերում էր նույնպիսի հոգատար վերաբերունք, ինչպիսին ստացել էր Մոսկվայի ուսումնարանի ուսուցիչներից:

Եվ այսպես, Թադևոսյանի դեկավարությամբ դրսերդեցին նաև Առաքելյանի ստեղծագործական նախնական տվյալները:

Դժբախտաբար Առաքելյանի թիֆլիսյան շրջանի գործերից մեկ է հասել միայն մեկը («Ծառուղին այգում», 1907), հետևաբար չունենալ այդ տնօքաների ամբողջական ու բազմակողմանի իրացումները դիտարկելու հնարավորություն, բայց այդ մի գործն էլ մասամբ պատկերացում է տալիս նրա ստեղծագործական առաջին քայլերի մասին:

«Ծառուղին այգում» փոքրադիր էտյուդը կատարված է Ե. Թադևոսյանի բացահայտ ազդեցությամբ՝ որոշ առումով թե՛ իր էմոցիոնալ արտահայտչականությամբ, թե՛ գեղանկարչական առանձնահատկություններով: Խոր աշնանային տեսարան է, լուռ ու հանդարտ մի անկյուն, որ մեղմ, փոքր-ինչ թախծոտ տրամադրություն է հարուցում: Ակնհայտ է, որ աշակերտին հոգեհարազատ են ուսուցչի էտյուդային արվեստի պատկերման պլեներային եղանակն ու բնության անդրադարձման անմիջական, հստակ ու լիրիկական ասպեկտը: Էտյուդը պարզորոշ երևակում է «սկսություններից» վերծ գույների թափանցիկ համադրություններ ստեղծելու, կիսերանգային թրթիռներով պատկերը օդով շնչավորելու հեղինակի ձգտումը, մի բան, որ չէր կարող չխրախուսվել Ե. Թադևոսյանի կողմից: Այդուհանդեռձ, «Ծառուղին այգում» էտյուդը ի հայտ է բերում նաև պատկերվող օբյեկտի զգալիորեն միակողմանի հեղինակային ընկալում, ինչը հատկանշական է ուսանողական շեմին նոր ոտք դրած ամեն մի արվեստագետի: Որոշ առումով պասսիվ-հա-

յեցաբար օրինակելով իր ուսուցչի բազմաթիվ գործերում կիրարկված մանր վրձնահարվածներով աշխատելու մեթոդը, Ս. Առաքելյանը դեռևս մնում է (իհարկե, ոչ բացարձակ իմաստով) գույնի արտաքնային սահմաններում, կտավում ընդգրկվող երևույքի մակերեսին, դեռևս չկարողանալով խոր կերպով իմաստավորել տեսածի ներքին հոլովունը, բացահայտել օբյեկտի ներքին տրամաբանությունը։ Դա, բնականորեն, այդպես էլ պետք է լիներ և տվյալ չեպքում մեծ պահանջներ առաջադրելն էլ սխալ կլիներ։ Օրինաչափորեն, սկսնակ արվեստագետը իր հիմնական ուշադրությունը պետք է բևեռեր նկարչության տեխնիկայի գաղտնիքների տիրապետման վրա, մասնավորապես որոներ կատարման վարպետությունը տանող նախասիրած շավիղներ։

Ահա այդ տեսակետից դիտելով «Ծառուղին այգում» էտյուդը, դժվար չէ նկատել, որ օբյեկտը նկարչությամբ արտացոլելու՝ Ս. Առաքելյանի ելակետը գույնն է, իրարամերձ երանգների հաջորդական ներդաշնակման մեթոդը։ Սակայն, միաժամանակ, գիտական առանձնակի հմտություն չի պահանջվում տեսնելու, որ ընդգրկվող միջավայրի գույնային ոլորտում իսկ նկարիչը ցանկալի վորությամբ չի տարբերակում կարևորն ու երկրորդականը, նկատելիորեն մանրանում է։ Նա դեռևս չունի գեղանկարչական կոմպոզիցիայի հիմնական կազմիչ տարրերից մեկի՝ իրարից զատորոշ ձևով տարբերակվող


տարածամասերի զուգորդման բավարար զգացողություն: Այլ կերպ ասած, նրա գործում պահպանված չէ, ավելի ճիշտ՝ թերի է նկարի հարաբերականորեն կոնստրուկտիվ-դեկորատիվ կողմը: Իրավ է, գունային մի քանի երանգները էտյուդում որոշ առումով հաջող են ներդաշնակված և, ինչպես վերն ասվեց, դրանով իսկ որոշակի տրամադրություն են արտահայտում, բայց կոլորիտը, եթե կարելի է ասել, հիմնականում չափազանց հոսուն է, հեղինեղուկ: Պատկերը չունի տոնային ընդմիջող ամուր սահմաններ, որոնք պիտի մի համոզիչ, կայուն սիստեմի բերեին կտավի տարբեր հարթություններն ու պլանները: Դեռևս չի գիտակցված գծանկարի, պատկերվող առարկայի պլաստիկայի նշանակությունը գեղարվեստական երկում:


Հետեանքը պարզ է. Ս. Առաքելյանը չի կարողացել համնել գեղարվեստական ձևի ամբողջականության:

Բոլոր պարագաներում իրողությունը մնում է այն, որ ուսումնառության առաջին քայլերն անելիս Ս. Առաքելյանը հանդես է բերում ստեղծագործելու ակնհայտ ունակություն, գունազգացողություն և ընկալման անմիջականություն: Իրանք այն նախապայմաններից էին, որոնց զարգացման հիմքի վրա հետագայում որոշակի ընթացք մտան նրա գեղագիտական ինքնատիպ ըմբռնումներն ու գեղանկարչական ձևի յուրօրինակ կիրառումները:

1908 թվականին ավարտելով Թիֆլիսի նկարչական դպրոցը, Ա. Առաքելյանը մեկնում է Մոսկվա՝ մասնագիտական կրթությունը շարունակելու: Հաջողությամբ հանձնում է քննությունները և ընդունվում Մոսկվայի գեղանկարչության, քանդակագործության և ճարտարապետության ուսումնարանը՝ աշակերտելով վրձնի վարպետներ Կ. Կորովինին և Ա. Արխիպովին: Եվ այսպիս, նախ Ե. Թադևոսյանի, ապա Կ. Կորովինի և Ա. Արխիպովի ուսուցմամբ երևան են գալիս Ա. Առաքելյանի ստեղծագործական ընդունակությունները, որոնք և դրվում են իմպրեսիոնիստական գեղանկարչության հայտաբերումներով հարստացած արվեստի ուղու վրա: Ցուրացնելով ուսուցիչների փորձը, տիրապետելով գեղանկարչական տեխնիկայի գաղտնիքներին, երիտասարդ նկարիչը ինքնուրույն կյանքի ասպարեզ է մտնում իբրև որոնման ճանապարհին քայլ առ քայլ վարգացող արվեստագետ:

Սակայն այդ ճանապարհը ողորկ և ուղղագիծ չէր: Մոսկվայում ուսանելու տարիներին նկարչի առջև ծառացան ստեղծագործական բնույթի բարդ խնդիրներ: Էպոխայի հասարակական-քաղաքական շիկացած մթնոլորտը իր խոր ազդեցությունն ունեցավ իդեոլոգիայի տարբեր ասպարեզներում, կերպարվեստի ոլորտում ևս հիմք դառնալով էսթետիկական ներհակ ըմբռնումների ու դրանց անհաջող պայքարի համար: Երևան եկան նկարչական տարբեր խմբավորումներ, բազմաթիվ հոսանքներ, որոնցից յուրա-





შეტყობინებული არის ეს გამოცემის

բանչյուրը հաստատում էր, թե ինքն է կերտում ժամանակին համահնչուն արվեստ: Կողմնորոշումը դարձել էր հարցերի հարցը: Կասկածն ու երկընտրանքը երիտասարդներին հաճախ շեղում էին տրադիցիոն պատգամներից ու մղում դեպի այլ շավիղներ:

Այդ շավիղներին ոտք դրեց նաև Ս. Առաքելյանը: Դրա վկայությունն են նկարչի արխիվում պահվող մի շարք գործերը և նույն բնույթի անհայտ աշխատանքների լուսանկարները:

Դրանք հիմնականում երկու կարգի են:

Աշխատանքների մի մասը կուբիստական է, ըստ որում՝ թույլ կուբիստական: Երեսում է, որ հեղինակն ի միջի այլոց է կատարել այս կարգի գործերը՝ չկարողանալով խորամուխ լինել կուբիզմի սկզբունքների մեջ: Մի քանի պղտոր գույներով ներկված դեկորատիվ հարթություններ կցապատող պեյզաժանման գործեր են դրանք, որոնցում ո՛չ օրինաչափություն կա, ո՛չ որոշակի գաղափար կամ նպատակ:

Երկրորդ կարգը ոճավորված ձևերով նկարված բոհեմային, թատերականացված պատկերներ և միստիկական դեմոնական շնչավորումներ ունեցող սյուժետային զանազան տեսարաններ են: Դեմոնական որոշ տարրեր առկա են նաև նկարչի «Ս. Բերբերյանի պորտրետում» (1913): Մանուշակագույն, վարդագույն ու արծաթագույն տոների վիրտուոզ հարաբերումներով կերտված այդ պորտրեն արտահայտում է տագնապալից տրամադրություն, շրջառում անհան-

գիստ խոհերի «անսովոր» մի աշխարհ: Պետք է ասել, որ, իբրև այդպիսին, կտավը թողնում է անջնջելի տպավորություն: Չնայած երկրորդ կարգի բոլոր գործերը չեն, որ գաղափարական-գեղարվեստական ամբողջական արժեք են ներկայացնում, բայց ունեն իրենց ռացիոնալ տարրերը: Դրանցում, համենայն դեպս, որոշ կենսական շունչ, նուրբ դիտողականություն կա, ել չենք ասում գունային որոշ խնդիրների փայլուն լուծումների մասին:

Սակայն իր ուսուցիչներ Կ. Կորովինի, Ա. Արխիպովի սկզբունքներից շեղվելու փորձերը երկարատև ընթացք չունեցան: Նկարչի ստեղծագործական մտածողության մեջ եղած հակադիր ուժերի պայքարում հաղթանակ տարավ և իր հետագա զարգացումն ապրեց նրանց ամլանդած տրադիցիան: Ա. Առաքելյանի դասարանական աշխատանքներից մեզ են հասել մի քանի նմուշներ, որոնք պարզ գաղափար են տալիս այդ տրադիցիայի ասպարեզում նրա կատարած պրայտումների մասին: Դրանցից հետաքրքրիր են հատկապես երկու մեծ ֆիգուրներ և մի գլխանկար ընդգրկող կտավները: Ճիշտ է, սրանցում չկա «Ծառուղին այգում» թիֆլիսյան էտյուդի գունային բազմազանությունն ու պայծառությունը, բայց հաղթահարված են հենց այդ էտյուդի վերոհիշյալ թերությունները: Նկարչի ուշադրությունը, դասարանական գործերում, լիապես բնեօված է պատկերված օբյեկտների գծապլաստիկական կողմերի, լուսա-

ստվերների պարզորոշ տեղաբաշխումների վրա: Ֆիգուրներն աչքի են ընկնում արխիտեկտոնիկ կառուցվածքով, ձևերի հստակ ու ճկուն ըմբռնումով: Հետևելով Կ. Կորովինի անկաշկանդ աշխատելաձեին, այդ էտյուդներում Ս. Առաքելյանը կիրառել է լայն ու երկարաշունչ վրձնահարվածների մեթոդը, որը հնարավորություն է ընծեռել դինամիկայի և պլաստիկայի ազատ դրսերման: Հաղթահարվել է «Ծառուղին այգում» գործի կոլորիտի ցրվածությունը: Մոխրավուն, մշուշոտ ընդհանուր գամմայի ոլորտում թեթևորեն, հմուտ զուգորդումներով տրված են լուսաստվերային շարժուն հարաբերություններ, որոնք ցոլացնում են մարմինների անատոմիական ձևերի կոնստրուկտիվ ոլորմը:

Ս. Առաքելյանն այդ գործերում ելակետ է ընդունել գեղանկարչության գծապլաստիկական և լուսաստվերային տարրերը՝ գունանկարչի փայլուն իր ընդունակությունները, ինչպես առաջիկայում պիտի դիտենք, այդ բավայի վրա համարձակորեն մարմնավորելու նպատակով: Եվ իրոք, դեռևս ուսանողական նատարանից չելած, նա տվեց հասուն ստեղծագործություններ, որոնք դրսերում են որոշակի հունով ընթացող նկարչի աշխարհայացքը, էսթետիկական իդեալներն ու հասարակական նպատակամիտումները:-

Նկարչի առջև ծառացած գեղանկարչական հիշյալ խնդրի լուծման նախանշաններ են պարունակում նրա արտադասարանական աշխատանքները: Այդ

առումով նշանակալից է, օրինակ, «Իմ բակը գյուղում» փոքրադիր էտյուտը: Դա 1913 թվականին, ամառային արձակուրդի միջոցին, Զահուկ գյուղում նկարված մի տեսարան է— Ե. Թաղեսոյան, Կ. Կորովին, Ա. Արխիպով արվեստագետների դպրոցն անցած երիտասարդ նկարչի արվեստի գեղանկարչական կատարելագործման վկայությունը: Այստեղ օրգանապես ի մի են բերված «Ծառուղին այգում» թաղեսոյանական գունագրության դրոշմը կրող էտյուտի որոշ գծերը, ինչպես նաև գեղանկարչության ու գծապլաստիկայի ասպարեզներում ստացած նոր գիտելիքները: Էտյուտը նորից ինտիմ-լիրիկական մեկնաբանություն ունի: Կերպարը ամբողջական է իր գծապլաստիկական ու գունագրական հատկանիշներով: Լիովին բացակայում են թե՝ «Ծառուղին այգում» էտյուտի կոլորիտային ցրվածությունն ու գծապլաստիկայի թերացումները, թե՝ հիշյալ աշխատանքների «անգունությունը», ավելի ճիշտ՝ գույնի աղքատությունը: Ընդհանուր արծաթա-կանաչավուն ու վուսպ, բայց կիսերանգներով հարուստ կոլորիտի պայմաններում, մուգ մոխրագույն տնակի ֆոնին ռելեֆությամբ գծագրվող ծառը պարուրված է թափանցիկ օդով և երկրորդ պլանի հետ հարաբերելով ստեղծում է պատկերի խորության տպավորությունը: Գունաքավածքները համեմատաբար համարձակ են, անկաշկանդ, ամեն ինչ իր տեղում է, ունի էմոցիոնալ որոշակի ֆունկցիա:

Այդ տեսակետից ավելի կատարյալ ստեղծագործություն է երեք տարի հետո՝ 1916 թվականին կերտված «Սևանա կղզու ափը: Ժայռեր» պեյզաժը, որը երևակում է պլեներային գեղանկարչության ասպարեզում: Ս. Առաքելյանի ունեցած հետագա առաջընթացը: Կտավի համարյա ամբողջ հարթությունը ներկայացնում է մանուշակագույն-կապտագույնից մինչև կանաչավուն հստակ տոներ ընդգրկող շրային տարածությունը, որի մեջ խրված դեղնասպիտակավուն ժայռերը լուսավոր են դարձնում տեսարանը: Տարածական այդ երկու հատվածները (ջուր, ժայռեր) իրար են հաջորդում, փոխադարձաբար մեկը մյուսին լրացնում տարբեր երանգավորումները, որոնք մեղմություն են հաղորդում առանց այն էլ մեղմ լճային անդորրին: Այդ անդորրը թեթևակի խախտում են միայն առաջին պլանում դեպի ափերը ձգտող փոքրիկ ալիքները, որ աշխույժ խայտանքով զուգորդվում են ժայռերի դեղնա-սպիտակավուն և բաց վարդա-մանուշակագույն բեկրեզուն, խաղացկուն անդրադարձումներին:

Ինչպես «Սևանա կղզու ափերը: Ժայռեր» պեյզաժում, նույնպես և այդ շրջանի մի շարք այլ գործերում նկատելի է նաև գեղանկարչական մի ուրիշ, դարձյալ կորովինեան հարուստ արվեստից ժառանգված,

առանձնահատկություն։ Դա միագույն գունաբերի գործածությունն է։ Ճիշտ է, գունաբերը քանակական լայն կիրառություն և որակական սուր ընդգծում չունեն նկարչի 10-ական, ինչպես և 20-ական թվականների առաջին կեսի երկերում, բայց կարևոր ֆունկցիա են կատարում նրա գեղանկարչական մտածողության ոլորտում։ Ինքնին հասկանալի է, որ սկզբունքորեն կիսերանգների վրա կառուցված կոլորիտային մեթոդով աշխատող արվեստագետների, տվյալ դեպքում Կ. Կորովինի և Ս. Առաքելյանի համար գունաբերի օգտագործումը դժվար լուծելի խնդիր է առաջադրում։ Պահանջվում է հատկապես չափի արտակարգ զգացողություն ոչ միայն կոնկրետ դեպքերում դրանց քանակական ծավալման, այլև գունային ընդհանուր գամմայի միջավայրում դրանց որակական նպատակահարմար շեշտվածություն, ուժգնություն հաղորդելու ասպեկտով։ Չխոսելով արդեն կորովինյան ստեղծագործությունների այդ կողմի մասին, նկատենք, որ Ս. Առաքելյանի աշխատություններում գունաբերի գոյությունը ուղղակի իբրև օրգանական անհրաժեշտություն է դիտվում։ Անհնար է, օրինակ, «Սևանա կղզու ափերը։ Ժայռեր», «Ցորեն են ծեծում» կամ նույն շրջանի մի շարք այլ գործերում հստակորեն ընկալել պատկերված առարկաների ընդհանուր ուրվանկարները և տարբերանշել, հաճախ, կտավի պլանները՝ առանց գունաբերի առկայության, որոնք այդ ստեղծագործություններում տըր-

ված են շրջապատի հետ ներդաշնակ միասնությամբ և տարբեր ծավալների, հատվածների ու հարթությունների հարաբերություններն ընդմիջող նույր ակնարկների դեր են կատարում:


Ի լրումն նախընթացի, առայժմ՝ թուրցիկ ձևով նշենք մի հանգամանք ևս. «Ծառուղին այգում» էտյուդի մասին խոսելիս դիտեցինք, որ նկարիչն ունի գույնի բավական պայծառ զգացողություն: Այդ բանը չենք տեսնում մոսկովյան շրջանի և ընդհանրապես 10-ական թվականների մի շարք գործերում: Վերջիններս, որքան էլ լուսավոր ու մաքուր, ունեն փափուկ, մոխրագույն տոններով մեղմացած, փոքր-ինչ «մշուշոտ» կոլորիտ: Դա պետք է բացատրել նրանով, որ այդ տարիներին Մոսկվայի գեղանկարչության, քանդակագործության և ճարտարապետության ուսումնարանի ուսանողների մեծ մասը նկարում էր մոխրագույն կոլորիտով: Հասկանալի է, որ դա իր կնիքը պիտի դներ Առաքելյանի գունագրության վրա: Միաժամանակ, հայտնի է, թե ինչպիսի ջանքերի գործադրումով էին աշխատում իրենց պալիտրան ապատագրել մոխրագույն կլանող տոններից Մ. Սարյանը և ուրիշ ուսանողներ: Զանացել է նաև Ս. Առաքելյանը ու հասել որոշակի արդյունքների: Բավական է անցողակի համեմատել, օրինակ, նրա դասարանական էտյուդները «Խմ բակը գյուղում» գործին կամ վերջինս՝ «Սևանա կղզու ափերը: Ժայռեր» պատկերին, տեսմելու համար, թե գնալով նկարչի պալիտրան որքանով է փոփոխվում գու-

նային բազմազանության հարստացման ու երանգ-ների հնչեղացման առումով: Այդուհանդերձ, հենց «Սևանա կղզու ափերը: Ժայռեր» գործը (և այլ գործեր) վերծ չէ մոխրավուն, մշուշապատ (ճիշտ է ոչ շատ թանձր) գունային շղարշից, համեմատած «Ծառուղին այգում» էտյուդին:

Այս դիտողությամբ չենք ուզում նսեմացնել Ս. Առաքելյանի նման կոլորիտ ունեցող երկերի նշանակությունը: Ամենափառ ոչ: Դրանք ինքնին արժեքավոր, արվեստի գործեր են, նույնքան հետաքրքիր, ինչքան, ասենք, հետագայում Ս. Առաքելյանի ստեղծած մի շարք հուշի լուսապայծառ կտավները: Տվյալ դեպքում խնդիրը մեզ վբաղեցնում է և պիտի հետաքրքիր նկարչի պալիտրայի կրած փոփոխությանը հետևելու տեսակետից միայն:

Ս. Առաքելյանի նախատվետական շրջանի կարևոր երկերը ներկայացնում են կամ զուտ պեյզաժային կամ աշխատանքային, կենցաղային մոտիվների ու բնության տեսարանների փայլուն միահյուսմամբ պատկերներ (բացառություն է կալմում Ս. Բերբերյանի վերոհիշյալ պորտրեն): Հստ որում, գրեթե այդ բոլոր նկարներն ընդգրկում են հայ գյուղը, հայրենի բնաշխարհն ու աշխատավոր մարդու առօրյան, որ հոգեհարապատ էր նկարչին և իբրև այդպիսին էլ դրսերպեց նրա ստեղծագործական կյանքի ողջ ընթացքում: Պետք է ընդգծել, որ հայրենիցի հետ ունեցած այդ հոգեսր սերտ կապն էր նաև,





Ա. Բերբերյանի պորտրեն

որ Ս. Առաքելյանին հաստատ պահեց դեմոկրատական արվեստի դիրքերում: Մյուս հիմնական մոմենտը, որ պատվանդան հանդիսացավ նկարչի դեմոկրատական աշխարհայեցողության, ներկայացնում է, ինարկե, իր ուսուցիչների արվեստը, որի սկզբունքներին հաղորդակից եղավ նա, ինչպես նշեցինք, ուսումնառության տարիներին:

Ահա այդ աշխարհայեցողության շնորհիվ է, որ, ի հակադրություն որոշ նկարիչների, գյուղը Ս. Առաքելյանի համար չի ներկայանում որպես էկպոտիկ հետաքրքրության, սոսկ ոճական պեղումներ կատարելու օբյեկտ: Բնա՛վ չի ներկայացնում: Եվ այս առումով նա մոտ է կանգնած Մ. Սարյանին, Ե. Թագևոսյանին, գրականության մեր արձակի ու պոեսիայի վարպետներին: Դաստիարակվելով չարքաշ կյանքով ապրող գյուղացու ընտանիքում և ապա առաջադեմ ուսուցիչների հոգատար ուշադրության ներքո, ծնողներից ժառանգելով աշխատավորի պարզ բնավորության մարդապիրական ու հայրենասիրական գծերը, Առաքելյանը մնաց միշտ ժողովրդի ծոցից ելած ապնիվ ստեղծագործող: Նրա գյուղական պատկերները («Մեր այգում», «Հաց են թխում», «Ցորեն են ծեծում», «Գյուղում», «Ցորեն են չորացնում» և այլք) նկարված են ջերմ սիրով ու անմեկին ներշնչանքով: Այդ գործերը ճշմարտացիորեն ներկայացնում են նախասովետական հայ գյուղի պեյզաժային դեմքը, կենցաղային որոշ յուրահատկությունները, աշխատան-

քային առօրյան: Այսպես. մութկեկ մի անկյունում՝ գյուղական՝ աղքատիկ տնակի կողքին, կանայք հաց են թխում: Այդ փոքր, սովորական երևությը նկարչի վրձնի զորությամբ կերպավորվել է իբրև հայ գեղջկուհու գործունեության, հույսերի ու խոհերի խոսուն պատկերացում: Իբրոք, «Հացեն թխում» (1914) կտավը այնքան տիպիկ է, որ դիտողի տեսաշրջանը չի սահմանափակվում. լոկ կոնկրետ հայեցողությամբ, այլ պատկերի սկզբունքի մղումով նրա երևակայությունը մտովի դեգերում է գյուղական, գեղջկական կյանքի տարբեր ոլորտներում: Պիտի նշել, որ առհասարակ Ս. Առաքելյանը ունի դիտողին հաղորդակցվելու տվատ մտածողություն և դիտողի երևակայությանը լայնորեն ու խորությամբ գործելու հնարավորություն է տալիս: Փորձենք, ստորև, ընդհանուր շտրիխներով ուրվագծել այդ մտածողության կոնկրետ էությունը:

Իբր հետևանք կորովինյան ու արխիպովյան պատկերային ըմբռնումների կիրառման, Ս. Առաքելյանի կերպավորման սիստեմը իր հիմքում ունի ոչ թե, այսպես կոչված, «գրական սյուժեն» և սրանով պայմանավորված հերոսների փոխհարաբերությունների ընթացիկ նկարագիրը, «պատմությունը», այլ երևութիւնական գծերի անմիջական, «անսյուժե» ըմբռնումն ու մարմնավորումը: Այնուհետև, ի լրումն դրա, նկարիչը զանց է առնում օբյեկտի էսթետիկական տվյալ էությունը պերսոնաֆների կոնկրետ բնավորություն-

ների միջոցով արտահայտելու սկզբունքը։ Նրա կտավներում չկան խիստ անհատականացված հերոսներ։ Բայց փոխարենը նա ընդգրկում է երևույթի այնպիսի տիպական գծերը, որոնք հատկանշական են առհասարակ այդ կարգի բոլոր երևույթներին։ Դրանով իսկ, նա դիտողի մտահորիվոնը տանում է հույսերի ու ապրումների մի այնպիսի աշխարհ, որ դուրս է «սահմանափակող» պատմություն-սյուժեից։ Այսպիսով, նկարչի գործերը, եթե կարելի, է ասել, «ընդհանուր-կերպարային են»։

«Հաց են թխում» աշխատությունը նկարչի այս մտածելածնի առաջին ակնհայտ դրսեռումն է, բայց այնքան էլ կատարյալ ու ամբողջական չէ, որովհետև ունի կոլորիտային թույլ կողմեր։ Պատկերի կապտամանուշակագույն ու մուգ մոխրավուն գամման տեղ-տեղ վերծ չէ պղտորությունից և կեղտոտությունից։ Այս տեսակետից «Հաց են թխում» կտավը որոշ առումով գրեթե համարժեք է նույն տարին կերտված «Լեռնային գագաթներ» պելվաժին։ Վերջինս, ճիշտ է, ունի ընդգծուն ռելեֆություն, սիլուետային «գրաֆիկ», պարզությամբ արտահայտում է լեռների պլաստիկան, իսկապես որ նրանում ծևերը ամուր են, բայց կտավի հարուցած տպավորությունը տևական ու խոր-էմոցիոնալ չէ, որովհետև գունային լուծումը, ինչպես «Հաց են թխում» պատկերում, թույլ է։ Երկու գործերում էլ բացակայում է նույն շրջանի «Սևանա կղզու ափերը» և այլ աշխատու-

թյունների գունային տոների թրթուն, շարժուն խաղը: Մասնավորապես «Լեռնային գագաթներ» պեյզաժի մուգ կապտավուն, կանաչավուն, մոխրավուն ու թանաքավուն երանգները զուրկ են խորությունից և բավականին չոր են:

Կերպավորման հիշյալ սկզբունքը ավելի կատարելապես է անդրադարձնում «Ցորեն են ծեծում» (1915) գործը, ուր լիովին հաղթահարված են «Հաց են թխում» էտյուդի կոլորիտային թերությունները: Դա ինչպես Ս. Առաքելյանի արվեստի, այնպես էլ ողջ հայ գեղանկարչության վիրտուոզ ստեղծագործություններից է՝ հայեցման էմոցիոնալ հարստությամբ ու օբյեկտի գեղարվեստական-ճանաչողական իմաստավորմամբ: Դարձյալ աշխատանքային մոտիվ է ներկայացվում՝ այն անգամ բակում փութացանորեն ցորեն ծեծող կանանց ֆիգուրների և վերջիններիս՝ իրենց ամենօրյա միջավայրի պեյզաժի միահյուսմամբ: Այս կտավը նույնպես զերծ է երկարաձիգ «պատմությունից» և պերսոնաժները իրարանչվում են ո՞չ իբրև «գրական» սյուժետային փոխհարաբերությունների ու հոգեբանական-էթիկական տարրեր տենդենցների կրողներ: Նկարի միջնորդմամբ, դիտողը ընկալում է առհասարակ գյուղացու աշխատանքի հերքը, զգում աշխատավոր մարդու յուրահատուկ հմայքը: Մտահղացման ու պատկերի կառուցման նման սկզբունքը, այդքան ազդեցիկ ու հարուստ չէր լինի, ավելին՝ անհաջողության կմատնվեր, եթե

դրա գեղանկարչական իրացումը չիներ այդպես կատարյալ ու խոր: Վերջին հաշվով, պատկերի գունային սառը և տաք տոների փայլուն զուգորդումները, լուսաստվերների ընդգծուն ու միաժամանակ փափուկ, ներդաշնակ անցումները, տարածական հեռատար խորությունը ֆիգուրների շարժմամբ կտավի ողջ կողմերի ռիթմի զարմանալի հստակ ամփոփումն է, որ տեղ է հասցնում նկարչի մտահղացումը — այդ փոքրիկ դրվագը ներկայացնում իրեւ ըդհանրացված կերպար, կյանքի որոշակի ոլորտի կենդանի խտացում: Արծաթագույնի կապուտ, վարդագույն, դեղնագույն, թափանցիկ երանգավորումները, ծնվելով նկարչին հոգեհարապատ օբյեկտի հարուցած անմիջական տպավորություններից, ապրում են լիապես արվեստային կյանքով, դառնում զգացմունք, մտորում: Թափանցելով իրար մեջ, ստեղծելով թրթռուն ցոլացումներ, միահյուսվելով, բայց երբեք չիւացնելով իրար, այդ երանգավորումները կարծես անընդհատ «շարժվում են», նորից ու նորից «գոյանում», հայեցորեն «փոփոխվում»՝ միշտ մնալով ներդաշնակ ու անմիջական: Դա, իհարկե, կայունությունից զուրկ շարժումը չէ: Միահյուսվելով կտավի պլաստիկային՝ կոլորիտային այդ շարժումը առարկաները ներկայացնում է որպես որոշակի ամբողջականություններ: Այստեղ ևս դեր են խաղում հիշատակված գունաբճերը: Վերջիններս, ներկա դեպքում, ավելի ընդգծուն են, դինամիկ և աշխուժորեն ակցենտա-

վորում են ծևերի ու ծավալների պլաստիկ ռիթմը: Գեղարվեստական ծևի նմանակերպ յուրահատկությունների ամբողջությամբ է ահա, որ «Յորեն են ծեծում» էտյուդը կատարելապես անդրադարձնում է գյուղի աշխատավորության կյանքին, առօրյային, մաքուր ու ազնիվ զգացմունքներին համակիր արվեստագետի կենսահայեցողությունը, արտակարգ ոչինչ ունեցող երևույթի մեջ գեղեցիկը, բարին գտնելու և «ընդհանուր-կերպարային» սկզբունքով իմաստավորելու տաղանդը:

«Գյուղում» (1917) պեյզաժը քննելիս լուրովի ի հայտ են գալիս «Յորեն են ծեծում» ստեղծագործության մի քանի էական կողմերը: Ծիշտ է, պատկերը պուտ պեյզաժային է, բայց, իր մեջ մարդու հետ կապված հանգամանքների շեշտվածության հետևանքով, լիապես զգալ է տալիս մարդու գոյությունը: Ավելին, միջավայրի նկարագիրը այնքան կենդանի ու տպավորիչ է, որ դիտողը պատկերացնում է մարդկային ակտիվ անցուղարձ՝ իր տիպական որոշ գծերով: Զհամեմատելով դեռ «Խմ բակը գյուղում», «Լեռնային գագաթներ» պեյզաժներին, «Գյուղում» պեյզաժը մի լուրջ առաջընթաց քայլ է «Սևանա կղզու ափերը: Ժայռեր» կտավի համեմատությամբ: Եթե, իր բոլոր հիանալի գծերով հանդերձ, «Սևանա կղզու ափերը: Ժայռեր» աշխատությունը, այնուամենայնիվ, իր վրա կրում է մշակման վեհերոտությունը, ապա «Գյուղում» կտավը կատարված է ավելի ինքնավստա-


հությամբ: Նկարիչը թափով կտավին է դրոշմել գունային թանձր մասսայի հաստաշերտ ու երկարաշունչ քսվածներ և, պետք է ասել, տվյալ դեպքում առարկաները իրենց պլաստիկան ստացել են ոչ միայն գույնի, լուսի համապատասխան ելեկտրումների միջոցով, այլև հենց իրենց՝ վրձնահետերի ուղղվածությամբ, ընթացքով:


Ուշադրության պիտի առնել ևս մի հանգամանք, որ խիստ կարևոր է Ս. Առաքելյանի՝ գույնիլուսի ասպարեզում կատարած պրատումները պարզոր դիտարկելու համար: Խուզարկու ուշադրությամբ հետևելով 1900—1910-ական թվականներին ծևի ոլորտներում արած քայլերին, կարելի է նշմարել, որ նա, մի կողմից անընդհատ ջանք է թափում գործից-գործ ավելի ու ավելի ամրապնդել զծապլաստիկայի ու գույնի միասնությունը, իսկ մյուս կողմից՝ ծգտում ավելի լուսավորել, պայծառացնել իր պատկերները: Առաջին խնդիրը, ինչպես վերը տեսանք, նա լուծեց համեմատաբար կարծ ժամանակամիջուցում կատարելության հասնելով 1910-ական թվականների վերջերի մի շարք ստեղծագործություններում: Երկրորդ խնդիրի լուծումը այդպիսի արագությամբ իր վերջնական տեսքին չեկավ ու քիչ ջանքեր չխլեց նկարչից: Երբ դիտում ենք 1900—1910-ական թվականների նրա մի քանի երկերը միասին վերցրած, աչքի է զարնում, որ այնտեղ, ուր նկարիչը հասել է գունային զգալի կատարելության,

նույն տեղում նույն հաջողությունը չի ունեցել լուսի ինտենսիվության ծգտման մեջ և՝ հակառակը: Այդ երկերում կան այնպիսիները, որոնցում առկա են գունային երանգների նրբությունն ու երաժշտականությունը, տոնների աննկարագրելի քնքշությունը, բայց դեռևս ինչ-որ չափով կրում են Մոսկվայում ձևավորված նկարչի համեմատաբար մութկեկ կոլորիտային զգացողության դրոշմը: Եվ հակառակը՝ այլ գործերում ավելի էքսպրեսիվ է լուսը, բայց պակասում է գույնի նրբությունը:

Արվեստագետի մտահոգության առարկա գեղանկարչական այդ երկու (գույն-գծապլաստիկա, գույն-լուս) խնդիրները հավասարապոր և ավելի կատարյալ վճռումներ են գտել 1920 թվականի ամռանը կերտված «Յորեն են չորացնում» մեծատաղանդ ստեղծագործության մեջ: Այստեղ նկարիչը ներդրել է մեղմ լիրիկ-մով իր հուպաշխարհը: Ամեն մի շտրիխ, ամեն մի երանգ կտավին է հանձնված անասելի սիրով ու շոյանքով, պատկերի ամեն մի դետալ ընկալվում է որպես հույզ, խոհ, տրամադրություն: «Յորեն են չորացնում» գործում,— իրավացիորեն գրում է Ե. Մարտիկյանը,— ...երևան են գալիս նրա (Ս. Առաքելյանի—Վ. Մ.) պահիտրայի ողջ նրբությունը, չափի զգացողությունը ու կոլորիտստ-գեղանկարչի մեծ տաղանդը»*: Կրկին գյուղական կյանքի առտնին

* «Очерки по истории искусства Армении», М.-Л.
1939, стр. 100.





Երևանի հին շուկան

Երևույթ է ընդգրկում կտավը՝ նախորդներից ավելի անմիջական ու պարզ, նախորդներից ավելի գեղեցիկ: Աղքատիկ տնակներով եպրափակված մի փոքրիկ բակում շիկավուն հացահատիկ է փռված, որի անկյունում կարմիր գլխաշորով ու կապույտ հագուստով մի գեղջկուհի խառնում է այն՝ տակի խոնավ շերտերը արևին տալու համար: Շրջապատի գունային ընդհանուր գամման կապտա-արծաթափունն է, որի «սառնությունը» կոտրում են իրեն միահյուսված բաց դեղին, բաց կարմրափուն նրբին ու ցոլացող երանգները, որ հնչեղանում են՝ հարաբերելով ստվերների մուգ կապտա-վարդագույնին: Կտավի գունային այդ տոները, ընդհանրապես, տրված են այնպիսի համամասնություններով, որ ավելի ուժեղացնում են լուսի զգացողությունը: Այս առումով «Գյուղում» պեյզաժը, «Յորեն են ծեծում» երկը ևս հիանալի են, բայց եթե հաշվի ենք առնում գումի ու լուսի հավասարապոր համահնչունությունը, ապա «Յորեն են չիրացնում». կտավը ավելի ամբողջական է: Իբրև գույն-լուս խնդրի օրգանական մաքմանվորում, «Յորեն են չորացնում» ստեղծագործությունը նկարչի նոր լուրջ առաջաբայլն է ներկայացնում: Բայց դա երևույթի մի կողմն է միայն: «Յորեն են չորացնում» կտավը ընդգրկում է մի այլ հատկանիշ, որ նորություն է Ս. Առաքելյանի արվեստում և միայն հետագայում՝ ինչպես տեսնելու ենք, պիտի ունենա իր

լայն ծավալումն ու զարգացումը: Դա միագույն, լուսաստվերներից զերծ, լոկալ հատվածի առկայությունն է, որ նոր որակ է տալիս նկարչի գունագրական սկզբունքներին: Լոկալ այդ գունահատվածը փոփած ցորենն է, որ կիսատոներով հարուստ իր շրջապատում դառնում է ավելի ընդգծուն, անմիջականորեն ընկալելի: Սա սոսկ գեղանկարչական էֆեկտ չէ: «Հակառարվելով» կտափի մուգ, ստվերոտ մասերին, այդ հատվածը ներկայանում է իբրև դիտողի տեսաշրջանի առաջին էմոցիոնալ օղակն ու կենտրոնը, փայլուն կերպով բանափի տալիս նկարչի մտահղացումը համապատասխան ասպեկտով «կարդալու» համար:

Երբ կողք-կողքի ենք դնում նկարչի առաջին (՝ ինքնուրույն երկը՝ «Ծառուլին այգում» էտյուեր և «Յորեն են չորացնում» նրա նախասովետական վերջին ստեղծագործությունը, ակնհայտ է դառնում, թե ինչպիսի մեծ բայլերով է զարգացել Առաքելանի տաղանդը՝ նկարվող օբյեկտի ամբողջական ընկալման, նրա գեղանկարչական կարևոր գծերի սինթեզման ու բացահայտման առումով: Որքան առաջինը մակերեսային, վեհերոտ է, նույնբան (դեռ շատ ավելին) երկրորդը խորն է ու համարձակ: Որքան առաջինը նկատելի չափով մնացել է իբրև կողմնակիորեն հայեցվող օբյեկտ, նույնբան երկրորդը դարձել է հեղինակի ներաշխարհի ակտիվ թարգմանը...

Դրանք են Ս. Առաքելանի նախասովետական շրջանի կարևոր երկերը, որոնք, անկրկնելի յուրա-

հատկություններից բացի, պարունակում են նկարչի ստեղծագործական դեմքը հստակորեն ուրվագծող գաղափարական, աշխարհայացքային ընդհանուր շտրիխներ:

Վերոհիշյալ լավագույն ստեղծագործությունների վերլուծական նկարագրերից բաղելով նկարչի էսթետիկական ըմբռնումները, նկատում ենք, որ Ս. Առաքելյանի գեղարվեստական մտածողության հիմքում ընկած է օբյեկտիվ իրականության՝ իմայրեսիոնիստական գունագրության դրոշմը կրող ռեալիստական արվեստի վերարտացոլման մեջողը: Նրա գործերում առարկաները դիտողին են հաղորդվում իրենց գունային, գծապլաստիկական ու լուսաստվերային համովիչ տեսքով ու հարաբերություններով: Նրա երկերում երևույթները դրսենորվում են իրենց բնական ընթացքով, բայց ո՞չ նատուրալիստական էկլեկտիկ պատճենավորմամբ, ո՞չ պուփիտիվ օբյեկտիվիստական հայեցողությամբ, այլ դրանց ներքին էության որոշ գծերի ու հարաբերությունների կենդանի բացահայտմամբ,— կոնկրետի մեջ ընդհանուրը մարմնավորող գեղարվեստական տպավորիչ կերպարների միջոցով:

Այնուհետև: Նախասովետական շրջանի Ռուսաստանում ազատագրական պայքարի արծարծումները վաղուց հետեւ տարերային հուլումների բաղադրական հարթավայրից տեղափոխվել էին նպատակասլաց ռեսուլուցիայի ամուր ռելսերի վրա: Ըստ այդմ էլ ժամանակի գաղափարական կյանքը պայմանավոր-

Վում էր ռեոլյուցիայի պատճառների, ստեղծած պատմա-հասարակական տեղաշարժերի բնույթով։ Հայտնի է նաև, որ ժամանակի դեմոկրատ գրողների, արվեստագետների մի մասի ստեղծագործական մտահորիվոնում ընկած էին հենց այդ տեղաշարժերը։ Այդ հեղինակները ակտիվորեն խորամուխ էին լինում քաղաքի թե գյուղի կյանքի դասակարգային հարաբերությունների, հակասությունների ու պայքարի մեջ՝ իբրև ճնշվող մասսաների շահերի արտահայտիչներ, հաճախ իբրև ազատության մարտի ոգեկոչման մունետիկներ ևս։ Այս ակտիվությունը չունի Ս. Առաքելյանի ստեղծագործությունը։ Նա ժամանակի արվեստի դեմոկրատական թևի այն ներկայացուցիչներից է, որ չի անդրադառնում հասարակական կյանքի առաջադրած գլխավոր հարցերին։ Մի կողմ քաշվելով դասակարգային պայքարի թոհուբոհից, նա ստեղծագործական հանգրվան գտավ հայ աղքատիկ գյուղաշխարհում՝ պատկերելով ոչ թե գյուղի սոցիալական կոնկրետ իրողությունները, այլ գեղջուկի աշխատանքը, նրա ներաշխարհի մաքրությունը, պարզությունն ու էթիկական այլ բարեմասնությունները։ Նա չանդրադավակ կապիտալիստական հարաբերությունների ծավալման հետևանքով գյուղում ստեղծված քայլքայման, դասակարգային պայքարի խընդիրներին։ Բայց նրա արվեստը ամբողջովին տոգորված է աշխատավոր գյուղացիության նկատմամբ տածած անսահման սիրով։ Եվ որովհետև նկարչի հա-

մակրանքի օբյեկտը՝ գյուղական չքավորությունը, ապրում էր կյանքի դաժան պայմաններում, ճնշված ու հարստահարված, ապա նրա հոգում սիրո ու հիացմունքի նոտաների հետ միասին ձայն են տալիս նաև մեղմ թախծի որոշ երանգներ: Սակայն դա իրականությունից փախուստ տվող քաղըենու հոռետեսությունը չէ, հոռետեսություն, որ իր ծայրահեղ դրսւորմամբ հանգում է մահվան պոետականացման: Ընդհակառակը,¹ Ս. Առաքելյանի ստեղծագործությունների թախծի երանգը հիշեցնում է հայ ժողովրդական ստեղծագործության, Հ. Թումանյանի, Ղ. Աղայանի, Պ. Պոռշյանի, Հ. Հովհաննիսյանի, Կոմիտասի, Վ. Սուրենյանցի, Ե. Թաղեկոսյանի և այլոց արվեստի մեջ առկա, դարձյալ նույն ակլութքներից եկող տիրամած մեղեղիները: Ի միջի այլոց նկատենք, որ այստեղ հօդս են ցընդում ժամանակին մեր ինտելիգենցիայի որոշ շրջաններում ծվարած գոենիկ սոցիոլոգների այն պատկերացումները, թե, իբր, Ս. Առաքելյանի նախասովետական ստեղծագործությունը տառապում է «Էկլեկտիկ-էկպոտիվմով», թե իբր, այնուհետև, նրա արվեստի հիմքում ընկած է միստիկական սիմվոլիզմը՝ հայ իրականության նկատմամբ ունեցած «մեծապետական շովինիզմի» հետ զուգորդված*: Ի չիք են դառնում նաև որոշ արվեստաբանների այն կարծիքները, ըստ որոնց նկարչի նախասովետական շրջանի երկերը

* Ste' u L. Ремпель, Живопись советского Закавказия, М.-Л., 1932, էջ 105:

առհասարակ հասարակական բովանդակություն չունեն և որպես թե նա բավարարվել է «պուտ էսթետիկական հուզվերով»*: Նախընթաց շարադրանքը, կարծում ենք, թույլ է տալիս պնդելու, որ այդ երկրու դեպքում էլ աչքի է զարնում Ս. Առաքելյանի աշխատությունների արվեստաբանական մակերեսային ընկալումը՝ առանց հետաքրքրության առարկա օբյեկտի լրջմիտ հետաքննության:

Առաքելյանի ստեղծագործության հիմնական գծերից պետք է հատկապես ընդգծել նաև հետևյալը: Նրա երկերը, բոլոր պարագաներում, ապդում են իրքի ինտիմ-կամերային բնույթի գործեր: Ս. Առաքելյանի մտածողությանը, երևակայությանը հատուկ չեն մոնումենտալ պատկերացումներն ու լայնաշունչ էայլիկական ապրումները, դրամատիկ ուժեղ բախումներն ու խրախճալից բուռն վայելքները: Նրա հիացումը մեղմ է և հանդարտ, տխրությունը՝ հապիվ շշնչացող, ընդգրկվող երևույթի էմոցիոնալ ընկալումը՝ մինհատյուր: Իսկ ինչ մնում է նկարչի արվեստում մարդու և բնության միասնական ընդգրկման խընդրին, այդ մասին պիտի ասել հետևյալը: Բնության և մարդու սոսկ հայեցական կապը չէ այդ, և ոչ էլ մարդու ու իր միջավայրի պեյզաժային ընկալումը սոսկ: Ի տարբերություն զիխավորապես պեյզաժիստի մտածողությամբ օժտված նկարիչների գործերի


* Տե՛ս Ո. Շիշմանյան, Բնանկարն ու նայ նկարիչները, Երևան, 1958, էջ 210:

(որոնցում եթե ոչ միշտ, ապա գերակշռող դեպքերում մարդը հանդես է գալիս բնության տեսարանը աշխուժացնող ստաֆֆաժի դերում), Ս. Առաքելյանի կտավներում գլխավորը մարդու ակտիվ գործունեության բացահայտումն է տվյալ միջավայրում: Նրա զուտ պեյզաժային գործերն ել «մարդկայնացված են», հուշում են մարդու գոյությունն ու գործունեությունը: Հենց դա ել, հավանորեն, հաշվի է առնում արվեստաբան Ռ. Դրամբյանը, Ս. Առաքելյանի առաջին պահ որպես պեյզաժ երևացող մի շարք գործերը համարելով «կիսաժամրային»*:

Այդպիսով, անցնելով Ե. Թադևոսյան—Կ. Կորովին—Ս. Արխիպով գեղանկարչական դպրոցը, Ս. Առաքելյանը, Հայաստանում սովորական կարգերի հաստատմանը նախորդող տասնամյակում, ստեղծեց գեղարվեստական բարձրարժեք ժառանգություն: Յուրացնելով գույնի, լուսի և գեղանկարչական ձևի այլ ասպարեզներում կերպարվեստի ձեռք բերած մի շարք նվաճումները, նկարիչը տվեց աշխատություններ, որոնք կատարելապես բացահայտում են հեղինակի դեմոկրատական աշխարհայացքը, հայ աշխատավոր գյուղացիության նկատմամբ ունեցած նրա որդիական սերը:

Դեռևս ուսանողական տարիներին նա հանդես եկավ որպես գեղանկարչության բարդ աելինսիկային տիրապետած, գույնը, գծապլաստիկան իբրև մարդ-

*Տե՛ս «Գրական թերթ», 1936, 10 հունվարի:



Յորեն են ծեծում

Գ Լ Ո Ւ Խ Ե Ր Կ Ր Ո Ր Դ

1920-ական թվականների սովետական կերպարվեստը գաղափարական-գեղարվեստական միատարր հունով չէր ընթանում: Հակադարձ տենդենցների պայքարի, հին ու նոր ասպեկտների ընդգրկմամբ այն բարդ ու հակասական պատկեր էր ներկայացնում: Հեշտ չէր կողմնորոշվել՝ տատանումների, ոճական ու գաղափարական տարբեր առաջարկների ու դեղատոմսերի, անհիմն մեղադրանքների ու՝ անհարկի մեծարանքների, հակամետ ու հակադիր էսթետիկական դրույթների միջև: Պատաժիական չե, որ նախասովետական տարիներին արդեն ծևավորված արվեստագետներից շատերը, գլուխ չհանելով ստեղծված իրադրությունից, ուղղակի մնում էին հին սկզբունքների վրա:

Այդ արվեստագետներից էր և Սեղբակ Առաքել-յանը: Նա ոչ այն նկարիչներից էր, որոնք Սովետական իշխանության առաջին տարիներից իւկ ծեռք զարնեցին սովետական թեմաների, ոչ ել նրանցից, ովքեր հրապուրվեցին «պրոլետկուլտի» կամ այլ հոսանքների գաղափարաբանությամբ ու ձևի որոնումներով: Իրավ է, Ս. Առաքելյանը Կ. Հալաբյանի, Հ. Կոջոյանի հետ միասին մասնակից եղավ քաղաքացիական կրիվների օրերին կազմակերպված «Արմկավորստայի» աշխատանքներին և նկարեց քաղաքական թեմաներով պլակատներ, բայց սրանք մի առանձին, ինքնակա կղզի են կազմում այդ շրջանի նրա ստեղծագործական կյանքում: Այդ պլակատների գաղափարական ուղղվածությունն իր դրսերումը չունեցավ նրա իսկական մասնագիտության՝ գեղանկարչության մեջ: Նրա արվեստի թեմատիկան առայժմ գրեթե նույնն է, բարձրացրած խնդիրները, ստեղծագործական մեթոդը զգալապես՝ հինը:

1921 թվականին նկարիչը կերտեց ժանրային բնույթով նույնական երկու գործ («Երևանի հին շուկան», «Եջևան»): Դրանք իրենց մեթոդով կական սկզբունքով բավականին նման են նախատվետական տարիներին ստեղծված «Հաց են թխում», «Յորեն են ծեծում», «Յորեն են չորացնում» կտավներին: Թերախատիկ առումով ել դրանք այնքան հեռու չեն իրարից — տարբերությունը, գլխավորապես, մոտիվային է (երկու գործերում՝ կենցաղային, երեքում՝ աշխա-

տանքային) : Տարբերակիչ մյուս գիծն էլ այն է, որ մի մասը գյուղական, գեղջկական տեսարաններ է ներկայացնում, մյուս մասը՝ գավառաքաղաքի: Սրանք, ինչպես տեսնում ենք, ստեղծագործական լայն մասշտաբի տարբերություններ չեն, մանավանդ որ գաղափարական ասպեկտով էլ այդ գործերում տարբերություն գոյություն չունի: Երկու կտավների պատկերավորման եղանակն էլ ընդհանուր գծեր ունի նախասովետական երկերի հետ: Այստեղ էլ բացակայում է ծավալուն-սյունետային կոնկրետ ընթացքը: Օբյեկտի վերարտացուլումը, նրա հարուցած էմոցիաների, նկարչի անձնական ապրումների ու վերաբերմունքի դրսևորումը տրված է անմիջական (սյունեկով չմիջնորդավորված), «ընդհանուր-կերպարային» մտածելակերպով, ուր որոշիչ դեր է կատարում մարդու և միջավայրի միասնական, ամբողջական պգացումը:

Չի կարելի ասել, սակայն, որ «Երևանի հին շուկան», «Իջևան» գործերի և նախորդ շոշանում կերտված աշխատությունների միջև բացարձակորեն չկան տարբերություններ:

Առանձնապես պիտի ընդգծել հետևյալ մոմենտը: Սկսած «Երևանի հին շուկան» ու «Իջևան» կտավներից, Ս. Առաքելյանը բացահայտ միտումնավորությամբ հետաքրքրություն է ցուցաբերում հանդեպ տարածական լայն մասշտաբի տեսարաններն ու բազմաֆիգուր պատկերները: Այդ բանի ռեալ դըր-

սկսորումներն են ոչ միայն բնօրինակից 20-ական
թվականներին և հետագայում նկարված՝ աշխատան-
քային մոտիվներ պարունակող նրա բազմաթիվ եր-
կերը, այլև արվեստանոցում կերտված սյուժետային
բազմաֆիգուր կտավները։ Եթե նախասովետական
շրջանի նրա գործերը, առավելապես, ներկայացնում
են գյուղի մի ներփակ անկյուն, բնության տարածու-
կան մի փոքր կտոր, որոնք ըստ բնույթի ինտիմ-կա-
մերային են, ապա այժմ նկարչի արվեստում նաև
տեղ են գրավում լիրո-էպիկական շնչավորում ունե-
ցող լայնատարած, բազմապլան աշխատությունները
(թե Ֆիգուրալ, թե Վուտ պեյզաժային)։ «Իջևան»,
«Երևանի հին շուկան» գործերը (հատկապես Երկ-
րորդը) նկարչի նախասովետական աշխատությունները
ներին համեմատելիս ակնորոշ է դառնում հետևյալը։
Եթե «Ցորեն են ծեծում», «Հաց են թխում», «Ցորեն
են չորացնում» կտավները ինտիմ-կամերային են,
ապա այդ երկու աշխատանքները մոնումենտալու-
թյան որոշ տարրեր են պարունակում։ Դա, իհարկե,
սարյանական արվեստի մոնումենտալության շռնդա-
լից խինդը, զգացմունքների պոռթկուն խաղը,
անսանձ հերոսականությունն ու դինամիկ պա-
թոսը չեն։ Նկարիչը ընթանում է իր ճանապարհով։
Առաքելլանը, առավելապես, վուսպ է իր զգացմունք-
ների մեջ, չափավոր ու հանգիստ։ Ճիշտ է, «Երևանի
հին շուկան» կտավում մոնումենտալ, ներքին հրայրքի
զգացումը չի հասցված հետագա տարիներին իր իսկ

ստեղծած գործերի էմոցիոնալ անգամ այդ չափավորությանը, այնուամենայնիվ, նկարչի պրվեստի էվոլյուցիայի բացահայտմանը հետամուտ հետազոտողը չէր կարող չանդրադառնալ այդ խնդրին ու այդ գործը նախորդների հետ համեմատելիս չնկատել առկա փոփոխությունը:

«Երևան», «Երևանի հին շուկան» կտավների արժեքը չի սահմանափակվում հիշյալ առանձնահատկություններով միայն: Դրանք հայտ են բերում նաև հետաքրքիր ու կարևոր այլ մոմենտներ՝ Ս. Առաքելյանի արվեստի հետագա վարգացման քայլափոխը ներկայացնելով: Երկուսն էլ ամբողջականորեն և ավելի խորացված ձևով ընդգրկում են այն լավագույնը, ինչին հասել էր նկարիչը գծապլաստիկայի, գունագրության, գույն-լուս, գույն-գծապլաստիկա և այլ խնդիրների լուծման ասպարեզում: Ավելին, դրանցում (մասնավորապես «Երևանի հին շուկան» երկում) երևան են գալիս գեղարվեստական ձևի նոր տարրեր, որոնք ավելի ու ավելի են ընդգծում նկարչի ինքնատիպությունը՝ կյանքի արտացոլման պրոցեսում նրա ունեցած ապրումներն ու հույսերը ամբողջականորեն ներկայացնելու առումով: Իրենց ընդգրկած մոտիվներով, օբյեկտի համովիչ արտացոլմամբ, այդ աշխատություններն այսօր ներկայացնում են պատմա-գեղարվեստական խոշոր արժեք: Գուցե ամենաարատն ու նրբանկատ ճանապարհուղը իր գրական նոթերում չկարողանար այնպես տալ

գավառաքաղաքի՝ տվյալ դեպքում 1920-ական թվականների Երևանի կոլորիտային ընդհանուր գծերի ու կենցաղային որոշ առանձնահատկությունների բնորոշումն ու տիպական գծերի նկարագիրը, ինչպես պարզ ու ռելեֆ հնարքներով այդ արել է Ս. Առաքելյանը: «Ծանա» կտավը լիովին պատկերացում է տալիս արևելյան իջևանի կյանքի ժխորի մասին: Կեսօրյա շոգը, հրապարակը շրջափակող բարձր պարիսպը, հողածածկ կտուրներով հյուղականման տներն ու ցածրիկ տաղավարները, հրապարակից դուրս եկող բեռնավորված ուղտերի քարավանը, ողջ տեսադաշտով մեկ անկանոն ձևով խոնված, փաթթոցավոր ու արևելյան գույնվգույն տարավներով մարդկանց խմբերը և կենցաղային այլազան դրվագներն ու ատրիբուտները ստեղծում են էկզոտիկ միջավայրին բնորոշ հույզերի ու անմոռաց տպավորությունների այնպիսի մի հարուստ, բազմերանգ և ամբողջական կերպար, որ անհնարին է խոսքով նկարագրել: Խմաստ էլ չունի նկարագրելը: Պետք է դիտել կտավը, տեսողությամբ անմիջականորեն ընկալել այն՝ զգալու համար, թե գեղագետի ինչպիսի սուր աչքով, ցայտուն երևակայությամբ, քննախույզ ու խորաթափանց տաղանդով է օժտված հեղինակը: Պիտի դիտել կտավը՝ ճիշտ պատկերացում կազմելու համար արևելյան կյանքի կոլորիտային յուրահատկության մասին: Եվ, վերջապես, պիտի դիտել պատկերը՝ Արևելքի արտացոլման խորը, համոզիչ ու


կեղծ-օրիենտալիստական ասպեկտների տարբերությունները ըմբռնելու համար: «Ս. Առաքելյանի ստեղծագործության մեջ բնորոշ ընդհանուր գիծ է,— իրավացիորեն նկատում է Ռ. Շիշմանյանը,— նաև նրա արևելասիրությունը, որ մեր նկարչի մոտ խորապես օրգանական է: Նա ի բնե սիրում է Արևելքը և աշխատել է նկարչության մեջ պատկերել այն: Պետք է ճշտել նաև այն, որ Ս. Առաքելյանը երբեք չի ձգտել վերակենդանացնել պատմական կամ վիպական Արևելքը, շահերի ու սովթանների հարեմական կենցաղը, զարդարակարչական կամ հեքիաթային շքեղ միջավայրերը և այլն»*: Իրոք, հակառակ իր ժամանակի օրիենտալիստներից շատերի, որոնք արևելյան կյանքին մոտենում էին ոճական էքսպերիմենտներ անելու, զուտ անսովոր տպավորություններ քաղելու, քաղցր ու խայտաճամուկ, մակերեսային էֆեկտներ արտահայտելու նպատակով,— Ս. Առաքելյանը տալիս է ընդգրկվող օբյեկտների բուն տեսքի էությունը: Այդ սկզբունքն է ընկած, ինչպես տեսանք, «Խջևան» գործի հիմքում: Այդ պատճառով էլ նա ուշադրություն է քևեռել և՝ պատկերի ընկալման առավել հաջող դիտակետ ընտրելու, և՝ օբյեկտի գունային սպեցիֆիկ ելաւչները համովիչ վերարտացոլելու, և՝ անշունչ ու շնչավոր առարկաների բնորոշ գծերը, շարժումները,

* Ռ. Շիշմանյան, Բնանկարն ու հայ նկարիչները, Երևան, 1958, էջ 215:

պլաստիկական ստրուկտուրայի տիպիկ մոմենտները սինթեզելու վրա: Եվ որովհետև նկարիչը փայլուն հաջողությամբ կարողացել է օրգանապես ի մի բերել, զոդել այդ բոլոր մոմենտները, դիտողին է ներկայացրել իսկական արվեստի հարստությամբ օժտված ստեղծագործություն:

Նույնքան տպավորիչ է և «Երևանի հին շուկան» աշխատությունը: Դարձյալ տիպական շեշտվածությամբ ի հայտ են բերված արևելյան գավառաքաղաքի որոշ գծեր: Եթե «Խջևան» պատկերը նկարված է ընդգրկվող օբյեկտին շատ մոտ տեղից, ապա այստեղ տեսարանը ընկալված է բավական հեռավոր դիտակետից, այնքան հեռավոր, որ մարդկանց ֆիգուրները շուկայի հրապարակում երևում են գունային մանր դրոշմների ձևով: Այստեղ ավելի, քան «Խջևան» աշխատության մեջ, նկարիչը տեսարանը ընդգրկել է մի ընդհանուր հայացքով, նկատի չառնելով պերսոնաժների թեկուզ տիպաժային անհատականացումը: Նրա նպատակն է եղել ստեղծել ընդհանուր տպավորություն և դրան հասել է մեծ վարպետությամբ: Պատկերի ամեն մի շտրիխը, գունային ամեն մի ելեկչը հմտությամբ ներդաշնակվում է շրջապատի հետ՝ դառնալով նկարչի մտահղացումը իրացնող զորեղ փաստարկ: Թե՛ կեսօրվա կիպիչ արևով ողողված տափարակ հրապարակը, թե՛ շուկայի հնամենի կամարակապ կառուցը և նրան հաջորդող մուսուլմանական մեջիտն ու մինարեթը, թե՛ բլուրն ի վեր ցրված միհարկանի, հողա-





Աշուն: Մի անկյուն Երևանում

ծածկ կտուրներով տները, թե՛ շուկայի առջևում շարժվող մարդկանց ու կենդանիների ֆիգուրները դիտողին մեր օրերից ետ են տանում դեպի անցյալի արևելյան գյուղաքաղաքի առօրյան՝ մի կողմից, կարծես, աղմկոտ ու շարժուն, մյուս կողմից, թվում է, ծույլ ու լոին:

Սակայն դա խնդրի մի կողմն է: «Երևանի հին շուկան» աշխատությունը չափազանց հետաքրքրական է այլ կողմերով ևս:

Նկարչի նախատվետական գործերի մասին խոսելիս Նկատեցինք, որ «Ձորեն են չորացնում» երկում տրված է լոկալ մի գունահատված (փոված ցորենը), որ գրեթե վերծ է կիսերանգներից և մեծ հարթությամբ հարաբերելով շրջապատին՝ դեկորատիվ տարր է մտցնում Ս. Առաքելյանի ստեղծագործության ոլորտը: Ահա այդ գիծն է, որ ավելի ամբողջական դրսելում է գտել «Երևանի հին շուկան» պատկերում: Աշխատության առաջին գլխում ցուց է տրվել, որ Ս. Առաքելյանի գունագրության առանցքը արծաթավուն ընդհանուր կոլորիտի պարուրում տարբեր երանգների հաջորդական միավորման, համադրման մեթոդն է՝ ողողված լուսային նրբին թրթիռներով: Համարյանույն հիմքի վրա է կառուցված նաև «հջևան» սովետական շրջանում կերտած ստեղծագործության գունագրական կոմպոզիցիան: Պատկերի գրեթե յուրաքանչյուր հատված, ըստ տարածական պլանների, իր մեջ ներառում է մնացած համարյա բոլոր

հատվածների կամ հատվածների մեծ մասի ունեցած գունային երանգներ՝ մոխրավունով և դեղնավունով մեղմացած այս կամ այն ներդաշնակող խառնուրդով։ Կտավից ստացած գունային առաջին տպավորությունը արծաթավուն-մոխրավուն-դեղնավունն է, որը թափանցիկ լինելով՝ դեպի իր խորքերն է ձգում դիտողի հայացքը։ Հետպիետե խորանում է տպավորությունը, բացվում են գունային նորանոր ելաչջների հարուստ էմոցիաներ։ Իջևանի հրապարակում նրագեղորեն մեկը մյուսին հաջորդում, մեկը մյուսի մեջ հալվում, կարծես, գնալով աներևութանում են սպիտակա-շիկավուն, կապտա-մոխրավուն և դեղնասպիտակավուն, թեթև, սահուն երանգներ։ Այդ բոլոր պարուրված են արևային լուսով։ Այստեղ խապառ բացակայում են գունային, գծագրական չորությունները։ Երանգային «սևությունների», կեղտոտության նշույլ անգամ անհնարին է գտնել կտավի ամբողջ հարթության վրա։ Բոլոր դետալներում բյուրեղային մաքրությունն ու պարզությունն է անվերջ ընկալելի, անվերջ հրապուրիչ։ Ահա այդ միջավայրում ել շնչափորված են կանգուն առարկաներն ու շարժուն ֆիգուրները, որոնք կտավին են դրոշմվել էտյուդային անկաշկանդ թափով, անսպառ ոգևորությամբ։ Մարմինները գծապլաստիկական ու գունային էմոցիոնալ կերպարանք են ստացել բաց ու մուգ մանուշակագույն, կապտավուն, դեղնավուն, շագանակավուն, կարմրավուն մի բանի հյութեղ վրձնահիետերի

զուգորդումներով՝ պահված տեսարանի գունային ընդհանուր գամմայի համբնկուն հնչեղության սահմաններում: Ֆիգուրները տարածության մեջ ռելեֆ պլաստիկայով զատորոշվում են Ս. Առաքելյանի գործերում վաղուց կիրարկվող գունաբժերի ռիթմիկ համակերպումների և գույներով ստեղծված լուսաստվերային հմուտ տեղաբաշխումների շնորհիվ: Գեղանկարչական այդ բոլոր հնարների միասնության ընկալումը պարզուց ցուց է տալիս, որ, աշխատելով «Յորեն են ծեծում», «Յորեն են չորացնում» գործերում կիրարկված մեթոդներով, Առաքելյանը հասել է խնդիրների ավելի լայն ընդգրկման աստիճանի: Գեղարվեստական ձևի բնույթը մի փոքր այլ է «Երևանի հին շուկան» աշխատության մեջ: Եթե «Խջևան» ստեղծագործունը կոլորիտային իր առանձնահատկություններով զարգացնում է «Յորեն են չորացնում» կտավի գունագրական հիշյալ սկզբունքները, ապա «Երևանի հին շուկան» գործի գեղանկարչական տեխնիկան հենված է գլխավորապես այլ էլեմենտների վրա: Ճիշտ է նկատում արվեստաբան Ե. Մարտիկյանը, օրինակ բերելով «Երևանի հին շուկան» գործը, ասելով, որ Առաքելյանը ձգտում է դեկորատիվ լոկալ գունային միջոցներով հասնել բնության ընդհանրացման*: Հատ որում, կտավում զա-

*Տե՛ս «Очерки по истории искусства Армении», 1939, էօ 86:

տորոշված ձևով տրված են գումային լոկալ խո-
շոր հատվածներ, որոնք դրսենորվում են իբրև «հանդիպակայող» էլեմենտները՝ համեմատած «Ցո-
րեն են ծեծում», «Ցորեն են չորացնում» գոր-
ծերի անընդհատաբար իրար մեջ հալվող երանգ-
ների անցումային գումագրության սիստեմին: «Երե-
վանի հին շուկան» երկում բացակայում է մոխրա-
վուն այն գամման, որ հանդիսանում է հիշյալ ստեղ-
ծագործությունների կոլորիտային ընդհանուր տպա-
վորության առանցքը: Կողք-կողքի, գրեթե առանց
մեկը մյուսի ոլորտը մտնելու, հանդես են գալիս գու-
նային «ինքնակա» տարածություններ, որոնք լծորդ-
վում են որոշ առումով որպես «հակադրամիասնու-
թյուններ»: «Ցորեն են ծեծում», «Ցորեն են չորաց-
նում» կտավներում, ինչպես վերը նշվել է, գու-
նային յուրաքանչյուր հատված իր ոլորտում ունի
մոխրա-արծաթավուն երանգներ և առարկաների մի-
ջև եղած գունային կապն ու ներդաշնակությունն էլ
հենց պայմանավորվում է դրանով: Խոկ «Երևանի հին
շուկան» երկում տեսողության առաջ կատարվում է
գունային տարբեր որակների համեմատաբար արագ
փոփոխություն: Կապտավուն լոկալ երկինքը, սրան
հաջորդող սպիտակ սարերը, ապա բաց կապտա-կա-
նաչավուն բլուրները, սրանց հաջորդող կանաչ ան-
տառն ու պուրակը, դարձյալ գունային հակադրումնե-
րով տրված մեջիտը, մինարեթը, տներն ու գորշա-դեղ-
նավուն շուկայի կամարները, տաղավարների խորքի

թիսա-շագանակավուն-մանուշակավուն ստվերը և, վեր-
ջապէս, կտավի տարածության համարյա կեսը բռնող
խամր դեղնա-մոխրավուն շուկայի հրապարակը տօք-
ված են դեկորատիվ հարաբերումներով։ Եվ այդ բո-
լորը, հակառակ նախորդ երկերի գունազրական ելքի,
ներդաշնակվում են ոչ թե որևէ կոնկրետ գամման
ամենուր երևակելու, այլ գունային տարբեր որակնե-
րը համապոր հնչեղությամբ դրսորելու միջոցով։ Պի-
տի ընդգծել, որ Առաքելյանը այդ երկու մեթոդների
կիրարկումներում էլ հանգում է կուռ ամբողջականու-
թյան, ցուցաբերում հավասարապոր վարպետություն։
Ճիշտ է, «Երևանի հին շուկան» աշխատության գունա-
յին տարբեր որակների այդ արագ փոփոխությունը
Սարյանի 1910—1920-ական թվականների արվեստի,
Գոգենի, Մաթիսի ստեղծագործություններին հատուկ
ամենահիմնական առանձնահատկություններից մեկը
կազմող «թրիչքածե» փոփոխությունը չէ և ոչ էլ այդ
որակները ունեն վերջիններիս գործերի գույների դե-
կորատիվ «բացարձակ» բախուն հակադրություննե-
րը։ Իրավ, «Երևանի հին շուկան» կտավը չունի սար-
յանական գույների հրաբորքը հնչեղությունն ու լույ-
սի «շլացուցիչ» պայմանությունը, էպոսային հկոր ու
խոլական պոռթկումը։ Իհարկե, այս երկում ևս ինքն
է՝ հանդարտ ու մեղմ Առաքելյանը, դրանում ինչ-որ
չափով կիրառված են և կիսատոնային մեղմացնող
երանգավորումներ, և պատկերի նույն գունահատ-
վածներում տրված են իրենց իսկ տոնի բաց ու գող,

լուսավոր ու ստվերոտ ելեհջումները։ Այսպիսով «Երևանի հին շուկան» գունամտածողությամբ տարբեր է սարյանական (1910—1920-ական թվականների), գոգենյան, մաթիսյան ստեղծագործություններից (ոչ միայն ինքնատիպությամբ. այստեղ խոսքը էսթետիկական-գեղանկարչական սկզբունքների, ուղղության մասին է) և վերոհիշյալ իր իսկ գործերից։ «Երևանի հին շուկան» ներառում է թե՛ դեկորատիվ, թե՛ կիսերանգային միահյուսվող, անընդհատվող անցումների տարրեր՝ առաջինի մեթոդական որոշակի հենքի վրա՝ համեմատած «Ցորեն են ծեծում», «Ցորեն են չորացնում» գործերին։ Էմոցիոնալ-հոգեբանական առումով էլ այդ գործը զուգորդում է երկու մոմենտ։ Զարմանալի վարպետությամբ այստեղ համապողված են հակադիրն ու անցումները, պատկերվող օբյեկտի մոնումենտալ ու ինտիմ գծերը։ Լիրո-էպիկական այդ համակարգում որոշողը, ելակետայինը «էպիկական» է՝ համեմատած, դարձյալ, «Ցորեն են ծեծում», «Ցորեն են չորացնում» երկերին։ «Երևանի հին շուկան» աշխատությունը գծանկարով էլ «տարրեր» է այս գործերից։ Այստեղ գծային կոմպոզիցիան ավելի սուր է, ընդգծուն, առարկաների պլաստիկական ստրուկտուրները դիտված են իրենց ընդհանուրացված, տեղ-տեղ սիլուետային հարթություններով։ Ի տարբերություն հիշյալ գործերի գծանկարի, որը, ընկղղմված լինելով մոխրավուն տոների մեջ, ունի փափուկ, ցրուն տեսք, «Երևանի հին շուկան» ստեղծագործության արխիտեկտո-

նիկ ողջ անսամբլի տարբեր դետալները իրար են հարաբերում գծային «կտրուկ» սահմանազատումներով։ Կտավի գծապլաստիկական և գունագրական այդ լուրահատուկ դրսերումների վուգորդումներով Ս. Առաքելյանը երևան է բերում կյանքի ընկալման մի նոր ասպեկտ, որով նկարվող օբյեկտի մեջ շեշտվում են նաև մոնումենտալ գծեր իրենց հանդարտ ու անխռով ռիթմով, առանց հոգին ալեկոծող ասոցիացիաների ու ապրումների։ Իր բոլոր կողմերի միասնությամբ, իրականության արտացոլման նուրբ դիտողականությամբ ու գեղանեարչական հմուտ կատարմամբ «Երևանի հին շուկան» «Խջեւան» ստեղծագործության հետ միասին Ս. Առաքելյանի արվեստի և հայ ողջ գեղանկարչության լավագույն երկերի թվին են պատկանում։

Գեղանկարչական մտածողության հիշյալ տեսնենցները, որոնք շահարկված են 1920—1921 թվականների գործերում, իրենց ավելի պարզորշ զարգացումն ունեցան Ս. Առաքելյանի 1920-ական թվականների հետագա ստեղծագործությունների մեջ։ Այս ոլորտում, մի կողմից, տեսնում ենք բնության արտացոլման ինտիմ-կամերային ասպեկտը, մյուս կողմից՝ նկարվող օբյեկտի լիրո-էպիկական մարմնավորումը։ Կարևոր ենք համարում Առաքելյանի 1920-ական թվականների արվեստի հիմնական տենդենցներից առաջիկայում ուշադրություն քևեռել հատկապես այդ երկու ասպեկտների վրա, որովհետև, մեր կարծիքով,

հենց դրանք են, որ հնարավորություն են տալիս ճիշտ ուղիով տանելու նրա գործերի արվեստաբանական քննությունը:

Առանձին-առանձին դիտարկենք այդ երկու տեսնենցների զարգացումը 1920-ական թվականների պեյզաժային ստեղծագործություններում:

Եթե Ս. Առաքելյանի հետուանողական շրջանի նախատվետական երկերը բացառապես հայրենի գյուղի պատկերներ են ներկայացնում, ապա 1920-ական թվականների գործերը, եթե ոչ բոլորը, ապա մեծ մասով կապված են մասնավորապես Երևանի տեսարանների հետ: Դրանց զգալի մասն են կազմում քաղաքային պեյզաժները, որոնցում ներառված են նաև կենցաղային մոտիվներ: Դրանք, ինչպես «Երևանի հին շուկան» և «Ծառան» երկերը, արժեքավոր են ոչ միայն իբրև արվեստի երկեր, այլև որպես արդեն իր նախկին տեսքը կորցրած քաղաքի պատմությունը (մինիմում չափով՝ արտաքին տեսքը) հավերժացնող փաստաթղթեր: Ահա, օրինակ, «Դամիր-բուլաղ» մեծադիր կտավը: Սա երևանյան հին թաղամասերից մեկի տիպիկ պատկերն է ներկայացնում չնայած գեղանկարչական կատարման թերություններին (կտավի որոշ դետալները վերծ չեն ներկվածությունից, չորությունից ու «սևություններից»): Ծուռումուռ, փոշոտ փողոցի երկայնքով անկանոն ձևով դասավորված փայտաշեն ու հողաշեն տները, փողոցի եռուպեռը, աճապարող, զբաղված, տեղ-տեղ վրուցի բռնված մար-





Խցկան

դիկ, բեռնավորված սայլերը և կենդանիները դիտողի առաջ բացում են հետամսաց արևելյան քաղաքի պատկերը, դրա յուրահատուկ կոլորիտը։ Կամ՝ «Բակ Երևանում» կտավը, որ քաղաքային ընդհանուր տեսարանից մեզ տանում է նրա մի անկյունը։ Հողաշեն, տափակ կտորով, անլուսամուտ տաւնը և բաւկը շրջափակված են բարձր պարսպով։ Միջնորդաբառ «ընկալում» ես այդտեղ ապրողները ընտանեկան կյանքի կենցաղավարության, առօրյայի առանձնահատկությունները։ Պատկերի յուրաքանչյուր դետալ հինն է հիշեցնում (բացի, իհարկե, ծառերը)՝ թե՛ տան կողքին ընկած կավե կարասը, թե՛ պատին հենած փայտե վերելակը, որի մոտ նստած կարմիր գլխաշորով տանտիրուինին ճաշ է եփում մեծ պղնձով, թե քաղաքային հին զգեստներով վրուցող տղամարդիկ։

Նմանատիպ պատկերները, էտյուդները բազմաթիվ են Ս. Առաքելյանի 1920-ական թվականների ստեղծագործության մեջ։ Շատերը նկարված են մեծ սիրով ու բարձր կուլտուրայով։ Հենց այդ («Բակ Երևանում») կտավը դրանց շարքին է պատկանում։ Գեղանկարչական նուրբ վարպետությամբ են տրված գարնանային արևի ջերմության զգացողությունը, լուսատվերների անցումներն ու հակադրությունները, առարկաների գծագրական ստրուկտուրան ու գունային ելաչքները։ Մասնավորապես, հաջող են լուծված փարթամորեն ծաղկած ծառերի բացվարդագույն և սպիտակավուն երանգների լծորդում-

ները, տան ու պարսպի դեղնավուն խամր տոների լուսավետ ու ստվերոտ մասերի ներդաշնակումները։ Կտավի ամրապինդ գծանկարն ու գունագրությունը, իրենց սերտ միասնությամբ, երևակում են նաև պատկերված առարկաների հաստատուն կառուցվածքը, պատկերի խորությունն ու տարբեր պլանների հարաբերակցությունը։ Սա գեղանկարչական այն նյութականությունը չէ, որ շատ հեղինակների գործերում դարձել է երկի ստեղծման նպատակն ու հիմնապայմանը։ Հաղորդակից լինելով իմպրեսիոնիզմի գեղանկարչական սկզբունքներին, նա մեծ հնտությամբ կարողանում է նյութականի հենքի վրա բարձրացնել հոգևոր ապրումներ, կենդանի զգացողություններ, ամեն մի առարկայի մեջ դնելով ստացած տպավորությունը, հույզը։

Այստեղ կարևոր է նկատի առնել մի մոմենտ և՝ դիտարկելու համար Ս. Առաքելյանի ստեղծագործության գեղանկարչական կարևոր տենդենցներից մեկի էվոլյուցիան։

— «Բակ Երևանում» կտավը իրացված է «Երևանի հին շուկան» աշխատության գունագրական սկզբունքով և իրմով ցոլացնում է այդ սկզբունքի հետազա վարգացումը՝ չնայած ընդհանուր որակով այնքան ամբողջական, այնքան հմայիչ ու այնքան կատարյալ չէ, որքան «Երևանի հին շուկան»։ Նախ, այստեղ ավելի, քան «Երևանի հին շուկան» գործում, սրվում է դեկորատիվ, գունային մեծ հարթու-

թյունների կիրարկման ֆունկցիան և կիսերանգներին տրվում է օժանդակ դեր: Եվ ապա, «Բակ Երևանում» պատկերում արդեն իր որոշիչ դերը կորցրել է նկարչի նախասովետական երկերում առկա ընդհանուր մոխրավուն գամման (ըստ որում իրադրությունն այնպիսին է, ինչպես կիսերանգային-անցումային, այնպես էլ լոկալ-դեկորատիվ սկզբունքային ելակետներով իրացված գործերում): 1920-ական թվականների առաջին տարիներից սկսած Ս. Առաքելյանի պալիտրան այլևս չունի մոխրավուն այն շղարշը, որ պարուրում էր նրա նախորդ կտավները: Գնալով նկարչի երկերում ավելի ու ավելի են զգացվում արևի պայծառությունը, բնության դեկորատիվ գծերը: Այս իրողությունը (որ, ինչպես նախորդ գլխում ցուց է տրվել, Ս. Առաքելյանի նախասովետական երկերում դրսուրվում էր իբրև ծգտում)՝ պայմանավորված է հետևյալ երկու ազդակներով:

Առաջին: Ապրելով Երևանում՝ որպես արդեն ձեփավորված նկարիչ, Ս. Առաքելյանը չէր կարող փոփոխություն չմտցնել իր պալիտրայում: Չէր կարող, որովհետև նա այն արվեստագետներից չէ, որոնք ուսման տարիներին ձեռք բերած կանոններին են ենթարկում տարբեր երկրների ու վայրերի բնությունը, կլիմայական առանձնահատկությունները: Նա օժտված էր բնության երևույթների ու յուրահատկությունների նուրբ զգացողությամբ: Այդ են վկայում նրա ստեղծագործությունները, որոնցից յուրաքանչյուրը

հարուցում է առանձնակի հմայք՝ տիպականի իր անկրկնելի դրսեորմամբ և իմաստավորմամբ։ Խոկ թե ինչու նա միանգամից շրջադարձ չկատարեց մոխրավուն երանգներից դեպի բազմագույն հնչեղ տոները, ինքնին հասկանալի է։ Խնկական ստեղծագործությունը որպես մարդկային հույզերի թարգման մարմնավորող ոչ ամեն մի արվեստագետի համար հեշտ է կտրականապես ոճական տվյալ հիմունքները փոխարինել այլ հիմունքներով։

Երկրորդ։ Ս. Առաքելյանի հետ կողք-կողքի ստեղծագործում էր այնպիսի մի նկարիչ, ինչպիսին Մ. Սարյանն է, որ դեռ 1910-ական թվականներին տվել էր արտացոլման իր նոր սկզբունքը։ Ս. Առաքելյանը (և ոչ միայն նա) կիրառեց այդ սկզբունքի որոշ կողմերը։ Խոսքը այստեղ սիստեմի պովիտիվ կրկնության մասին չէ։ Վառ անհատականության տեր, սեփական լեզուն ունեցող նկարչի համար Մ. Սարյանի արվեստը ուղեցուց ճանապարհ եղավ, որով նա ընթացավ իր յուրահատուկ քայլերով՝ պահպանելով սեփական ոճը։ Մ. Սարյանի արվեստը այն կռվանն էր նրա համար, որով փորձեց ու հաստատեց իր որոնումների ճշմարտացիությունը։

Ահա սրանք են այն երկու ապդակները, որոնք պատվանդան հանդիսացան նրա նոր պրատումների իրացման համար. այդ պատվանդանի վրա հենվելով նա ստեղծեց նորատիպ աշխատություններ։

1920-ական թվականներին նա տվեց տարվա

տարբեր եղանակներին, օրվա տարբեր ժամերին կերտված պելլաժների մի շարք, որը մնում է հմայիչ, խոր, գեղեցիկ՝ ակադեմիական ամենասառը, ամենամանրակրկիտ ու խստապահանջ մոտեցման դեպքում անգամ: Դիտենք կտավների մի խումբ: Առա «Զորագյուղ» գողտրիկ էտյուդը: Արևի պայծառ ճառագայթներով է ողղողված ողջ տեսարանը: Գետի կապուլո, վրնգուն ջրերը, նրա վրա թեքված լացող, փոքրինչ դեղնավուն ուժին, սրան ֆոն ծառայող բլրի հողագույնը, առաջին պլանի գորշավուն պատնեշը և վերջին պլանի դեղնա-սպիտակավուն, բաց վարդագույն երանգներով զառիթափը, ջինջ երկնքի բաց կապույտը իրար են հաջորդում ապշեցուցիչ ներդաշնակությամբ՝ մարմնավորելով կեսօրյա անդորրը: Պատկերը լի է օդով, որի մաքրությունից գուներանգները զգայիլում են իրենց ողջ պարզությամբ ու երածշտականությամբ: «Զորագյուղ» հարուցում է հանդարտ ու լիրիկական մի տրամադրություն, լիապես հաղորդակից անում հեղինակի՝ բնությունից ստացած առաջին թարմ տպավորությունը, դիտողի երևակայությունը, հուլաշխարհը պարուրում է կյանքի անխօռք գեղեցկությամբ, առօրյա հոգսերից ու մանրութներից պոկելով տանում դեպի բյուրեղյա մաքրությունը, այն ոլորտը, ուր մարդն ինքն իր հետ է ու մտորում է քաղցր, ինտիմ անուրջներ: Մի այլ պատկեր («Աշնանային մոտիվ») — բլրակների արանքով ձգված պուրակը վաղ աշնանը: Երկնքի բաց կապույտի ու

մուգ կանաչա-շագանակավուն բլրի ֆոնի վրա պատկերված ծառերը տեղ-տեղ դեղնել են, մի մասն էլ ստացել մուգ մանուշակա-կարմրավուն երանգ: Զգացվում է մթնոլորտի խոնավությունը: Իրիկնամուտի թանձր մշուշը պարուել է ամեն ինչ: Բնությունը մտնում է իր կյանքի նոր շրջանը: Այս աստիվը իր ավելի խոր մարմնավորումն է գտել «Ծառուղի» էտյուլում: Դարձյալ աշնանային գողտրիկ տեսարան է՝ մենության մի կենդանի արտահայտություն: Այս-տեղ նորից հնչում են նկարչի նախասովետական մի շարք գործերի էլեգիկ մեղեդիները: Ծառուղին լուր է: Օդի կարնավուն շղարշում մեկը մյուսին են հաջորդում կարմիր, դեղին, կանաչ, մուգ մանուշակագույն երանգներով պարուրված ծառերը: Կոտավի ընդհանուր տպավորությունը նորից հանդարտ է, նույն անդորրն է, ինչ «Զորագլուղ» աշխատության մեջ, բայց այս անգամ տիրամած, թախծոտ: Սակայն աշնանային այդ թախծի ավելի անմիջական ու հոգեպարար մեղեդիները ներառում է Ս. Առաքելյանի «Զանգվի ափ» փորբադիր գլուխգործոցը: Պատկերը ներկայացնում է խոր աշխանային տեսարան: Տերևաթափի վերջին շրջանն է: Ծառերի մեծ մասը մերկացել է: Տեղ-տեղ միայն դեռ կառչած են մնացել դեղին-մանուշակավուն ու կարմրավուն տերևներ, որոնք փայլուն ծևով ներդաշնակում են ծառերի կապտագույն բներին, կապտա-մանուշակագույն գետնին ու Զանգվի սպիտակ ալիքներով խայտացող մոխրա-կապույտ ջրե-


թի տոներին: Ամբողջ տեսարանը հագեցած է կապտասպիտակավուն մշուշոտ օդով: Նրբերանգներ, անսահման, աննկարագրելի՝ նրբերանգներ: Նկարիչը գեղանկարչության լեզվով հասել է շոպենյան, տերյանական նրբագեղության:

Հիշյալ պատկերներից յուրաքանչյուրը հստակորեն և ամենայն ճշմարտացիությամբ ներկայացնում է, ինչպես տեսանք, աշնան տևողության որոշակի էտապը՝ կոնկրետ իր առանձնահատկություններով: Միօրինակության, կրկնողության ոչ մի հետք: Դրա ապացուցնեմ նաև այն, որ «Էլեգիկ» հիշյալ երկերի ստեղծման շրջանում արվեստագետը կերտել է լուսապայծառ հնչեղությամբ հագեցած աշնանային մոտիվներով աշխատություններ: Բայց այս մասին քիչ հետո:


«Խջեան» և «Երեանի հին շովկան» ստեղծագործություններից հետո եկող վերը բերված բոլոր գործերը կիսերանգային մեթոդով իրացված երկեր են, որոնք օժտված են գունային բազմազանությամբ ու նրբին անցումներով: Դրանց հետ միաժամանակ նկարչի կողմից կերտվել են նաև դեկորատիվ ու կիսերանգային տարրերի լծորդումներ ունեցող աշխատություններ: Ապացուց կարող է ծառայել «Զանգուն Գոմածորի մոտ» հիասքանչ պեյզաժը: Կտավի ողջ մակերեսը պահված է կանաչ գույնի փոփոխակների կոլորիտային հիմքի վրա: Ալպիական կանաչապատ բլուրների երանգային առանձին կտորները միա-

հյուսվում են երբեմն տոնային համահնչեղությամբ, երբեմն էլ կիսերանգների թրթիռներով։ Գեղանկարչական այդ եղանակով նկարիչը հմտությամբ տվել է գարնանային թափիշը։ Զգացվում է բլուրների ու հարթությունների ռելեֆ անցումների պոետիկ դինամիկան։ Պատկերը միաժամանակ հարուցում է և լիրիկական քնքուշ զգացումներ և բացահայտում բնության վեհաջունչ հմայքը։ Ըստ որում զարմանալի վարպետությամբ է տրված արևի առկայությունը, բայց չայրող առկայությունը։ Ակամայից հիշում ես մեր պեյզաժային գեղանկարչության մի այլ ականավոր վարպետի՝ Ե. Թադևոսյանի գողտրիկ էտյուդները, որոնք բնությունը պատկերում են արևային, բայց ոչ այրող պայմաններում։ Այս մոմենտը ևս ցուց է տակիս, թե որքան նրբազգաց է Մ. Առաքելյանը բնության բազմազան հատկանիշները, ռելեֆային, կիմայական տարրեր վայրերը վերաբարձրելիս։ Ինչ նմանություն, օրինակ, «Զանգուն Գոմածորի մոտ» պատկերի և գունագրական նույն սկզբունքով մարմնավորված և նույնան բարձրարվեստ «Աշուն։ Մի անկյուն Երևանում» աշխատության միջև, բացի այն, որ այդ երկու գործն էլ իրենց վրա կրում են Առաքելյան-վարպետի ստեղծագործական ինքնատիպության խոր կնիքը, ոչ մի նմանություն։

* Մանրամասն տե՛ս Ռ. Դրամբյան, «Եղիշե Թադևոսյան Երևան, 1957։



ADALBERT



Զանգվիր ափը

«Աշուն: Մի անկյուն Երևանում» գործում արևի կիպիչ ճառագայթների տակ ուղղակի բոցավառվում են կարմիր, կանաչ, վարդագույն, դեղին, նարնջագույն, մանուշակագույն զգեստներով վարդարուն ծառերը: Նույնիսկ հնառած տան դեղնասպիտակավուն խամր պատերը այրվում են արևի շողերից: Բազմագան գույների այդ խաղը ավելի ևս ինտենսիվ է հընչում հակադրվելով երկնքի անթափանց, միատարր լեղակին: Թվում է, թե դադարել է շարժումը: Այդ լոռությունը և անդորրը չեն խախտում ոչ առաջին պլանում աճապարող սպիտակ փաթթոցավոր կինը և ոչ էլ արագընթաց թափով կտավի մակերեսին դրոշմված հյութեղ վրձնաթետերն ու շարժուն, ամիանգիստ գունաշտրիխները: Այդ լոռությունը չեն խախտում, անգամ, լուսի ու ստվերների արագ, կտրուկ փոփոխությունները: Ընդամին, թե՛ լուսավոր, թե՛ ստվերոտ տպարածանասերը երկակիլած են իբրև գունային տարերանգ, «ինքնակա» որակներ: Դիտողի տեսողությունը, ասես, թռիչքներ գործելով, անընդհատ շարժվում է, ինչպես գույնից-գույն (կարմրից կանաչը, կապույտից դեղինը և այլն), այնպես էլ լուսից ստվեր (բաց դեղինից մուգ մանուշակագույնը, բաց նարնջագույնից մուգ կապտա-վարդագույնը և այլն): Բնությունը, թվում է, հնապանդվել է միջօրէի արևի բոցավառող, բայց և սաստող ու համրեցնող ուժին: Հարավային կեսօրյա շոգը այստեղ ավելի սուր է զգացվում, քան «Երևանի

հին շուկան» գործում, Էլ չենք համեմատում նկարը՝ նախասովետական աշխատություններին:

Աշխանային մի ուրիշ պատկեր («Ոսկի աշուն») արտացոլում է տարվա «այդ եղանակի այլ պահը» և հարուցում այլ տրամադրություն: Այստեղ արդեն լիակատար փթթող աշուն է: Բոլոր ծառերը փոխել են գույները: Բացակայում են «Աշուն: Մի անկյուն Երեւանում» գործում առկա կանաչ տոները: Պատկերով մեկ իշխում են նարնջագույն, ոսկեգույն, դեղնագույն, հյութեղ ու մաքուր երանգների ներդաշնակությունները, որոնք, հակադրվելով ու միաժամանակ միահյուսվելով արագահոս գետի կապուտ, կապուտ վրնգուն ջրերին, դիտողի հոգին լցնում են պայծառ ներշնչանքի մեղեղիներով: Այստեղ, հակառակ «Աշուն: Մի անկյուն Երևանում» կտավի տապին, զգացվում է աշնան զովությունը, հաճելի, թերև զովությունը: «Ծառուղին այգում», «Իմ բակը գյուղում», «Սևանի ափերը: Ժայռեր» ինչպես և «Աղբյուրի մոտ», «Զանգուի ափը» ստեղծագործություններում ինտիմ Առաքելյանը այստեղ հրճվում է պատանեկան եռանդով: Աշխատության էմոցիոնալ աշխարհը անսահման հարուստ է նրբերանգներով, խորը՝ իր կենսափրությամբ: Երևակայության ազատ խաղն ու կյանքի հրապույրն է մարմնավորում պատկերը՝ իրացված երանգային նըրբին կիսատոների ու լիովի հագեցած գույների փայլուն ներդաշնակությամբ:

Գունագրական այդ բնույթի երկերի շարքում յու-

բահատուկ տեղ ունի «Երևանի շրջակայքը» աշխանային պատկերը: Ըստ բովանդակության, հարուցած խոհերի ու տրամադրության լայնության, դա ավելի ներհուն ստեղծագործություն է: Տարածական ընդգրկմամբ «Երևանի շրջակայքը» ավելի լայն է: Երկարաձիգ կտափի մի նեղ շերտ վրադեցնում է բաց կապույտ երկինքը: Դրան հաջորդում են ձյունածածկ լեռներ: Ապա զախս են մուգ կապտա-մանուշակավուն մերկ սարերը՝ իրենց գեղեցիկ բլուրներով, ստվերոտ ու լուսավոր ժապավեններով: Այնուհետև, աշխանային թեթև մշուշի, թափանցիկ շղարչի ոլորտում ձբգվում է գյուղական պատկերը՝ իր տներով ու սլացիկ բարդիներով: Առաջին ալլանում այգիներն են՝ շրջափակված հողաշեն պատնեշով: Ծառերը դեղին են հագել և զատորոշվում են իրենց հնչեղությամբ՝ համեմատաբար մուգ շրջապատում: Այդ բոլորը նկարիչը պատկերել է անանց սիրով ու հոգատարությամբ, խորապես արտիստական հիացմունքով ու ոգևորությամբ: Գեղանկարչական աննման հմայքով է շնչում կտափի յուրաքանչյուր դետալը, երանգային յուրաքանչյուր հակադրությունն ու համադրությունը: Ծաշակի կատարյալ տակտով, գծապլաստիկայի ավարտուն շեշտավորումները հասցված են իսկական, բարձր գեղարվեստական մշակվածության՝ վերծ չորություններից, օբյեկտիվիզմից, գռեհիկ նյութականացումից: Դրա շնորհիվ ողջ տեսարանը լի է էմոցիոնալ անհատակ ելևէջներով, առինքնող հմայքով:

Նախասովետական «Գյուղում» պեյզաժից ավելի շեշտված ձևով, այստեղ Ս. Առաքելյանը ընդգծել է մարդուն, միջավայրի և այդ միջավայրում գործող մարդու միասնության գաղափարը: Այդ բանին նա հասել է գյուղական տեսարանի, այգում աշխատողների և այլ մանր ֆիգուրների ներկայացմամբ: Չնայած վերջիններս փոքր ակնարկներ են, բայց հաստատում են ու նշանակալից: Առհասարակ, կտավի ամբողջ մթնոլորտի ընկալումը առաջին պլան է բերում մարդու ակտիվության առկայությունը:

Նման հիասքանչ աշխատություն է նաև «Դարնանը այգում» փոքրադիր էտյուդը, ուր ցոլանում է բնության զարթոնքի հոգեպարար, կենսահաստատ հմայքը, կյանքի քաղցրության, գեղեցիկի պոետական, գեղարվեստական իդեալը: Այստեղ տեղին է հիշել «Զանգվի ափը» աշխատությունը: Ծաղկեփթիթ գարուն («Գարնանը այգում») և մելանխոլիկ, ուշ աշուն («Զանգվի ափը»): Բնության կյանքի երկու տարրեր, որոշ հմաստով հակադիր շրջաններ: Եվ երկու դեպքում էլ պեյզաժի վարպետը համոզում, ապրեցնում է դիտողին: «Գարնանը այգում» կտավի մակերեսը բռնում են ծաղկած ծառեր, ապա մուգ գետին և այդ միջավայրում աշխատող մի մարդ: Առաջին տպագորությունը այսպիսին է. գունա-լուսային «հակադիր» մեծ կտորների դեկորատիվ տեղաբաշխումներ: Սակայն պատկերի ընկալման պրոցեսում դրանց միահյուսվում են նաև ծաղիկների հոծ մասսա-

յում թթռացող բաց վարդագույն կիսերանգներ, վեր-
ջիններիս հետ տեղ-տեղ ձայնակցող կապույտ ու մա-
նուշակագույն տոններ ու հոլի թարճություն արտա-
հայտող այլևայլ կիսերանգների նրբանյուս ելևէցում-
ներ: Ամառային ու աշնանային մոտիվներով աշխա-
տություններում կիրառված հակադրումների ու հա-
մադրումների, տարածական մեծահատված-ընդհա-
նուր ու անցումային ընկալումները այս էտյուդում ևս
տրված են օրգանական միասնությամբ: Կտավում
պատկերված առարկաները ռելեֆ ծևով զատո-
րոշվում են տեսադաշտում՝ իբրև ծավալային զանգ-
վածներ,— ամբողջական սիստեմի մեջ դրսերպելով,
միաժամանակ, որպես պատկերի գծային, գունագրա-
կան, հեռանկարային ռիթմի անընդհատ ու բնականոն
շարժումը պայմանավորող անհրաժեշտ օղակներ:
Գեղանկարչական կատարման տարբեր ասպեկտնե-
րը ինչպես նախորդ, այնպես էլ «Գարնանը այգում»
էտյուդում հասցված են անքակտելի միասնության,
որը հիմք է ծառայում նկարչի՝ ոճի ամբողջական ու
բարձրարվեստ դրսերման:

Մինչ այժմ խոսեցինք Ս. Առաքելյանի կիսերան-
գային և կիսերանգների ու դեկորատիվ տարբերի
վուգորդման սկզբունքներով կերտված ստեղծագոր-
ծությունների մասին՝ աշխատելով ցուց տալ, որ այդ
երկու սկզբունքն էլ նկարչի արվեստում ստացել են
հավասարապոր մարմնավորում, արտահայտել բնու-

թյան որոշ առանձնահատկություններն ու հեղինակի
մտորումները:


Անդրադառնանք ոճական «զուտ» դեկորատիվ
ելակետով կառուցված նրա աշխատություններին,
որոնք կերտվել են ստեղծագործական նույն էտա-
պում, ինչ «Զորագյուղը» կամ «Աշուն: Մի անկյուն
Երևանում» երկը:

«Կալը գյուղում»,— այսպես է կոչվում Ս. Առա-
քելլանի ոչ փայլուն երկերի շարքը դասվող, բայց
գեղանկարչական այդ նոր սկզբունքը բացահայտո-
րեն երևակող փոքրադիր էտյուդներից մեկը: Կտավի
մակերեսի փոքր հատվածները ներկայացնում են
լիապես հարթ, կողք-կողքի դրված մակերեսներ,
որոնց գունային միատարր երանգը չի մտնում կող-
քերի գունահատվածների սահմանը: Ստացվում է
«գորգանման» դեկորատիվ գունային մի կոմպոզի-
ցիա՝ պարզորշ կոնստրուկցիայով, գծային կտրուկ
ռիթմերով: Մոխրա-կապուավուն երկինք, մուգ մանու-
շակավուն բլուր, բաց վարդա-մանուշակագույն մի այլ
բլուր, որի մակերեսին տեղ-տեղ (դարձյալ լոկալ-դե-
կորատիվ որոշակիությամբ) երևում են հնձած արտե-
րի խամր-նարնջագույն կտորները, դրանց է հաջոր-
դում դեղնա-սպիտակավուն կալը: Հինգ անելեսէջ գու-
նահատվածներ, որոնց ոլորտում ֆունկցիա չունի լու-
սաստվերը: Առաջին պլանում է դրված գույնի լոկա-
լության, հնչեղության գաղափարը: Այստեղ, հակա-
ռակ «Ցորեն են ծեծում», «Գյուղում», «Սևանի ափե-

թը: «Ժայռեր», «Զորագյուղ», «Զանգվի ափը» և այլ գործերի կոլորիտային բնույթին, տվյալ գույնի աստիճանական, լուսատվերային մզացումը (կամ հակառակը) չէ, որ մարմնավորում է պատկերի էմոցիոնալ ներդաշնակությունն ու ամբողջությունը: «Կալը գյուղում» աշխատության ներդաշնակությունը հանգչում է լոկալ գույների համարնչության, տարբեր երանգների ինտենսիվության այնպիսի համապատասխանության վրա, որը ստեղծում է ոչ միայն գունային հավաք ընդհանրության տպավորությունը, այլև գեղարվեստորեն դրսւորում առարկաների գծապլաստիկան՝ առանց ենթակա լինելու լույսի ու ստվերի կոմպոզիցիոն հնարանքներին: Անմիջապես հիշում ես Մ. Սարյանի 1910—1920-ական թվականների միշտը ստեղծագործությունները՝ թռուցիկ համեմատությամբ անգամ համովվելով, որ «Կալը գյուղում» աշխատությունը Ս. Առաքելյանը կերտել է իր արվեստակցի գեղանկարչական որոշ սկզբունքների ստեղծագործական յուրացման հողի վրա: Ավելորդ է այստեղ «Կալը գյուղում» երկը համեմատել Մ. Սարյանի որևէ գործի հետ: Այդ էտյուտի և դրան նախորդող գործերի գեղանկարչական ասպեկտի վերը տված նկարագիրը ինքնին ցույց է տալիս, թե որքանով է սույն ասպեկտը առնչվում Մ. Սարյանի բազմաթիվ երկերի սկզբունքին: Կարևոր այն է, որ Ս. Առաքելյանը ինչպես ժամանակին Կ. Կորովինի, Ա. Արխի-

պովի, այնպես էլ այժմ Մ. Սարյանի արվեստին մոտենում է ստեղծագործաբար:

Դրա փայլուն ապացույցն է հետևյալը: Մ. Սարյանի՝ տվյալ դեպքում 1910—1920-ական թվականների ամենավիոր կտավն անգամ օժտված է էպոսային մոնումենտալությամբ, հերոսական ահռելի պաթոսով, երևակայության անզուսպ ալացքով ու վեհաշջունչ պարետիզմով: Նրանում չեք տեսնի լիրիկական, կամերային տրամադրություններ: Այլ է Ս. Առաքելյանի «Կալը գյուղում» հտյուղը, այլ է, ինչպես առաջիկայում պիտի տեսնենք, գեղանկարչական հիշյալ ասպեկտով կատարված նրա մյուս աշխատությունների էմոցիոնալ, հոգեբանական բնույթը, կերպարային ընդհանուր էությունը: Այդ բոլոր կտավներում մոնումենտալ մումենտները, կրթերն ու հիացումները, էպիկական պատկերացումները պահված են անհամեմատ ավելի զուսպ սահմաններում, տրված են մեղմ շնչավորումներով և միշտ էլ զուգակցված են ինտիմ-լիրիկական խոհերի ու զգացմունքների հետ: Պատկերման տեխնիկական որակներն էլ տարբեր են երկու նկարիչների մոտ: Գծանկարը Մ. Սարյանի գունագրական աշխատություններում օժտված է ոիթմային կտրուկ, անսպասելի շրջադարձերով ու ընդհատումներով, շարժման կոր, ուղիղ, զիգզագ ձեւերի զուգորդման հանդգնությամբ, մոլեռանդ, անսովոր ընդգծվածությամբ: Բանն այնտեղ է հասնում, որ նրա մի շարք գեղանկարչական աշխա-





Աշուն

տություններում գիծն ու գուներանգը հանդէս են գալիս կողք-կողքի՝ հայեցման հավասար իմպուլսով։ Գունային գամմա և գրաֆիկ ընդգծվածությամբ գիծ։ Այդ բանը գոյություն չունի Ս. Առաքելյանի գեղանկարչական ոչ մի ստեղծագործության մեջ՝ եթե հաշվի չառնենք փոքր, շտրիխային բնույթի և այն էլ գուներանգների մեջ պարուրված, ավելի ճիշտ՝ գունչրանգների ոլորտում մեղմացված գունագծերը։ Ապա՝ գծանկարը նրա մոտ անհամեմատ ավելի հանդարտ ոլիք ունի։ Գունի ինտենսիվության աստիճաններն ել տարբեր են Մ. Սարյանի և Ս. Առաքելյանի ստեղծագործություններում։ Որքան էլ պայծառ ու այրվող, Ս. Առաքելյանի գուները երբեք էլ չունեն սարյանական հրաբորքոք երանգների խոլական թռիչքն ու սահմաններ չճանաչող հնչեղությունը։ Ս. Առաքելյանի երկերում, գույնը՝ ևս, համեմատած Մ. Սարյանի գույներին, մեղմ պայծառությամբ է օժտված։ Ընդգծենք, որ, իբրև այդպիսին, Ս. Առաքելյանի գեղանկարչական մտածողությունը տվել է իսկական, բարձր արվեստի երկեր։ Չափազանց կարևոր մի իրողություն է այս, և կարևոր տարբերություններ են հիշյալները, որ չեն կարող լինել մեխանիկական կրկնության դեպքում։

Գուցե հարկ չլիներ այսքան մանրամասն անդրադառնալ Սարյան-Առաքելյան խնդրին, եթե, զուտ ակադեմիական հետաքրքրություն (ընդհանրապես ավելցության հարցերը դիտարկելու առումով) լինե-

կային հույզերի ու ապրումների թարգման կիրառելու բարձր տաղանդով, կոլորիտային նուրբ զգացողությամբ օժտված արվեստագետ:

Ս. Առաքելյանը սովետահայ արվեստի սահման-ները մտավ արդեն ունենալով երեք գործ («Յորեն են ծեծում», «Գյուղում», «Յորեն են չորացնում»), որոնք պետք է դասել ողջ հայ գեղանկարչության լավագույն նմուշների շարքը:



լուց բացի, դա կարևոր չիներ հենց, մեր կարծիքով, Ս. Առաքելյանի ստեղծագործական անհատականությունը, ինքնատիպությունը բացահայտելու տեսակետից:

Այդ ինքնատիպությամբ է ահա, առաջին հերթին, որ մեզ համար նշանակալից է դառնում «Կալը գյուղում» աշխատությունը:

«Կալը գյուղում» էտյուդից ավելի բարձրորակ աշխատություններ են Ս. Առաքելյանի՝ Սևանում կատարած մի շարք երկերը: «Սևանա վանքը» ստեղծագործությունը նկարչի լավագույն գործերի թվին է պատկանում: Արտիստական խոր շնչով, տեղի բնակլիմայական յուրահատկությունների նուրբ ընկալմամբ այս գործը ամբողջ հայ կերպարվեստում Սևանը պատկերող լավագույն աշխատությունների կողքին իր արժանի տեղն է գրավում: Սևանի հայելանման, կապույտ ջրերի, խստաշունչ լեռնային ռելեֆի և նույնքան խստապարզ վանքերի կոլորիտային լակոնիկ զգացումը իր մեջ կենդանի ձևով ներառում է պատմական Հայաստանին յուրահատուկ որոշ գծեր, խոհեր ու տրամադրություններ: Այստեղ ակնհայտ պարզորոշությամբ նկատելի է մեր կերպարվեստում Վ. Սուրենյանցի կողմից որոշադրված, այսպես կոչված, պատմական պեյզաժի («Հոփիսիմեի վանքը») գիծը՝ գեղանկարչության զարգացման նոր էտապում և ստեղծագործական այլ խառնվածքի տեր նկարչի արվեստում: Վ. Սուրենյանցի «Հոփիսիմեի վանքը»

պատմա-ողբերգական իմաստավորում ունի ըստ էության, որ պայմանավորված էր թուրք եղեռնագործների կազմակերպած հայկական կոտորածներից նկարչի ստացած հոգեցունց տպավորություններով։ Այդ գործում, մի կողմից, «Հռիփսիմեն» բովանդակում է հայ ժողովրդի տարաբախտ ճակատագրի ողբը, իսկ մյուս կողմից, դրա հետ միասնաբար, մարմնավորվում որպես ժողովրդի ուժի, անմահության, ընդհանրապես մարդկային հանճարի, գեղեցիկ ձգտումների ու իդեալների իմաստավորման խորհրդանիշ։

Ս. Առաքելյանի «Սևանա վանքը» չունի այդ դրամատիկական շեշտվածությունը և, ըստ էության, տրամադրությունների նման բարդ կոմպլեքս չի ներկայացնում։ Եթե Վ. Սուլենյանցը, հիմնականում, «Հռիփսիմեն» մեկնաբանել է, կարծես, որպես իր ժամանակի լյանքի հործանուտում ակտիվ ֆունկցիա, հաստատական դեր ունեցող երևույթ (որից ելնելով էլ նրա միջոցով արձագանքել է ժամանակի կոնկրետ պատմական իրողությանը), ապա Ս. Առաքելյանը, այդ տեսակետից, Սևանի վանքին նայել է իբրև անցյալի վերհուուշ։ Այդ հիմքի վրա էլ նկարվող օրիեկտը նրա կողմից մարմնավորվել է որպես զուտ պատմաճանաչողական, գեղարվեստական արժեք։ Հակոնակ Ա. Ֆերվաճյանի նկարչական չոր դոկումենտալիզմի և Սևանի վանքը կամ ըընդհանրապես ճարտարապետական կոթողները վերարտադրող մի շարք այլ նկարիչների գործերի քաղցր սենտիմենտալության,

սալոնայնության, Ս. Առաքելյանը Սևանի վանքը տվել է պոետական բարձր մեկնաբանմամբ: Տաղանդավոր գեղանկարիչը, այս առումով, ընթանում է Վ. Սուրենյանցի գծած ճշմարտացի ուղիով՝ հանդես գալով իբրև գունագրական այլ մտածողությամբ օժտված արվեստագետ:

Դառնանք, այժմ, վերը առաջադրած խնդրին:

Սևանի կղզու խամր-կարմրավուն գմբեթներով ու մուգ տոներով վանքերը գրեթե սիլուետային պարզությամբ գծագրվում են մոխրավուն՝ երկնքի, լճի բաց գույնի ու շրջակա ցամաքի խամր-դեղնավուն երանգների միջավայրում: Մի ընդհանուր հայացքով կտավը ընկալելիս երևան են գալիս «Կալը գյուղում» էտյուդի որոշ գծերը: Նույն հնչեղ պարզությունն է, որ ընկած է գործի գունագրական մտածողության հիմքում, բայց, կոնտրաստների ո՞չ այնքան սրությամբ, ինչը հատուկ է «Կալը գյուղում» ստեղծագործության գունագրությանը: Պատկերի ընդհանուր հայացքով ընկալման պրոցեսին անմիջապես հաջորդող մոմենտում երևան են գալիս կիսերանգները թե՛ երկընքի, թե՛ ցամաքի, թե՛ վանքերի գունային ոլորտներում: Բայց լճի մակերեսը գրեթե վերծ է դրանցից: Տրված են կապույտ, սպիտակ լոկալ տարածամասեր, որոնք, դարձյալ, համահնչեղությամբ ներդաշնակվելով, ստեղծում են լճի մաքուր ջրերի էմոցիոնալ տպավորությունը: Գույնի լոկալ, «դեկորատիվ» մտածողությունը, եթե կարելի է ասել, ավելի «ավտոնոմ»

տեսքով է Երևակվում՝ «Տեսարան Սևանա կղզուց» աշխատության մեջ։ Այստեղ և՝ բաց մոխրակապտավուն Երկինքը, և՝ հոհրիվոնում սիլուետային ռիթմով գծագրվող մանուշակավուն լեռները, և՝ սպիտակ գոտիներ ունեցող լճի կապուտ ջուրը, և՝ լճափի դեղնաշագանակագույնը հանդես են բերված իրենց ընդհանրացված, լոկալ տեսքով։ Գունային զոնաները հայեցվում են որպես «հակադիր», բայց ոչ ճշգող, ոչ աններդաշնակ էֆեկտներ։ Դրանք տրված են այսպիսի հաջորդականությամբ, ինտենսիվության այնպիսի համամասն սահմաններում, որ ընդհանուր շղթայի մեջ կատարում են օրգանական, միահյուսող ֆունկցիա։ Այսպիսով, կտավը դառնում է կենդանի, հավասարակշռված մաքողջականություն, որը ներառում է բնության լիրո-էպիկական հմայքը, հարուցում կենսահաստատ զգացմունքներ։

Իսկ «Տեսարան Սևանից» կտավը իր գունագրական ասպեկտով նույնական է՝ «Կալը գյուղում» վերոհիշյալ էտյուդին և իբր ավելի բարձրորակ ստեղծագործություն՝ հանդիսանում է այդ ասպեկտի ամենալիիրավ, ամենաամբողջական ու ցայտուն դրսերում։ Այս աշխատության բաց կապտավուն Երկինքը, բաց վարդա-մանուշակագույն Գեղամա լեռնապարը և սպիտակ լոկալ շերտեր ունեցող վրնգուն կապուտ ջուրը տեղաբաշխված են իբրև հակադրամիասնություններ։ Գունային կոմպոզիցիան դարձյալ «գորգանման» է, պարզ, կտրուկ իր գծագրական ռիթմով, ար-

տահայտիչ ու անմիջական: Դարձյալ պգացվում է Մ. Սարյանի բարերար ազդեցությունը և Ա. Առաքելյանի բացահայտ ինքնատիպությունը, կյանքը դիտելու և արտացոլելու յուրօրինակ ասպեկտը, ստեղծագործող-սուբյեկտի իր լիրո-էպիկական մեղմ, պոետական ներաշխարհը: Կտավը պարզորոշ անդրադարձնում է հեղինակի՝ նկարվող օբյեկտի հանդեպ տածած անսահման սերը, նրա հոգում արթնացած նրբին թրթիռները:

Մենք դիտարկեցինք Ա. Առաքելյանի արվեստում 1920-ական թվականներին առկա գունագրական երեք ասպեկտ՝ դրսևորված էմոցիոնալ-հոգեբանական տարրեր բնույթի, նոր երանգավորումներ ունեցող աշխատություններում: Զանացինք ցույց տալ նաև, որ այդ աշխատություններում, նկարչի նախատվետական լավագույն երկերի նման, օրգանական միասնության, հավասարապոր կատարելության են հասցըված գծապլաստիկան ու գունագրությունը՝ վերջինիս ելակետային հիմքի վրա: Տեսնենք ստորև, թե ինչ արդյունքի է հասել ստեղծագործական այդ նույն շըրջանում Առաքելյանը գույն-լույս խնդրի մարզում կատարած պրայտումների մեջ:


Բանն այն է, որ իր մի շարք ստեղծագործություններում Առաքելյանը դիտվող առարկայի թե՛ լուսավոր, թե՛ ստվերոտ տեղերում, ամենուր որոնում է գույնը: Այդ է պատճառը, որ նրա երկերում տվյալ առարկաների լուսավոր ու ստվերոտ մասերը ներկայաց-

նում են ոչ թե գույնի աստիճանական (մուգից դեպի բացը կամ հակառակը) ընթացքի մոմենտները, այլ գունային տարբեր որակները, որոնք տրված են էմոցիոնալ այնպիսի հարաբերություններով ու ինտենսիվության սահմանների այնպիսի լծորդումներով, որ ոելեֆությամբ ստեղծում են կորությունների, հարթությունների, տարբեր պլանների, մակերեսների պոետիկ տպավորությունները։ Հստ որում, Ս. Առաքելյանի գեղանկարչական արվեստում (չհաշված առանձին անհաջող դեպքերը) չկան մթություններ ու լուսավորություններ (=սևություններ ու սպիտակություններ), այլ կան սառը և տաք, հնչեղ ու խամր (=օչ կեղտոտ), փայլուն ու փայլատ, միշտ յուրորակ որոշակի գույնների սքանչելի հարաբերություններ։

Այս պարագայում, բնականաբար, լուս-ստվերը կլասիկ ռեալիզմի իմաստով վերցրած գրեթե կորցնում է իր ֆունկցիան՝ տեղը վիշելով գույն-լուս խնդրին։ Դառնանք այժմ այդ հարցին՝ դիտելով երկու տեսակետից։ Նախ, համեմատելով (թեկուզ թռուցիկ մի հայացքով) 1920-ական թվականների աշխատությունները նախասովետական գործերին, նկատում ենք, որ նկարչի պալիտրան լիապես ազատագրվել է մոխրավուն գամմայից։ Նրա գործերը դարձել են ավելի հնչեղ և ավելի համովիչ են վերարտացողում արևային պայծառությունը։ Մի առիթով, արդեն, ցուց ենք տվել այդ փոփոխության ազդակները, մնում է նշել, միաժամանակ, որ այդ իրո-

դուրյունը նաև դյուրացրել է նկարչի նոգևոր աշխարհում հանդես եկած նոր տրամադրությունների ու մտորումների կոնկրետ իրացումը։ Համեմատենք, ապա, հիշյալ երեք ասպեկտներով, 1920-ական թվականներին կերտված երեք գործ և նրանցից մեկնումեկը նախասովետական որևէ ստեղծագործության՝ խնդիրը ավելի պարզ ու հեշտությամբ լուծելու համար։

Վերցնենք կիսերանգային սկզբունքի իրացման փայլուն նմուշներից մեկը՝ «Չորագյուղ» Էտյուդը, դեկորատիվ-կիսերանգային կոլորիտով «Աշուն։ Մի անկյուն Երևանում» փոքրադիր պատկերը և «Տեսարան Սևանից» կտավը։ Երեքն էլ վերծ են «Սևանի ափերը։ Ժայռեր», «Յորեն են ծեծում», «Գյուղում» և նախասովետական մյուս գործերի մոխրագույն գամմայից, երեքն էլ պայծառ են հավասարապես, բայց պայծառ են յուրովի։ Առաջին երկուսում («Չորագյուղ», «Աշուն։ Մի անկյուն Երևանում») և նախասովետական հիշյալ գործերում լույսը մթնոլորտի հետ օրգանապես կուգորդված ձևով հանդես է գալիս կտավի ոլորտում՝ ապահովելով նրա օդային խորությունը։ Օդի և լույսի զգացողությունը տրված է հալվող, կտավի բոլոր գուներանգներին ու վերջիններիս ելաչիքներին ձայնակցող, անսահմանորեն թափանցիկ տոների նրբագեղ միահյուսումներով։ Այս միջոցով նկարիչը անմիջականորեն դիտողին զգալ է տալիս, թե լույսը պատկերվող օբյեկտի համար «դրսեկ»





Երևանի շրջակալիք

է, որ թափանցելով օդի ոլորտը, պարուրում է ամեն ինչ, նոր շունչ տալիս նրան: Մի փոքր ավելի ուշիմ դիտողը չի կարող չնկատել այս և դրա արմատները չտեսնել իմայրեսիոնիզմի գունագրության սկզբունքների հողում: Դժվար չէ տեսնել, օրինակ, Ս. Առաքելյանի «Չորագյուղ» կտյուղի և Կ. Մոնեի, ասենք, «Ժայռեր Բել-Իլում» կտավի միջև եղած ընդհանրությունը: Երկու դեպքում էլ ընկալվում ու վարպետորեն կտավին են հանձնվում բնությունից ստացված առաջին թարմ տպագրությունը՝ խոսքով աննկարագրելի իր նրբություններով ու երաժշտականությամբ: Երկու դեպքում էլ լուսի աղբյուրը դուրս է մեզ շրջապատող բնության սահմաններից: Երկու դեպքում էլ հեղինակները ցուց են տալիս, որ առարկաների մակերեսները լուսավորված են արտաքին աղբյուրից: Բոլորովին այլ, ավելի ճիշտ դրան հակադիր են մյուս՝ դեկորատիվ ասպեկտով իրացված՝ «Տեսարան Սևանից»-ը: Այս կտավում լուսը կարծես՝ ներգո է գույնին: Մ. Սարյանի 1910—1920-ական թվականների երկերի, Հ. Մարիսի դեկորատիվ գործերի նման (ոչ իհարկե նույն ինտենսիվությամբ, ինչպես ասվել է), Ս. Առաքելյանի այդ աշխատության մեջ ասես գույնն ինքն է լուս արձակում, լուսի աղբյուրը, թվում է, հենց ինքը գույնն է: Լուսաղծակում են թե՛ երկնքի բաց կապուտը, թե՛ լեռների բաց վարդա-մանուշակագույնը, թե՛ ջրի հնչեղ կապույտն ու նրա մակերեսին եղած ժապավենների սպիտակը: Գույն-լուս խնդրի շահարկ-

ման մի նոր որակ է այդ Ս. Առաքելյանի արվեստում, ասպեկտ, որի աստիճանական զարգացման նախնական քայլերը նշմարվում են դեռ 1920 թվականին ստեղծված «Յորեն են չորացնում» պատկերում և գնալով շարունակ մեծանում՝ զգալի փոփոխություն մտցնելով նկարչի ողջ ստեղծագործության մեջ:

Զուտ պեյլաժային գործերից զատ, Ս. Առաքելյանի 1920-ական թվականների արվեստում իր ընթացքն ունեցավ նաև «Հաց են թխում», «Յորեն են ծեծում», «Յորեն են չորացնում» ստեղծագործությունների թեմատիկ գիծը՝ նաև գյուղից առնված տեսարանների ոլորտում: Ինչպես նախասովետական այդ երկերում, այնպես էլ այժմյան պատկերներում գյուղը, հողի մշակը բնութագրվում են իրենց նահապետական գծերով: Թե՛ պեյլաժը, թե՛ այդ միջավարում գործող ֆիգուրները դիտողի երևակայությունը տանում են դեպի հին կյանքի խորքերը, դրա կոլորիտի տիպական յուրահատկությունների ոլորտը: Որպես այդպիսիք, խորապես համովիչ, գեղարվեստական ընդիանուր արժեքով բարձր, գեղանկարչական տեխնիկայով հմուտ են հատկապես «Կալսումը գյուղում», «Գյուղական տեսարան», «Փշատ են թափ տալիս», «Այգեփորը» ստեղծագործությունները: Բաց վարդագույն ամպի քուշաներով թափանցիկ երկնքի ու կապույտ, կապույտ Սևանի ֆոնին գունային նուրբ հարթություններով երևակվում է գյուղական մի փոքրիկ պատկեր («Կալսումը գյուղում»):

Ցածրադիր, հնամենի խրճիթի առջև, հարթ տարածության վրա փոված է բաց դեղնավուն ինտենսիվ գամմայով հացահատիկ, որի շրջագծով շարժվում են կամերը քարշող մուգ կապտա-մանուշակագույն ու մուգ կարմրա-կանաչագույն եզների սիլուետները։ Գունային նույն այդ միջավայրում, նույնքան ուժեղ շեշտվածությամբ է տրված խորձերը շուրջ տփող կնոջ ֆիգուրը։ Նույն սկզբունքն է կիրառված կալը շըրջապատող գետնի, բարձրադիր դեպերի գունային մարմնավորման ու հարաբերությունների ոլորտում։ Մի շնչով կերտված այդ ստեղծագործությունը ունի պլաստիկական ու գուներանգային տարրերի արտակարգ ամբողջականություն։ Ամեն ինչ կարևոր է, ամեն ինչ ունի որոշակի ֆունկցիա՝ թե՛ կտավի արխիտեկտոնիկ ստրուկտուրան ու զգագրական ոիթմը, թե՛ գունային լայն հատվածներն ու նրանց օրգանապես զուգորդված կիսերանգային թրիխոները, թե՛, անգամ, վրձնահետերի շարժման ուղղությունը։ Դրա շնորհիվ է, որ դիտողի առջև պարզ ու համովիչ են երևում ողջ պատկերն ու նրանում ծավալվող գործողությունը։ Պլաստիկական զարմանալի հմտությամբ են տրված եզների քայլքի ծանր ոիթմը, կնոջ ֆիգուրի փութաջան շարժումը, սայլին բեռնված խրձերի ու դիվված հացահատիկի ծևերը, քնքշությամբ են շնչավորված երկնքի ու ջրի գունային ելեկչները։

Գեղանկարչական նույն հմայքն ունի նաև «Գյուղական տեսարան» աշխատությունը՝ այս անգամ դե-

կորատիվ մտածողությամբ իրացված: Նահապետական գյուղի բակալին պատկեր է ներկայացնում կտավը՝ խստապարզ իր տեսքով, անդորրալից տրամադրությամբ: Առաջին պլանի քարաշար, ցածրիկ ցանկապատի շրջագծում բարձրանում է աթարի բուրգանման մուգ շագանական-կապտագույն խուրծը, որ հակադրվում է ուժեղ լուսավորված բակի դեղնավուն հարթությանը: Այդ հարթության վրա, անլուսամուտ տան առջև, պառկած որոճում են անասունները: Դատարկ կողովը շալակին մի կին շարժվում է դեպի անասունները, նրա մոտ մի այլ կին կռացած ինչ-որ գործ է անում: Վերջին պլանում խոտի դեպքերն են բարձրանում սարի նման: Հին կյանքի, պեյզաժի տիպական որոշ մոմենտները մարմնավորող ակնարկներ են սրանք, որոնց հայեցումը, միշնորդավորված ձևով, պատկերացում է տալիս ընդհանրապես գյուղացու առօրյայի, նրա հոգսերի ու մտորումների, վրադարձունքի, կենցաղի մասին: Կոնկրետի մեջ ընդհանուրը տեսնելու և բացահայտելու այս կարողությունը, որ նկատելի են դեռևս Ս. Առաքելյանի նախասովետական երկերում, նկարչի արվեստը օժտում է պատմա-ճանաչողական, գեղարվեստական խոշոր արժեքով:

Մեր կերպարվեստի՝ հայ նահապետական գյուղաշխարհը պատկերող ամենալավագույն երկերից պիտի համարել Ս Առաքելյանի «Աղբյուրի մոտ» աշխատությունը: Այստեղ նկարվող տեսարանի՝ սկըզ-

բունքով դեկորատիվ ընկալումը և տեղ-տեղ կիսեա-
րանգների կիրարկումը հանգում է իր կատարյալ
միասնությանը՝ մարմնավորելով ամբողջական, խոր
ու անմոռաց մի կերպար: Լերկ ռելեֆում ծվարած,
ցածր տներով, նահապետական աթարի կույտերով
աչքի ընկնող հայ գլուղերից մեկն է ներկայացնում
պատկերը: Կտավի առաջին պլանում ծգվում են աղ-
բյուրի փայտե երկար գուտերը, որոնցից ջուր են
խմում գոմեշներ ու կովեր: Մի տեղ, գուտերի մոտ,
վրուցում են ջրի եկած և անասուններին ջրելու բերած
թեշիկ մանող կանայք, գուտերից մեկի մոտ լվացք են
անում, մի տեղ կուժ են լցնում և այլն: Արեք այրում
է, բայց կանայք պարուրված են մեկը մյուսի վրայից
հագած զգեստներում, կեպիների, գլխաշորերի, ծնո-
տակապերի փաթթոցում երևում են նրանց աչքերն ու
քթերը միայն: Ամեն ինչ նահապետականը, հինն է
հիշեցնում: (Եվ ինչ այրով է նկարված): Սռարկանե-
րը իրենց մուգ մանուշակագույն, մուգ կապտավուն,
մուգ շագանակագույն, մուգ վարդա-մանուշակագույն
տոններով ուժգին հակադրություն են կազմում լոկալ-
դեղնավուն պայծառ գետնի հետ: Լուսի պայծառու-
թյան մեջ նրանք երևակված են սիլուետային ընդգծվա-
ծությամբ: Լուսի ու ստվերների բախուն հակադրու-
թյունները մի առանձնակի դինամիկա են հաղորդում
ողջ պատկերին: Հակադրամիասնության նույն ընդ-
գծուն շարժմամբ են տրված և տների, աթարակույտերի
ստվերու ու լուսավոր հատվածները, կանաչ ծառերի

ու բաց կապտա-մանուշակագույն, բաց վարդագույն տոներով լեռների հարաքերումները: Ընդհանրացված, դեկորատիվ այդ հակադրությունների ոլորտներում առկա են կիսերանգներ, որոնք իրենց հապանցիկ նույր քսվածքներով ստեղծում են մթնոլորտի քնքուշ զգացողությունը և լիրիկական մեղմ երանգներ զուգակցում պատկերի մոտիվի խստությանը: Ստացվում է հմոցիոնալ հարուստ, բազմերանգ տպավորություն:

Այդ, և վերոհիշյալ ստեղծագործություններում երևակվում է «Ցորեն են ծեծում», «Ցորեն են չորացնում», «Գյուղում», «Հաց են թխում» աշխատությունների ջերմ սերը հայ գյուղացու հանդեպ:


Այսպիսով, Ս. Առաքելյանի 1920-ական թվականների արվեստի քննությունը ցուց է տալիս, որ նկարիչը ընթանում է վերելքի ճանապարհով: Նրա ստեղծագործության մեջ դրսևորվում են նոր գծեր: Զգալի փոփոխություն է կրում նրա պալիտրան: Մոխրագուն գուներանգները իրենց տեղը զիջում են տոնային հնչեղ բազմազանությանը, կիսերանգային գունագրության հետ միաժամանակ նրա ոլորտում երևան են գալիս դեկորատիվ տարրեր, որոնք հաստատուն ձևով մտնում են Ս. Առաքելյանի գունամտածողության մեջ: Ավելի են խորանում նրա կերպարները:

ԳԼՈՒԽ ԵՐՐՈՐԴ

1928—1930-ական թվականներից նոր հտապ
է սկսվում Ս. Առաքելյանի ստեղծագործական կյան-
քում: Բեկում է կատարվում նրա արվեստի թեմատի-
կայում: Պատմողական ծավալուն սյուժեի նկատմամբ
անտարբեր Ս. Առաքելյանը այժմ փութաջանորեն
սկսում է նման սյուժեներ որոնել: «Ընդհանուր-կեր-
պարային» ֆիգուրալ աշխատությունների հետ միա-
սին, անմիջապես բնօրինակից նկարված երկերի կող-
քին, նա կերտում է արվեստանոցային ծավալուն սյու-
ժետավոր բազմաթիվ ստեղծագործություններ: Հա-
մապատասխանաբար, նա փնտրում է խարակտեր-
ներ, տիպաժային, հոգեբանական կոնկրետ գծեր ու-
նեցող կերպարներ՝ մարմնավորելու համար նոր երե-
փույթներ, պրոպագանդելու համար նոր գաղափար-

ներ: Ծանոթանանք այդ բնույթի երկերին: Դիտենք, նախ, Ս. Առաքելյանի՝ գյուղական կյանքի երևութեաներին արձագանքող ստեղծագործությունները: Այդպիսիք մեծ թիվ են կազմում նկարչի արվեստում, որոնց մի մասը նա իրացրել է «Ցորեն են ծեծում», «Ցորեն են չորացնում», «Հաց են թիւում», «Խջևան», «Հին շուկան Երևանում» գործերի նման «Ընդհանուր-կերպարային» ըմբռնմամբ, մի մասն էլ սյուժենի պատմողական ծավալում պահանջող տեսակետով: Շատ ու շատ թեմաների ու սյուժեների ընտրությամբ, դրանց մեկնաբանմամբ Ս. Առաքելյանը քայլում է պարտիայի՝ գրականությանը և արվեստին առաջադրած խնդիրների կիրառման առաջին գծում: Ահա, օրինակ, «Բամբակահավաքը»: Նկարիչը կատարել է այս թեման մարմնավորող մի շարք վարիանտներ: Բոլորն էլ «Ընդհանուր-կերպարային» բնույթի գործեր են՝ ստեղծված նախկին երկերի սկզբունքով: Բայց այստեղ նկարիչը ընդգծել է նոր մոմենտ: Եթե աշխատանքային մոտիվներ պարունակող նախորդ երկերում բացահայտվում է աշխատանքի մենատնտեսային բնույթը, եթե նրանցում ցոլացվում է, ինչպես ցուց է տրվել մենագրության երկրորդ գլխում, գյուղաշխարհի ծխական անջատվածություն ունեցող առանձինառանձին տնտեսությունների ներփակ կյանքը, ապա այստեղ նրա հիմնական խնդիրն է եղել ցուց տալ կոլտնտեսային աշխատանքի էությունը: Այս կտավներում նկարիչը շեշտում է պարտիայի առաջադրած՝

CHAS. H. CO.





Աղբյուրի մոտ

բոլորը մեկի՝ մեկը բոլորի համար սկզբունքը: Բոլոր «Բամբակահավաքներում» էլ գործողությունը ծավալվում է Մասիսի ֆոնի վրա՝ Արարատյան դաշտավայրում: Առաջելյանը ամեն կերպ ձգտել է ցուց տալ աշխատանքային եռուցեալի դինամիկան, մարդկանց կոլեկտիվ աշխատանքի աշխուժ տրամադրությունը: Մի տեղ կանայք, շարքեր կազմած, հավաքում են սպիտակ ոսկին, այլ տեղում նրանց մի մասը արդեն գոգնոցից թափում ու տղամարդկանց օգնությամբ լցնում է պարկերը: Մի այլ տեղ կոլտնտեսականները բամբակը բարձում են մեքենաներին ու ուղտերին: Ճանապարհով դաշտից հեռանում են բեռամբարձ ուղտերն ու մեքենաները: Պատկերներից մեկում նկարիչը ցուց է տվել պիոներների օգնությունը կոլտնտեսային աշխատանքներին:

Մյուս կողմից, այս և. Թերիշ այլ գործերում Ս. Առաջելյանը խնդիր է դիմել ցուց տալ մարդկանց անհատական խարակներները: Այդ նպատակով նա ֆիգուրները նկարել է համեմատաբար մեծ և ուշադրություն է դարձրել նրանց տիպաժային գծերի, դիմածերի նկարման վրա:

Մի ուրիշ պատկեր՝ «Պիոներները հովիվների մոտ»: Լեռնոտ պեյզաժի միջավայրում ծառերի ստվերի տակ, հանգստանում են հովիվները: Ճանապարհով քայլում է պիոներական շարասյունը: Մի պիոներ մոտեցել է հովիվներին ու նրանց մեկնել Լենինի գըրքերից մեկը: Հովիվները ուրախությամբ են դիմավո-

րում պիոներին: Մի այլ գործում՝ («Կոլտնտեսական-ները օգնում են մենատնտեսներին») պատկերված է կալի մի տեսարան: Մարդիկ կալսում են հացահատի-կը: Մի տեղ եզներով կալսում են, մի այլ տեղ հավա-քում ու լցնում են պարկերը:

Դարձյալ պիոներական կյանքից է վերցված «Պիոներները նախապատրաստվում են տոնակատա-րության» կտավը: Երեք պիոներ լուսունգ են գրում: Մի երկուսը ստուգում են երաժշտական գործիքնե-րը: Փողոցում քայլում է պիոներական մի շարասյուն: Մի պիոներ ստենդին է փակցնում «Կորչի Հոռմի պա-պը» վերտառությամբ պլակատը:

Հետաքրքիր է «Կուլտուրան դեպի լեռները» կտա-վը: Բարձրաբերձ լեռներով ճպվող նեղ կածանով դանդաղաքայլ ընթանում է ուղտերի քարավանը: Ուղտերին բարձված են գրենական պիտույքներ: Մարդը գիրն ու լուսավորությունը տանում է դեպի լեռների հետամնաց ծայրամասերը: Նոր կյանքը ան-գրագիտության և խավարի վերացում է բերել իր հետ,— այս է նկարչի մտահղացումը, հաղորդած գա-ղափարը: Նկարիչը ստեղծել է լուսավորության, կուլ-տուր-կենցաղային հարցեր բարձրացնող այլ գործեր: Այսպես, Ս. Առաքելյանը կերտել է «Կորչի չադրան» թեման իրացնող մի քանի վարիանտներ: Նա նպատակ է դրել ցուց տալ, որ վերջ է տրվում կնոջ ստրկական վիճակին և որ կինը ստացել է տղամարդուն հավա-սար իրավունքներ: Դրա համար նա պատկերում է

իրենց չադրաները դեն նետող կանանց: Վերջիններս բարձրացրել են կարմիր կտորի վրա գրված «Կորչի չադրան» կոչը: Կտավներից մեկում հեղինակը պատկերել է չադրաները նետող կանանց ու նրանց ամուսինների ընդհարումը: Աշխատելով տեղ հասցնել մտահղացումը, նկարիչը խուռնամբոյս այդ միջավայրում տեղ-տեղ տվել է վիճաբանության դրվագներ:

«Պիոներները Սևանում» կտավը պատկերում է պիոներների ամառային արձակուրդի առօրյայից մի դրվագ: Սևանի կապույտ ջրերի ֆոնին, առաջին պլանում, բլրի վրա կանգնած երկու պիոներ հնչեցնում են փողերը: Ներքեւից դեպի դիտողն են գալիս պիոներների խիտ շարքերը, որոնց առջևից բայլող պիոներները բարձրացրել են կարմիր դրոշակներ: Դեպի կղզին լողացող նավն ու մակույկը լի են պիոներներով:

Ս. Առաքելյանը ունի պատմա-ռևոլյուցիոն թեմաներ ընդգրկող աշխատություններ: «Կարմիրբանակայիններն օգնում են ապստամբ գյուղացիներին» կտավը դրանցից մեկն է: Լեռնային պեյզաժի միջավայրում ժայռոտ բարձունքի վրա խմբվել են ապստամբ զինված գյուղացիները և նրանց օգնության հասած բանակայինները, որոնք իրենց հետ բերել են գնդացիր: Նրանք խորհրդակցում են առաջիկա ճակատամարտի մասին: Գյուղացիներից մեկը ձեռքը պարզել և հրամանատարի ուշադրությունն է հրավիրում ինչ-որ բանի վրա: Մնացածները լուրջ հայացքներով հետե-

վում են նրանց: Երկրորդ կտավը կոչվում է «Կարմիր տաբոր»: Բլուրների վրայով պլանում են հեծյալների խմբերը՝ հետապնդելով թշնամուն: Նրանց հետ գրոհում են նաև պարտիվանները: Մի տեղ (առաջին պլանում) հակառակորդները հանդիպել են իրար: Կարմիրները մոլեզնորեն հարձակվել են թշնամու վրա: Կատաղի ձիերի վրա նստած, նրանք ջարդում են թշնամուն: Վերջինս ջանում է մի կերպ փախչել:

Ս. Առաքելյանի՝ գրուդի կյանքին նվիրված գործերի շարքում կան նաև ծավալուն-սյուժետային աշխատություններ: Սրանք ԱԽՌՌ-ի սկզբունքներով կերտված ստեղծագործություններ են, սկզբունքներ, որ գալիս են «Պերեդվիժնիկների» արվեստից: Նկարիչը սրանցում հիմնական ուշադրությունը բևեռում է հենց սյուժեի, գործի հիմքում ընկած պատմության վրա: «Պայքար կոլտնտեսության համար», — այսպիսի վերատառություն ունի այդ կարգի գործերից մեկը: Ս. Առաքելյանը այստեղ վերցրել է սյուժետային բարդ մի սիտուացիա՝ ձգտելով հոգեբանական մարմնավորում տալ իր մտահղացմանը: Կուլակները, տերտերի հետ միասին, բակում նստած թեք են անում: Նրանք խմեցնում են բատրակ կոլտնտեսականներին: Խմողներին է մոտենում «հազարականը», բանվոր, որ եկել է քաղաքից, արդյունաբերությունից՝ կոլտնտեսությունը կազմակերպելու: Բատրակը հարթած է, բայց զգնությունը չի կորցրել և մոտենում է «հազարականին»: Կուլակները պատկերված են կա-

թիկատուրային գծերով։ Ճարպուտ մի կուլակ կեղծ ժափուով գինի է հրամցնում նաև «հազարականին»։ Վերջինս լուրջ ու խիստ հայացքով ու մարմնի շրջումով մերժում է նրան։ Տռլած փորով մյուս կուլակը գինի է առաջարկում «հազարականի» ընկերոջը՝ գուցե կոլտնտեսության դեկավարներից մեկին։ Սա ևս խստորեն ետ է մղում կուլակին՝ մյուս ձեռքով բռնելով բատրակի թևը։ Այդ միջոցին տերտերը մատը վեր տնկած՝ ինչ-որ բան է փսփսում մոտ նստած գյուղացիներին, որոնք, հավանաբար, մենատնտեսներ են և ծառայում են կուլակներին։ Այդ գյուղացիներին Ս. Առաքելյանը նկարել է խրտվիլակային գծերով։ «Հազարականի» կողքին՝ դարբասի մոտ, բահը ձեռքին կանգնած է մի այլ կոլտնտեսական, որը վեհերոտ ու լարված ուշադրությամբ հետևում է գործողությանը։ Ըստ երևույթին, նա էլ է կատարել հարբած կոլտնտեսականի գործած արարքի նման մի բան և այժմ խորհում է... Գուցե և պղջում...»

Մի այլ պատկեր՝ «Միջակը մտնում է կոլտնտեսություն»։ Գյուղամիջյան ճանապարհով վինվորական քայլքով դեպի դաշտն է գնում բահերը հրացաների նման ուսներին առած կոլտնտեսականների շարայունը։ Դեպի դաշտն է գնում նաև ԽՏՁ մարկայի տրակտորը։ Առաջին պլանում դեպի շարքն է շարժվում մի մարդ՝ միջակը, որի միջակ լինելը նկարիչը ցույց է տալիս նրա և քայլող գյուղացիների հագուստների տարբերությամբ։ Քայլողների հազուս-

ները աղքատիկ են, նրանք տրեխներով են, իսկ վերջինս հագել է կոչիկներ, բաղաքային զգեստներ ու ծածկել քաղաքացու գլխարկ: Միջակը գնում է կոլտնտեսություն: Նրան ցանկանում է խանգարել մի տգեղ, վիուկանման պառավ (երևի միջակի մայրը), որ չոքել և կես-հանդիմանական, կես-աղերսական ձևով աշխատում է ետ պահել որդուն: Բայց որդին աներեր է: Նրա հաստատակամությունը դուր է գալիս տիպաժներից մեկին (գուցե միջակի կնոջը), որը ժպտադեմ հայացքով ցանկանում է համոզել սկեսրոջը և շանում բարձրացնել վերջինիս: Իբրև պառավի վարքագիծը՝ մարմնավորողներ երկրորդ պլանում հանդես են բերված նաև տերտերը, որ խոժոռ, թշնամական հայացքով է ուղեկցում միջակի կողմից կատարվող քայլին և նրա «քիթը մտած» մեկը, որ չոել է աչքերը և փսփսում է տերտերի ականջին:

Առաքելյանը միաժամանակ ձեռք է զարնել նաև արդյունաբերության թեմատիկային: Իր մի շարք ֆիզուրալ (ոչ պատմողական ծավալուն սյուժետավորմամբ) գործերում նա պատկերում է հանքարդյունաբերության տեսարաններ՝ ձգտելով վեր հանել բանվոր դասակարգի աշխատանքային առօրյայի, նրա գործունեության էությունը: Ահա, օրինակ, «Արթիկտուֆի քարհանքերը» կտավը: Արևի կիպիչ ճառագայթների տակ, չոր, խստաշունչ բնության պայմաններում աշխատում են քարհատները: Քարհանքից հանվել ու այստեղ-այնտեղ կիտվել է վարդագույն

տուփը: Առաջին պլանում բանվորները կտրում կամ գլորում են կտրված քարի զանգվածները: Մի ուրիշ գործում («Անի-պեմպա») դարձյալ հանքանյութ են հայթայթում: «Դավալուի ցեմենտի գործարանում» մեծադիր կտավում պատկերված են սպիտակ քար-հանքերում աշխատող բանվորներ:


Վերոհիշյալ ստեղծագործությունների վերտառությունների սոսկական թվարկումն անգամ ցուց կտար, թե ինչ դիմափոխություն է ապրում Ս. Առաքելյանի արվեստը՝ թեմատիկայի ընդգրկման առումով: Խոկ դրանց նկարագիրն արդեն պարզ է դարձնում նկարչի քաղաքական հայցըների, հասարակական դիրքորոշման ու նպատակամիտումների էությունը: Առաքելյանը ակտիվորեն մտնում է կյանքի նոր երևույթների ոլորտը՝ աշխատելով ֆիգուրալ մեծ պատկերների մեջ մարմնավորել դրանք: Այդ ստեղծագործություններում նա հանդես է գալիս սոցիալիստական ռեալիզմի մեթոդի, սովետական արվեստի գաղափարական սկզբունքների դիրքերում: Երկրի սոցիալ-հասարակական կյանքին, տարբեր հասարակաշերտերի հոգեբանությանը նա այժմ մոտենում է արվեստի պարտիականության լենինյան դրույթներով զինված, նոր, սովետական էսթետիկայի հիմունքներից ելնելով: Գաղափարական-էսթետիկական այդ շրջադարձի գործում մեծ դեր խաղացին իդեոլոգիայի ճակատի գործիչներին պարտիայի տված ցուցումները և գրականության ու արվեստի աշխատանքները նոր,

միասնական հիմունքներով կազմակերպելու մասին
պարտիայի Կենտկոմի 1932 թվականի որթշումը: Առա-
բելյանը մեկն էր հենց այն արվեստագետներից, որը
վերանայեց իր գործունեությունը այդ որոշման լուսի
տակ ու դարձավ սովետական արվեստի ակտիվ
գործիչ:

Պետք է ասել, որ Ս. Առաքելյանի արվեստան-
ցային թեմատիկ գործերը ունեն պլաստիկական, կոմ-
պուզիցիոն, գեղանկարչական թերություններ: Իր
«Հայաստանի նկարիչները 15 տարում» հոդվածում*
Ռ. Դրամբյանը այդ թերության կոնկրետ պատճառը
համարում է գծանկարի թուլությունը: Իրոք, Ս. Առա-
քելյանի ֆիգուրալ որոշ պատկերների անհաջողու-
թյան հիմքում ընկած է գծանկարչական թուլությու-
նը: Ըստսմին, այստեղ պետք է ընդգծել մի մոմենտ,
այն, որ Առաքելյանը չէր կարողանում մտովի ֆի-
գուր կառուցել: Սույն աշխատության նախորդ գլուխ-
ներում ցույց տրվեց, որ նա բնօրինակից նկարելիս
հասնում է փայլուն արդյունքների և գծանկարի ու
գունանկարի մարզերում, ցույց տրվեց, թե որքան
բարձր միասնությամբ են դրսերդվում նրա այդ գոր-
ծերում գծապլաստիկան ու գունագրությունը:

Չի կարելի Ռ. Դրամբյանի հետ չհամաձայնել նաև
այն հարցում, թե Ս. Առաքելյանի գծագրական թու-
լություն ունեցող գործերը թույլ են նաև գունագրու-

* Տե՛ս «Գրական թերթ», 1936, 10 հունվարի:



Տեսարան Սևանից



թյամբ: Իհարկե, գունային ինքնակա, «բացարձակ» արժեքների հարաբերությունները կամ առանձին գծերը ևս կարող են հոգեբանական, էմոցիոնալ ներգործություն ունենալ: Բայց այստեղ խուզը այն արվեստի մասին է, երբ գունը հանդես է գալիս կոնկրետ-հայեցվող ձևերի հետ միասնաբար, ձևերի միջոցով, ձևերի հենքի վրա և իբրև ձևեր, կերպարներ մարմնավորող տարր:

Իսկ ո՞րն է գծապլաստիկայի թուլության պատճառը Ս. Առաքելյանի հիշյալ երկերում: Դրա արմատները մեզ տանում են դեսպի արվեստագետի ստեղծագործական ձևավորման տարիները: Ս. Առաքելյանի հիմնական ուսուցիչը Կ. Կորովինն էր և, ինչպես ցուց տրվեց, մեր նկարիչը շատ է ավդվել իր ուսուցչից: Հենց Կ. Կորովինն էր, որ Ս. Առաքելյանի մեջ նկատեց կոլորիստի բարձր ծիրք ու որոշակի հունի մեջ դրեց այդ ծիրքը: Միաված չենք լինի ասելով, որ եթե հայ կերպարվեստն ունի վարպետ, նուրբ գունազգացողություն ունեցող մի գեղանկարիչ ևս (Ս. Առաքելյան), ապա դրա համար մեծապես պարտական է ողուականավոր արվեստագետին: (Քիչ են դեպքերը, երբ գունագրական բացառիկ շնորհը ունեցող՝ մարդը, ոչ ծիշտ դպրոց անցնելով, կորցնում է իր շնորհը: Քիչ են դեպքերը, երբ ուսուցիչը, կամա թե ակամա, բթացնում է իր սանի այս կամ այն ընդունակությունը):

Կ. Կորովինը ամբողջ հոգով, երևակայությամբ

ապրում էր գունաշխարհի էսթետիկական նըրբություններով, դրա հարուցած բազմազան ու բազմախորհուրդ էմոցիաներով, խոհերով: Եվ ուսանողների մեջ սերմանում էր այդ՝ խրախուսում, սիրում գունագրության ասպարեզում առաջադիմություն ցուցաբերող երիտասարդներին: Հասկանալի է, որ վերջիններս, իրենց հերթին (ինչպես Ս. Առաքելյանը), սիրում էին վարպետին և աշխատում նմանվել նրան, արվեստի ասպարեզում հետևել նրա օրինակին: Դա անկասկած լավ է, բայց, ցավոք, Կ. Կորովինը անտեսում էր ուսանողներին գծագրական հմտություն տալու անհրաժեշտությունը: Հակառակ իր արվեստակից Վ. Սերովի մանկավարժական մեթոդին, նա, ինչպես հարկն է, հաշվի չէր նստում այն բանի հետ, թե ուսանողների աշխատանքները կատարված են, արդյոք, նկարչության գծագրական հիմունքների բավարար տիրապետմամբ, թե՛ ոչ: Այդ պատճառով էլ նրա ուսանողներից շատերը գծանկարից թույլ էին լինում ընդհանրապես և մասնավորապես զուրկ՝ մտովի ֆիգուր կառուցելու բավարար վարպետությունից: Նրա ուսանողները միշտ էլ գործ ունեին միայն բնօրինակի հետ, նկարում էին անմիջական հայեցողության պայմաններում և եթե նրանցից ոմանք գծապլաստիկայի ասպարեզում (բնօրինակից նկարելիս) հմտանում էին ցանկալի չափով, ինչպես Ս. Առաքելյանը, ապա դա ներքին զգացողության, սեփական նախաձեռնության արդյունք էր լինում: Իսկ ինչպես հարկն

է մտովի նկար հյուսելու, ֆիգուր կառուցելու մասին խոսք լինել չէր կարող բոլոր դեպքերում: Իրենց հետագա ինքնուրուցն ստեղծագործական պրակտիկայում այդ բանը զգացել են Կ. Կորովինի աշակերտներից շատերը*:

Նույն իրադրությունն ակնառու է Ս. Առաքելյանի մոտ: Չանդրադառնալու համար վերը նկարագրված երկերին, այդ իրադրությունը դիտենք նկարչի այլ, նույնատիպ ստեղծագործություններում: Որ իսկապես Ս. Առաքելյանը չունի մտովի ֆիգուր կառուցելու բավարար հմտություն, մարդու մարմնական-անատոմիական պլաստիկան իր համովիչ հարաբերություններով երևակայությամբ կտավին հանձնելու անհրաժեշտ վարպետություն, ապացուցում է, օրինակ, «Խոտ բարձած ավանակը» կենցաղային պատկերը: Այստեղ ընկալված է հին Երևանի ծուռումուռ, նեղլիկ փողոցի պեյզաժի կոլորիտային յուրահատկությունը: Արևի ճառագայթները՝ պայծառ լուսավորել են պատկերվող առարկաները: Ծառերը «հագել են» իրենց աշնանային խայտաբղետ, վառվուն գույններով զգեստները, որոնք ավելի հնչեղ են ընկալվում տափակ կտուրներով տնակների, ցեխաշեն պարիսպների ու փոշոտ փողոցի գորշ մոխրավուն տոների ու միապաղադ, մոխրավուն հանդարտ գամմայով երկնքի

* Տե՛ս, օրինակ, «Мастера советского изобразительного искусства», М., 1951, էջ 30:

կոլորիտային միջավայրում։ Միայն առաջին պլանում է, որ ծառերի այդ վառվոռւս, պայծառ երանգները ունեն իրենց մերձավոր (համարնչունության առումով) ակորդները՝ պարսպի մոտ կանգնած վրուցող կանանց զգեստների վրա։ Այդ երկու համարնչուն մոմենտների կապող օյակ, անցում է հանդիսանում ավանակին բարձած խոտի և ավանակին քշող մարդու արտաքինի համեմատաբար միջին հնչեղություն ունեցող գունային լուծումը։ Կտավն ունի կոլորիտային ընդհանուր ամբողջություն, տարածական տարբեր մասերի կապ։ Պատկերի պեյզաժային արխիտեկտոնիկ ընդհանուր ստրուկտուրան էլ համովիչ է։ Դրա շնորհիվ, դիտողը առաջին հայացքից ընկալում է ներկայացվող իրադրության դինամիկան։ Զնի այդ հաջող տարրերի միջնորդությամբ նա որոշակիորեն մտնում է պատկերի տրամադրությունների ոլորտը։ Սակայն ընկալման պրոցեսը մնում է անավարտ։ Պատկերին հաղորդակցվելու առաջին պահին մի ընդհանուր հայացքով շրջառելով նրա էսթետիկական ամբողջությունը, դիտողը, բնականաբար, ուշադրությունը բևեռում է կտավի առանձին և առաջին ներքին կենտրոնական դետալների վրա։ Ահա՝ հենց այս պահին է, որ խաթարվում է կտավի ընկալման ներդաշնակ ընթացքը։ Կտավը բողնում է կիսատ տպավորություն։ Պատճառն այն է, որ կենտրոնական ֆիգուրը (ավանակին քշող մարդը) գծագրական ո՛չ համովիչ կառուցվածք ունի։ Նրա ձեռքերը, ոտքերը, գլուխը

համապատասխան հարաբերություն չունեն իրանի հետ և չեն դրսեւում օրգանների դինամիկան, շարժման պլաստիկան։ Այստեղ նատուրալիզմի կամ ակադեմիզմի ճշմարտացիությունը չէ, որ պետք էր տեսնել։ Բանն այն է, որ ֆիգուրի դեֆորմացիան միջավայրում չունի գծապլաստիկական իր այդ տեսքը հիմնավորող, արդարացնող, ընդհանուր սիստեմի մեջ օրգանապես առնող գծապլաստիկական համապատասխան ոիթմը։ Դրա հետևանքով էլ նա արգելակում է կտավի ներդաշնակ հայեցումը։ Գծանկարի թուլությունը բացասաբար է անդրադարձել նաև «Սևանի ձկնորսները» պատկերի գեղարվեստական որակի վրա, մի պատկեր, որ Ս. Առաքելյանի ոչ թույլ գործերի շարքն է դասվում։ «Սևանի ձեկնորսները» իր կոմպոզիցիոն սխեմայով տրամաբանական ու համովիչ է։ Կտավի պեյզաժի ընդհանուր գծային կոնստրուկցիան ու գունային կոմպոզիցիան կապված են օրգանական միասնությամբ, առանձին սլանները անընդմեջ ներդաշնակությամբ են հայեցվում։ Տեսարանն ընդգրկված է օբյեկտի նկատմամբ բարձր դիտակետից, հանգամանք, որ լիովի հնարավորություն է ընձեռել դիտելու տարածական լայն հորիզոն և այստեղ ընթացող մարդկային եռուպեռ՝ իր ամբողջական տեսքով։ Թե՛ լճի մուգ կապտագույն ջրերը և թե՛ ափերի լեռնոտ ռելեֆի արխիտեկտոնիկ որոշակի ձևերը տրված են ոչ վատ կերպավորումներով։ Ուշագրավ է, նատկապես, որսված ձկների կույ-

տը՝ գունագրական վիրտուոզ իր հարաբերություններով։ Համովիչ է նաև մարդկանց ֆիզուրների հաջորդական դասավորվածությունը տարածության մեջ, մի բան, որ որոշակի ռիթմ ու դինամիկա է ստեղծում կտավում։ Այս լավագույն գծերի լծորդումներով նկարիչը որոշ իմաստով հասել է իր մտահղացման նպատակի իրագործմանը։ Դիտողի առաջըցվում է բնության տարերքի դեմ պայքարող մարդկանց՝ ձկնորսների առօրյայի հերթ։ Ակամա հիշում ես «Հաց են թխում», «Ցորեն են ծեծում», «Ցորեն են չորացնում» աշխատությունները և անմիջապես նշմարում Ս. Առաքելյանի ստեղծագործական մտորումներում, նրա ներաշխարհում կատարված փոփոխությունները։ Եթե առաջին այդ պատկերները ինտիմ-լիրիկական են, ապա «Սևանի ձկնորսները» կտավում դրսերված է մարդկային ակտիվության ուժը։ Ե՛վ հիշյալ գործերում, և՛ այս գործում նկարչի ուշադրության կենտրոնում աշխատող մարդն է, բայց երկրորդում այդ մարդը մեկնաբանվում է էպիկական-պարետիկ որոշ գծերով, հորդուն ակտիվությամբ՝ հակառակ առաջինների ինտիմ-կամերային, ներհուն իմաստավորմանը։ Սակայն «Սևանի ձկնորսները» պատկերը ավելի համովիչ, ներդաշնակ ու հմայիչ կլիներ, եթե չիներ գծապլաստիկայի որոշ թերացումը։ Նախորդ էջերում նշված բազմաֆիզուր կտավների նման, այստեղ մարդկանց ֆիզուրները թույլ են գծագրված։ Այս հանգամանքը դիտողի ուշադրու-

թյունը արվեստի երկի էսթետիկական ընկալումից շեղում է դեպի նկարչության «արհեստի» ոլորտները: Ի դեպ, «Սևանի ծկնորսները» աշխատության ստեղծման «պատմությունը» երևակող որոշ նյութեր հաստատում են այն միտքը, թե Առաքելյանը մտովի կամ էտյուդային նյութի հիման վրա ֆիգուր կառուցելու բավարար վարպետություն չուներ: Դիտելով, օրինակ, «Սևանի ծկնորսները» փոքրադիր էտյուդը և համեմատելով նույնանուն պատկերին, գալիս ենք այն համոզման, որ ոչ միայն մարդուն, այլև բնությունը Ս. Առաքելյանի մոտ անմիջականորեն բնօրինակից նկարելիս ավելի հաջող է ստացվում, քան արվեստանոցում կերտելիս (թեկուզ և էսքիզային, էտյուդային նյութի հիման վրա): Էտյուդը էմոցիոնալ ավելի խորը հնչեղություն ունի, դրա կոմպոզիցիան ավելի կոմպակտ է, քան պատկերի այդ կողմերը: Գովները էտյուդում անհամեմատ ավելի մաքուր են, թափանցիկ, նրանց տպավորությունը ավելի թարմ է, հուզապարար: Իսկ ծկնորսների ֆիգուրները, որ կատարված են մեկ-երկու խիստ ընդհանրացված ակնարկներով, ունեն լիուվի ներդաշնակ համաչափություններ: Գեղանկարչական մեծ տակտով ու ներքին էքսպրեսիայով նրանք կապվում են իրար և պելզաժային միջավայրին՝ ստեղծելով մի օրգանական միասնություն: Էտյունի ընկալման պրոցեսը, դրա շնորհիվ, ընթանում է առանց խաթարման, ամբողջականորեն: Բոլոր տեսակետներից էտյուդը

ավելի ավարտուն է, խորը, քան մեծ պատկերը: «Սե-
վանի ձկնորսները» էտյուդը Ս. Առաքելյանի ստեղ-
ծած լավագույն գործերի շարքը պիտի դասել:

Նույն համովման են բերում նաև «Սևանի ձկնորս-
ները» պատկերի համար բնօրինակից անմիջապես
կերտված ձկնորսների դիմանկարները: Իրավ է,
սրանք այն էտյուդները չեն, որ արտացոլում են պատ-
կերվողների ներաշխարհները, և այդ պատճառով էլ
նրանք իրարից տարբերակվում են սոսկ արտաքին,
տիպաժային գծերով միայն: Դա մեզ տվյալ դեպքում
չի հետաքրքրում: Կարևորն այն է, որ այդ տիպաժնե-
րը նկարված են համովիչ գծապլաստիկայով՝ հակա-
ռակ պատկերի պերսոնաժների: Այդ նույն միտքն է
արդարացնում նաև նկարչի գրաֆիկ «ինքնադիմա-
նկարը», որ կատարված է հիմանալի գծանկարով,
շտրիխների համովիչ ոդիթմով, դիմածերի նուրբ զգա-
ցողությամբ, «Ս. Բերերյանի դիմանկարը» (1927),
ուր գծապլաստիկական ու գունագրային հաջող
միասնությամբ տրված է բնորդութու ներաշխարհը,
«Փ. Թերլեմելվանը նկարելիս», «Ստախանովական
Մասմա-խանումը», «Գ. Գյուրջյանը էտյուդ անելիս»
էտյուդները և դարձյալ բնօրինակից կերտված այլ
աշխատությունները:

Բայց այստեղ անհրաժեշտ է ընդգծել մի մոմենտ:
Եթե Առաքելյանի «ընդիանուր-կերպարային» (մտովի
ստեղծած) աշխատությունների թուլությունը կարելի
է բացատրել գծանկարի թուլությամբ, ապա ծավա-





Արթիկ-տուֆ

լուն-պատմողական սյուժետավոր երկերի թերությունները միայն դրանով անհնար է հիմնավորել: Ավելին, գծանկարչական թուլությունը այս դեպքում երկրորդ պլան է մղվում: Դրա ապացուցն է այն, որ «ընդհանուր-կերպարային» շատ երկեր այդ թերությամբ հանդերձ դիտվում են որոշ հետաքրքրությամբ («Սևանի ծկնորսները» և ուրիշներ), իսկ սյուժետայինները՝ ոչ, հաճախ ոչ վատ գծագրությամբ ֆիգուրներ ունենալու առկայության պայմաններում անգամ: Դիտարկենք, օրինակ, նկարչի «Կարմիրբանակայինը արձակություն» պատկերը: Դա Ս. Առաքելյանի այն աշխատություններից է, ուր գծապլաստիկական թերացումները համեմատաբար քիչ են: Ճիշտ է, կարմիրբանակայինի, ծեր կնոջ և պիոնների ֆիգուրները համովիչ չեն կառուցված, բայց տերտերի և նրա ուղեկցի տեսքը ոչ միայն բավարար, այլև հաջող են իրենց գծապլաստիկական կողմերով: Այդ երկու պերսոնաժները, ինքնին վերցրած, շատ հետաքրքրական են որպես անհատականացված տիպամեր: Նրանք ուղղակի տիպական խարակտերներ են: Ծեր տերտերի կանգնելու ձեռ, փոքր-ինչ մեղավոր, սառած հայացքը տրված են նուրբ զգացողությամբ: Ավելի հաջող է նրա ուղեկիցը: Վերջինիս մարմնի դինամիկան, հագուստները, ձեռքի շարժումը, դեմքին ու աչքերում արտահայտված զարմանքի ու վախի արտահայտությունը գեղարվեստորեն տպավորիչ են:

Որպես խարակտերներ սրանք և կտավի մյուս պերսոնաժները պլաստիկորեն անհամեմատ ավելի համոզիչ, արտահայտիչ են, քան, ասենք, «Սևանի ձկնորսները» պատկերի պերսոնաժները: Բայց և այնպես, «Սևանի ձկնորսները» գեղարվեստորեն ավելի բարձրարժեք երկ է, քան «Կարմիրբանակայինը արծակուրդում» ստեղծագործությունը: Ինչո՞ւ: Նկարագրենք, ապա, «Կարմիրբանակայինը արծակուրդում» ստեղծագործությունը: Տերտերն ու իր ուղեկիցը եկել կանգնել են գյուղական խճիթի շեմին: Մուտքի մոտ երկում են մի ծեր կիս և պիոներական փողկապով մի երեխա: Տերտերը ցուց է տալիս իր խաչը, իսկ վինվորական համազգեստով երիտասարդը ձեռքով կարծես բացասական նշան է անում: Դիտողին չի հասնում, թե կոնկրետ ինչ է ուզում պատմել հեղինակը (Գ. Գյուրջյանը այդ նկարի առթիվ գրում է հետևյալը. կարմիրբանակայինը արծակուրդ է եկել նահապետական գյուղը և իրենց շեմից ներս չի թողնում տերտերին ու տիրացուին, որոնք տնօրիների նպատակով պատրաստվում են ներս մտնել): Բայց չէ՝ որ սյուժեի «ընթերցումը» գեղանկարչական երկում չպիտի ջանքեր խլի դիտողից: Իսկ եթե ընդունենք անգամ, որ դիտողը երևակայությունը լարելով այդ կտավի դրդմամբ ինչ-որ կոնկրետ սյուժե է գտնում, կամ նման սյուժե է վերագրում կտավին, ապա այս դեպքում կերպարվեստի մասին

* Տե՛ս «Խորհրդային արվեստ», 1934, № 2, էջ 6:

խոսք լինել չի կարող: Դա կլինի, լավագույն դեպքում, «գրականություն», որը, սակայն, ունի իր՝ կերպարվեստից տարբեր, սպեցիֆիկ դրսերումներն ու մտածողությունը: Իսկ ճշմարտությունն այն է, որ «Կարմիրբանակայինը» արձակուրդում աշխատության սյուժեն կոնկրետորեն չի ըմբռնվում և գծագրական հաջող կողմերն ու թերացումները սկզբունքային ֆունկցիա չունեն մեր հարցադրման ասպեկտով: Բանն այն է, որ Ս. Առաքելյանի ստեղծագործական երևակայությունը կոնկրետ է՝ կոնկրետ հայեցողության պրոցեսում միայն: Նկարիչը հմտություն չունի «պուտ» երևակայության ոլորտում ընտրելու սյուժեի այն մոմենտը, հոգեբանական հարաբերությունների այն պահը, որը կոնկրետորեն պիտի սինթեզի սյուժենետային ողջ ընթացքի տարբեր կարևոր էտապները: Իր սյուժենետային երկերում Առաքելյանը ձգտում է կերտել սոցիալ-հասարակական, հոգեբանական, էթիկական տենդենցներ մարմարավորող կերպարներ: Բայց նա չի կարողանում պերսոնաժներին իրար հետ հարաբերության մեջ դնել այնպիսի կոնկրետ գործողության ոլորտում, որի ընթացքում իրոք որ նրանք դրսևորեին կերպարային համոզիչ գծեր: Այդ պատճառով էլ նկարչի նմանատիպ աշխատությունները թողնում են գրական տեքստից վատված իլլուստրացիաների տպավորություն: Դա, որոշ առումով, ստեղծագործական երևակայության հետ կապված խնդիր է: Գծանկարը դրա նկատմամբ

կոնկրետ երևակայության տառացի իրացման ֆունկցիա կարող է ունենալ միայն: Այլ կերպ ասած՝ գծանկարը այստեղ ճարտարապետական կոնկրետ նախագծի իրացման շինանյութ է միայն:

Նկարչի ստեղծագործական երևակայության ահա՝ այս թերացումներն են նաև, որ պայմանավորել են ինչպես «Կարմիրբանակայինը արծակուրդում», այնպես էլ սյուժետային այլ աշխատությունների գեղարվեստական թերությունները: Այսուհանդերձ, ինչպես Ս. Առաքելյանի այդ երկերը, այնպես էլ նրա արվեստակիցների կերտած նույնատիպ երկերը ունեն իրենց արժեքը: Դրանցում մեր արվեստի պատմության մի հետաքրքիր էտապն է ընդգրկված և դրանք արվեստաբանական լուրջ հետաքրքրություն են ներկայացնում: Արվեստի պատմաբանը չի կարող անտեսել այդ իրողությունը և ոչ էլ տարբեր հեղինակների ստեղծագործության քննությամբ զբաղվող հետազոտող՝ չափահանական նրանց այդ կարգի աշխատություններին:

Դիտարկենք այժմ Ս. Առաքելյանի այլ կարգի ստեղծագործությունները: Դրանց մի մասը այն նոր ստեղծագործություններն են, որ ըստ բնույթի «ընդհանուր-կերպարային» են և կատարված են բնօրինակի անմիջական հայեցման պայմաններում: Վերցնենք նախ պեյզաժները:

1920-ական թվականների վերջերից իսկ սովետահայ նկարիչներից շատերը (Փ. Թերլեմելյան, Վ.

Ախիլյան, Գ. Գյուրջյան և ուրիշներ) սկսեցին իրենց ուժերը փորձել այսպես կոչված ինդուստրիալ պեյզաժի ասպարեզում: Այդ կարգի երկեր ստեղծեց և Ս. Առաքելյանը: Այստեղ հանդես է գալիս պեյզաժիստ Առաքելյանը.— ժանրային նախասիրության և կարողությունների հարց է:

«Արթիկ-տուֆ»՝ այսպիսի վերտառություն ունի Ս. Առաքելյանի ինդուստրիալ պեյզաժներից մեկը: Պլաստիկական ամրապինդ գծագրմամբ են տրված ընդգրկվող տեսարանի արխիտեկտոնիկ ընդհանուր կոմպոզիցիան և առարկաների կառուցվածքները: Դրան սերտորեն միահյուսված են գունային ժլատ, զուսպ, բայց տպավորիչ քսվածքները: Հիանալի են տեղանքի մերկ գորշության ու քարերի վարդա-մանուշակագույն տոների լծորդումները: Մարդկային գործունեությունը հուշող ատրիբուտների ու գունաքերով նշմարված մարդկային մի քանի ֆիգուրների առկայությամբ հեղինակը կարողացել է դիտողի հայեցման ոլորտում տպավորել արդյունաբերական կյանքի մարդու աշխատանքային ակտիվության բնորոշ կեցությունը: Նույնը պիտի ասել նաև «Երսկավատորի աշխատանքը Զանգուցեալ վրա» պեյզաժի մասին: Սպիտակ ամպի քուլաներով մոխրավուն երկնքի ֆոնի վրա այնպես գեղարվեստորեն է գծագրվում թխագույն էքսկավատորի սիլուետը, որ չի նկատվում չորության ոչ մի նշույլ, երկարյա գործիքների չորության, որից այնքան խուսափում են

շատ նկարիչներ: Մեքենայի տեսքը գծապլաստիկական, գունային տարրերի այնպիսի հմուտ լծորդումներով է տրված, որ, մի կողմից, ընկալվում է իբրև մետաղային իր և ապա դիտողի հայեցողությունը չի տանում դեպի կոպիտ նյութականությունը: Նկարիչը ապացուցում է, որ մետաղյա մեքենան նույնքան հետաքրքիր է, որքան պեյզաժային ամենագեղատեսիլ պատկերը: Գեղարվեստական նուրբ ճաշակով են տրված նաև գետի դեղնավուն նուրբ երանգներ ունեցող բաց կապտավուն թափանցիկ ջրերը, գետափին դիպված գորշա-դեղնավուն հողը: Դարձյալ արտիստական զգացումով արտացոլված է բնությունը վերափոխող մարդու աշխատանքը:

Ի դեպ, այս աշխատությունները դրսենորում են գեղանկարչական կատարման մի նոր տենդենց, որ բավական լայնորեն ծավալվում է Առաքելյանի 1930-ական թվականների ստեղծագործության մեջ: Դեռ 1920-ական թվականների վերջերին կերտած նրա մի շարք աշխատություններ իրենց գունագրական տեխնիկայով տարբերվում են մյուս երկերից: «Տաք օր: Սևան» (1927), «Այրիվանքի տեսարան» (1927) ստեղծագործությունների թռուցիկ դիտարկումը ցույց է տալիս, որ դրանց ընդհանուր մակերեսը փայլատ է, հակառակ, ասենք, «Ցորեն են չորացնում», «Ցորեն են ծեծում», «Զորագյուղ», «Աշնանային մոտիվ» և այլ գործերի: Սա, իհարկե, կարևոր չէ: Խնդիրն այն է, որ դը-

րանց գունսմտածողության կատարման սիստեմն է պգալիորեն այլ: Դրանք նման չեն նկարչի ո՞չ «կիսերանգային», ո՞չ «կիսերանգային-դեկորատիվ» երկերին: Այդ կտավներում, ընդհանուր առմամբ, հեղինակը ուշադրություն չի դարձրել ո՞չ տվյալ գունահիտվածի ոլորտում առկա տարբեր երանգների հավիվ նշմարելի թրթուն, հալուն նրբությունների վրա՝ հակառակ «կիսերանգային» երկերի, ո՞չ այդ նրբությունների ու դեկորատիվ մեծ տարιածամասերի լծորդումների վրա՝ հակառակ «դեկորատիվ-կիսերանգային» աշխատությունների, ո՞չ ել գունային լուսարձակող հակադրամիասնության վրա՝ հակառակ դեկորատիվ ստեղծագործությունների: Դրանցում բացակայում է մյուս գործերի գուներանգային բազմազանությունը: Կտավների կոլորիտը պահված է մեկ-երկու տոնների սահմաններում: Բացակայում է նաև գույնի լուսաթափանցիկությունը և մաքրությունը: Եվ, վերջապես, ի լրումն այդ ամենի, տարբեր է վրձնահետը: Այս վերջին մոմենտը «Տաք օր: Սևան», «Այրիվանքի տեսարան» պեյզաժներում այնքան էլ պարզ չի դըրսկորպում, բայց «Նավահանգիստ Սևանում», «Այրիվանք», «Միկոյանի շրջակայթը» և այլ գործերում շատ ակնառու է: Դժվար չէ նկատել, որ այստեղ նկարիչը հոգ չի տանում համապատասխան նուրբ երանգի ստացման և այդպիսի երանգների միահյուսման վրա: Ակնառու բոլոր վրձնահետերը չունեն մյուս երկերի նրբագեղ, հպանցիկ քսելածեք: Այս գործերում,

առավելապես, գունաբծերը տրված են շեշտակի և, ըստ որում, ուղղագիծ, «կտրուկ-շտրիխային» շարժումներով:

Այդ տեխնիկան միշտ չէ, որ նկարչին ցանկալի արդյունքի է հասցրել: Եթե թիչ առաջ հիշատակված ինդուստրիալ պեյզաժները հաջողված են, եթե «Տարօր: Սևան», «Այրիվանքի տեսարան» երկերը իրենց թերություններով հանդերձ դիտվում են, ապա մի ամբողջ շարք նույնանման ստեղծագործություններ նըկարչի կողորիստական զգացողության անկում են նշանակում: Գունային խակ, ներկված լուծում են ստացել, օրինակ, «Սևանի ափին», «Սևանա լիճը և կղզին գարնանը», «Սևանի ժայռոտ ափերը», «Առավոտ: Սևան», «Այրիվանք» և այլ պեյզաժները, որոնք կողորիտային դժգունությամբ ու պղտորությամբ հիշեցնում են 1914 թվականին կերտված «Լեռնային գագաթներ» անհաջող էտյուիդը: Նպատակահարմար ենք գտնում այստեղ հիշեցնել սույն մենագրության նախորդ գլխում քննարկված «Սևանա վանքերը» և «Տեսարան Սևանից» սքանչելի կտավները: Որքան սրանք խորն են, գեղարվեստորեն բարձրորակ, ընդգրկված մտորումներով ու հույզերով անհատնում, գունագրությամբ վիրտուոզ, նույնքան առաջինները դժգույն են, մակերեսային, անարտահայտիչ: Հետաքրքիր է. Ս. Առաքելյանը սովետահայ կերպարվեստում տալիս է Սևանի գեղարվեստա-





կան մարմնավորման և՝ ամենաբարձր, և՝ ցածր օրինակներ:

Թույլ է նաև այդ կարգի՝ երկրաշարժից հետո Լենինականում կատարված նկարաշարը:

Երևի հիշյալ գործերը ևս նկատի է առել Ե. Մարտիկյանը, իրավացիորեն նշելով, որ Ս. Առաջելյանի 1930-ական թվականների ստեղծագործության մեջ դրսերվում է նաև կոլորիտային չորություն, միաձնություն*:
Հավանաբար զգալով այդ չորությունը, նկարիչը աշխատում է, հաճախ, կտավի վրա գունաբծերը մեղմացնել՝ դրանց խառնելով կապտա-սպիտակավուն, կանաչա-սպիտակավուն և դեղնա-սպիտակավուն երանգների միօրինակ տոներ:
Այս դեպքերում էլ կտավները թողնում են խստ մակերեսային, սալոնային քաղցրումեղցր գործերի տպավորություն: «Առավոտը Ախթալայում», «Սևան», «Միկոյանի շրջակայքը», «Սևանի ափը» ստեղծագործությունները հենց դրա խոսուն, ակնառու ապացուցնեն:

Սակայն գունաբծային տրոհուն, կտրուկ-ուղղագիծ քսվածքներով, կոլորիտային տեխնիկայով Ս. Առաջելյանը ստեղծել է նաև հիանալի աշխատություններ՝ ցուցաբերելով գեղանկարչական տարբեր հնարանքներին վարպետորեն տիրապետելու արտակարգ

* Ste'v, «Очерки по истории искусства Армении», М.-Л., 1939, էջ 87:

հմտություն։ Այդ ստեղծագործություններում նա նուրբ տակտով օգտագործում է նաև 1920-ական թվականների իր գունագրական սկզբունքների տարրերը՝ հարուցելով գեղարվեստական նոր հետաքրքրություններ։ Փայլուն ապացուց է «Բամբակահավաք» պեյզաժը։ Գունային հարստությամբ, տոնների թափանցիկ խաղով, գույն-գծապլաստիկա, գույն-լուս խնդիրների ամբողջական դրակորումներով այս գործը Ս. Առաքելյանի և ողջ հայ կերպարվեստի լավագույն, ամենավիրտուոզ նմուշներից է անշուշտ։ Տրոհուն, շեշտակի գունաբծերը սրանում նրբագեղորեն միահյուսվում են հապիվ նշմարելի կիսերանգներին։ Բաց կապտավուն, թափանցիկ ու միապաղաղ երկների հետ աննկարագրելի թերևությամբ են տրված բամբակի դաշտի բաց վարդագույն, բաց դեղնավուն թրթիռները, որոնք ուղեկցվում են կանաչավուն ու կապտավուն ելեկցումներով։ Պատկերը լի է օդով և ողողված ջերմացնող ու թափանցիկ լուսով։ Ահա այդ միջավարում նկարիչը բարձր վարպետությամբ տեղ-տեղ դրոշմել է բամբակ հավաքող մարդկանց գունաբային ֆիգուրները, որոնք ազատորեն շարժվում, կենդանի դինամիկայով կապվում են իրար և պեյզաժին։ Ո՞չ մի համեմատություն նրա բազմաֆիգուր թեմատիկ-կոմպոզիցիոն «Բամբակահավաքների» հետ։ Այս «Բամբակահավաքում» խպառ բացակայում է ծավալուն սլուժետային գիծը և տիպաժների անհատականացման տենդենցը։ Սա, արդեն, Ս. Առաքելյանի տարերքն

է, նրա մտածողությանը, ամպլուային յուրահատուկ սկզբունքը և այդ պատճառով էլ այստեղ ավելի համովիչ ձևով է արտացոլվում բնության ու մարդու միասնությունը, մարդու աշխատանքի գաղափարը:

«Նորքի մանկական սանատորիան» ևս հետաքրքրիր աշխատություն է: Այս անգամ նկարիչը գունագրական այդ նոր տարրը հիմնականում միավորել է դեկորատիվ-լոկալ գունային տարրերի հետ: «Աղբյուրի մոտ» պատկերի նման, այստեղ դեղնասպիտակավուն գետինը տրված է մի ընդհանուր լոկալ հարթությամբ: Գրեթե նույն մեթոդով են նկարված նաև սանատորիայի սպիտակ վրանները, վերջին պլաններում սպիտակ ամպերի, երկնքի ֆոնին գծագրվող կանաչ ծառերի սիլուետները: Դրանց հետ ներդաշնակված են գունաբծային, արագ թափով շնչավորված քսվածքներ, տեղ-տեղ նաև նրբին կիսերանգներ: Ինչպես բամբակ հավաքողների ֆիգուրները, հիշյալ պեյսաժում այս կտավի ֆիգուրները ևս փոքր մասշտաբի են՝ տրված մեկ-երկու գունաբծերով: Դրանք արտակարգ աշխուժություն են հաղորդում պատկերին: Առհասարակ «Նորքի մանկական սանատորիան» կերտված է բուռն ոգևորությամբ և իր զրնգուն լուսառատությամբ հարուցում է պայծառ տրամադրություն:

Գունաբծային կտրուկ շեշտերով են ստեղծված նաև «Ջրվեժ Չըռչը» գյուղի «մոտ», «Տեսարան Սեփանա կղզուց» հաջող գործերը, որոնք աչքի են ընկ-

նում կատարման ակտիվ թափով, գծապլաստիկական ու գունային խոշոր ընդհանրացումներով, այդ սկզբ-բունքով է նկարված, վերջապես, «Հին Գորիսը» շեղե-վրը: Զարմանալի է, որ «Հին Գորիսը» երկի մասին խո-սելիս նկարիչ-արվեստաբան Ռ. Շիշմանյանը գրում է, թե այդ նկարում «ժայռերի կարծրության գաղափարը չի իրականացված», թե «մթնոլորտի խորության և հեռանկարի զգացողությունը ևս ձեռք չի բերվել»*: Եվ այս չափանիշը կիրառվում է ըստ էության հաս-տատելու համար այն միտքը, թե իբր առհասարակ «վրձնի մանր հպումների» և «գունային երանգների բաժանվածության տեխնիկան», հետևաբար իմպրե-սիոնիզմը բացասական դեր են կատարել Ս. Առա-քելյանի արվեստում**:

Նախ՝ մենք արդեն տեսել ենք, թե երբ է Ս. Առա-քելյանը հաղորդակից եղել իմպրեսիոնիզմի գունա-գրության սկզբունքներին և թե այդ սկզբունքները որքան բարերար հետք են թողել նրա ստեղծագոր-ծական անհատականության ձևավորման պրոցեսում: Արդ, եթե Ս. Առաքելյանի տրոհուն, գունաբծային տեխնիկայով կատարված մի շարք ստեղծագործու-թյուններ թույլ են, դրանում այդ տեխնիկան, սկզբուն-քորեն, մեղավոր չէ: Խնդիրն այն է, որ նկարիչը այդ

* Ռ. Շիշմանյան, Բնանկարն ու հայ նկարիչները, Երևան, 1958, էջ 215:

** Նույն տեղում:

գործերում բավարար վարպետությամբ չի կիրառել գունագրական սույն մեթոդը։ Տեսանք, որ նույն տեխնիկայով նկարիչը կերտել է նաև հիանալի երկեր։ «Հին Գորիսը» աշխատության մեջ, թերևս, այդ տեխնիկան ստացել է իր ամենակատարյալ, ամբողջական ու խոր մարմնավորումը։ Նաև այստեղ են երևում «Առաքելյան-իմպրեսիոնիստի» լավագույն գծերը, գույնի, լուսի, ընդհանրապես պլեներային գեղանկարչության առանձնահատկությունների փայլուն իմացությունը։

Աննկարագրելի նրբություն ունի կտավի կոլորիտը, որ կատարման սկզբունքով գրեթե նույնն է, ինչ վերոհիշյալ «Բամբակահավաք» պեյզաժի կոլորիտը։ Առանձին գունաբերը որոշակիորեն շեշտավորում են ծառերի, տների գծային-պլաստիկական ձևերը, որոնք հիմնականում պահված են արծաթագույնի՝ բաց վարդագույն, բաց կանաչագույն, կարնագույն, բաց կապտագույն տոների հետ վերցված ելեկչների պարուրում։ Պարզ երևում են կտավին դրոշմված բոլոր փրձնահետերը՝ մաքուր ու թափանցիկ, լուսի մեջմ ցոլացումներով հարուստ։ Այս բարձր հատկանիշներով «Հին Գորիսը» իր հաստատուն տեղն է գրավում ողջ հայ գեղանկարչության մարգարիտների շարքում։

Կոլորիտական այս մեթոդով կատարված «Ախրալա» էտյուդը (ինչպես նրա այդ կարգի մի շարք այլ երկեր՝ «Հանգստի տուն»։ Ախրալա», «Հեռնային

պելված», «Պելված» և այլք) հետաքրքիր է նաև ուրիշ առումով: Սա ևս որոշակիորեն հաստատում է բնակլիմայական բոլորովին տարբեր վայրերի սպեցիֆիկ գծերը ընկալելու և հաղորդելու Ս. Առաքելյանի վարպետությունը: Ս. Առաքելյանի արվեստի նյութը եղել են հարթավայրային Հին Նախիջևանը, Արարատյան դաշտավայրի այգեշատ տեսարանները, հին Երևանը (իր շրջակայքով)՝ իրենց արևային, շոգ կլիմայով, Սևանի, Զանգեզուրի մերկ բնությունը: 1930-ական թվականներին, քիչ առաջ թվարկված իր գործերով, նա ապացուցեց, որ ընդունակ է նույնպիսի ներշնչանքով նյութ առնել նաև անտառոտ-լեռնային Հայաստանի տեսարաններից և նույնքան վարպետություն ցուցաբերել այդ տեսարանները կտավին հանձնելիս: Օրինակ. «Ախրալան» օդի զովությամբ հագեցած ու վայրենի գեղեցկության հրապուրներով լեցուն գարնանային պատկեր է: Մուգ կապույտ, մուգ կանաչ, մուգ վարդա-մանուշակագույն երանգների օրգանական միասնությամբ տրված անտառածածկ լեռների սիլուետները ընդգծվում են ամսի սպիտակ քուլաններով երկնքի ֆոնին: Առաջին պլանում գորշ մանուշակագույն, դեղնավուն ու կապտավուն տոններով հողի վերջնագծին շարված են փարթամորեն կանաչ ծառեր: Այդ բոլորը իրար են հաջորդում մթնոլորտի պարուրող ոլորտում՝ լուսաստվերային թերևն ելակշումների, տոնային փափուկ անցումների և գունաքերի շարժուն դրոշմների ներդաշնակման միջոցով:

Այսպիսով, 1920-ական թվականների վերջերից սկսվում է Ս. Առաքելյանի ստեղծագործական էվոլյուցիայի երրորդ էտապը՝ իր հետ բերելով նոր մոմենտներ: Ընդարձակվում է նրա արվեստի թեմատիկ ընդգրկման շրջանը: Նկարիչը իր թեմատիկ-կոմպոզիցիոն սյուժենետային կտավներով, ստեղծում է պատմաճանաչողական արժեքներ:

Առաքելյանը տալիս է նաև պեյզաժային մի շարք հիմանալի երկեր, որոնք հարստացրին այդ ժանրի մեր նկարչությունը:

Այս էտապում զգալի փոփոխություններ են կատարվում նաև նկարչի պալիտրայում: Երևան են գալիս կատարման տեխնիկայի նոր տարրեր, որոնք, միահյուսվելով նախկինում եղած սկզբունքներին, նոր որակ են տալիս նրա երկերին:

Սրանով ավարտվում է տաղանդավոր արվեստագետի՝ ստեղծագործական մաքառումներով, հաղթություններով լի էվոլյուցիան, որը ներառում է նաև սխալներ, պարտություններ, հիմարագություններ: Սեղբակ Առաքելյանը վախճանվեց անժամանակ, 1942 թվականին՝ դեռ չասած իր վերջին խոսքը:

Ե Զ Ր Ա Փ Ա Կ Ո Ւ Մ

Իր հասարակական-քաղաքական հայացքներով Ս. Առաքելյանը դեմոկրատ էր: Նրա՝ իբրև մարդու, քաղաքացու, արվեստագետի ուշադրության, սիրո առարկան հանդիսացան գյուղացին ու բանվորը՝ իրենց հույզերով ու մտորումներով, աշխատանքային առօրյայով, մարդկային ազնիվ ու մաքուր գծերով: Նկարչի՝ գյուղաշխարհը պատկերող ընդհանուր կերպարային, ֆիգուրալ գործերում ու պեյզաժներում ողջ հստակությամբ դրսենրվում է մարդու և բնության միասնությունը, բնության երևույթների միջոցով մարդկային մտորումներ, ապրումներ հաղորդելու հեղինակի վորավոր ունակությունը: Նրա ստեղծագործությունը խորապես ժողովրդային, խորապես հումանիստական է: Որպես այդպիսին, Ս. Առաքելյանը իր հերթին նպաստեց մեր կուլտուրայի այն գծի վարգացմանը, որի ներկայացուցիչներն են Խ. Աբովյանը, Դ. Աղայանը, Հ. Թումանյանը, Ա. Խահիկյանը, Դ. Վարու-

ժանը, Կոմիտասը, Մ. Սարյանը, Գ. Զոհրապը, Ե. Թադևոսյանը և ուրիշներ:

Ս. Առաքելյանը նախանձախնդիր էր հայրենական արվեստի ազգային յուրահատկությունների զարգացման՝ առանց ծխական սահմանափակության նեղմիտ տենդենցների: Նա, իր ուսուցիչներ Ե. Թադևոսյանի, Վ. Կորովինի, Ա. Արխիպովի նման, հարգում էր արևմտաեվրոպական ժողովուրդների կուլտուրան, ուսումնասիրում, սովորում այն լավագույնը, առաջադիմականը, ինչի հասել էին այդ կուլտուրայի ավանդ մշակները:

Ս. Առաքելյանի ստեղծագործական նախասիրությունների ոստանում ամուր հիմքեր ձգեց, այսպես կոչված, օրիենտալիզմը, որը ժամանակին տարածված էր: Բայց Ս. Առաքելյանը դրան մերձեցավ ոչ իբրև մոդայական տենդենցների սիրահար և ոչ որպես նրա բոլոր գծերը կուրորեն ընդունող արվեստագետ: Օրիենտալիստների մի մասը Արևելքին մոտենում էր էկպոտիկ, էսթետական հովերով ապրող, կյանքի պրովալից փախչող ինտելիգենտ-ֆիլիստերի հայեցողությամբ: Առաքելյանը ընթանում էր տրամագծորեն հակադիր ուղղությամբ: Դա Վրթ. Փափառյանի, Մ. Սարյանի, Վ. Սուրենյանցի, Հ. Կոջոյանի, Ավ. Խահիակյանի ուղղությամբ: «Հին Նախիջևանի շուկան», «Իջևան», «Երևանի հին շուկան», «Կուլտուրան դեպի

լեռները» և նկարչի այլ ստեղծագործությունները դրա խոսուն վկայությունն են:

19-րդ դարի 50-ական թվականներից սկսած, հայկական հաստոցային գեղանկարչության մեջ որոշ ուշադրություն է դարձվում պեյզաժին: Այս տեսդենցը իր վերջնական ձևավորումն ու լիապես ինքնուրույն դրսերումն ունեցավ Գևորգ Բաշինջաղյանի ստեղծագործություններում¹: Դա հայ կուլտուրային նրա մատուցած պատմական խոշոր ծառայությունն է: Հանդիսանալով այդ ժամանի հիմնադիրը հայ կերպարվեստում, Բաշինջաղյանը վճռեց հաստոցային պեյզաժի մի քանի կարևոր խնդիրներ: Մեծ է, հատկապես, նրա կատարած դերը պեյզաժ-պատկեր ստեղծելու ասպարեզում: Ստանալով Պետերբուրգի Գեղարվեստի ակադեմիայի պեյզաժի կուրսի տված գիտելիքները և ստեղծագործաբար ազդվելով Հովհ. Ալվազովսկու արվեստից, նա կերտեց հայրենասիրական գաղափառներով տոգորված երկեր: Բաշինջաղյանը իր կտավների նյութ դարձրեց ժողովրդին առանձնապես հարազատ բնապատկերներ՝ աշխատելով, հիմնականում, արվեստանոցում, հենվելով բնության ուսումնասիրման, հիշողության, երևակայության վրա: Աշխատելու այդ եղանակը իր հետագա կիրառումն ու զարգացումն ունեցավ հայ գեղանկարչության պատմության ողջ ընթացքում:

1 Մանրամասն տե՛ս, Մ. Սարգսյան, Գևորգ Բաշինջաղյան, Երևան, 1957:

Սակայն հայկական իրականության մեջ Բաշին-
ջաղյանի գործունեությամբ սկզբնավորվեց պեյզաժ
նկարելու մի այլ եղանակ նույնպես: Նա տվեց մի քա-
նի պեյզաժներ, որոնք սկսվել և ավարտվել են արվես-
տանոցից դուրս, հենց բնության գրկում, անմիջական
հայեցման պայմաններում: Այս գիծը ևս շարունակ-
փում է մինչ այսօր՝ իր ճանապարհին առաջադրելով
ու լուծելով նոր պրոբլեմներ: Ահա այդ գործում խոշոր
ներդրում ունի նաև Սեդրակ Առաքելյանը:

Առաքելյանը ռեալիստ էր: Այդ հենքի վրա էր, որ
նա առաջ էր մղում իր արվեստը և կատարում պըր-
պտումներ՝ քաղելով այն ամենը, ինչ հոգեհարազատ
էր իրեն ու կարող էր օգտակար լինել ծառացած
խնդիրները վճռելիս:

Կ. Կորովինի միջոցով ու սեփական զննումներով
հաղորդակից լինելով, օրինակ, իմայրեսիոնիզմի գու-
նագրության սկզբունքներին և ռեալիզմի տեսանկյու-
նով. յուրացնելով դրանց էությունը, նա հմտորեն կի-
րառեց պատկերման պլեներային մեթոդը, զարկ տվեց
ուղղակիորեն բնությունից նկարելու և այդ պրոցեսում
առաջին թարմ տպավորությունը իր ողջ նրբություն-
ներով կտավին հանձնելու պրակտիկային:

Ս. Առաքելյանի և մեր գեղանկարչության այլ գոր-
ծիչների կողմից լուրջ առաջաքայլ արվեց գույն-լու-
սաստվեր խնդրի լուծման ասպարեզում: Այս պարա-
գայում ևս հաստատում, օրինաչափ ֆունկցիա ունե-

ցավ նաև իմպրեսիոնիզմի փորձը, որ օգտագործվում էր այդ նկարիչների կողմից:

Ստ. Ներսիսյանի, Հ. Շամշինյանի, Հ. Գաբրիելյանի, Հմ. Հակոբյանի և հայ մի շարք այլ նկարիչների ստեղծագործությունները կատարված են, հիմնականում, արվեստանոցային, այսպես կոչված «թանգարանային» մութեկեկ կոլորիտով։ Նրանց գործերում գույնները, լուսատվերները, տրված են այդ կոլորիտի թելադրած գեղանկարչական սկզբունքներով։ Դա պատմականորեն այդպես էլ պետք է լիներ և իր ժամանակի հայ կերպարվեստի զարգացման որոշակի հտապի համապատասխան, օրինաչափ դրսերումն էր։ Նույնքան օրինաչափ է նաև, որ ռեալիստական արվեստի ներկայացուցիչներ Փ. Թերլեմելյանը¹, Ստ. Աղաջանյանը² և ուրիշներ իրենց ստեղծագործական էվոլյուցիայի ընթացքում ձգտում էին դուրս գալ «թանգարանային» կոլորիտի սահմաններից։ Պարզորոշ նկատելի է, որ գնաճով նրանց պալիտրան դարձել է ավելի լուսառատ, թարմ և գունային որակներով ավելի բազմազան։ Գեղանկարչական այդ տենդենցը իր նոր զարգացումը, յուրատիպ մարմնավորումն ունեցավ Ե. Թադևոսյանի, Ս. Առաքելյանի և այլոց արվեստում։

¹ Մանրամասն տե՛ս, Ե. Մարտիկյան, Փ. Թերլեմելյան, Երևան, 1941։

² Տե՛ս, Ե. Մարտիկյան, Ստ. Աղաջանյան, Երևան, 1956։

Ս. Առաքելյանը մեծ ուշադրություն է դարձնում բաց օդի պայմաններում լուսի հաղորդման վրա և, միաժամասակ, հավասար չափով գույն է տեսնում ու հավասար չափով գույն արտացոլում առարկաների թե՛ լուսավոր, թե՛ ստվերոտ մասերում: Դա արվում է այն հիմքի վրա, որ մարմնի լուսաստվերային մակերեսը տրվում է ոչ թե նույն գույնի մութ և բաց տոների կիրարկման ձևով, այլ զգալիորեն նաև ինքնակա տարբեր գույների համադրման-հակադրման եղանակով: Այս պարագայում լուսաստվերների տպավորությունները մեծապես պայմանավորվում են գունային այդ տարբեր որակների հնչեղության աստիճանների սուբորդինացիայով: Դա ևս մի նոր ասպեկտ էր (հայ արվեստում) բնությունը անդրադարձնելու և իմաստավորելու ճանապարհին:

Ահա, ամենաընդհանուր գծերով վերցրած, այն կարևոր ներդրումները, որ Սեղրակ Առաքելյանը ունի մեր կուտուրայի գանձարանում և այն տեղը, որ նա գրավում է հայ կերպարվեստի պատմության մեջ:

Հ Ա Վ Ե Լ Վ Ա Ծ

(Կենսագրական ակնարկ)

Սեդրակ Առաքելի Առաքելյանը ծնվել է 1884 թվականին, Հին Նախիջևանի Զահուլի գյուղում, հողի աշխատավորի ընտանիքում*: Նախնական ընդհանուր կրթությունը ստացել է; տեղի տարրական դպրոցում; Նյութական բավարար հնարավորություններ չունենալով, ծնողները չեն կարողանում նրան ավելի բարձր կրթության տալ; Բայց, մտահոգվելով որդու ապագայի հարցով, հայրը նրան ուղարկում է Թիֆլիս, իր եղբոր՝ Ստեփան Առաքելյանի մոտ դերձակություն սովորելու: Վարպետ Ստեփանը ամեն ջանք գործադրում է իր մասնագիտության զայտնիքները եղբորորդուն հաղորդելու համար, սակայն վերջինիս հետաքրքրությունները, ներքին մղմամբ, ընթանում են բոլորովին այլ ուղղությամբ: Դերձակությունը բացարձակական հետաքրքրություն չի առաջացնում նրա մեջ: Ոչ մի առիթ, ալատ որևէ միջոց պատահին բաց

* Ս. Առաքելյանի կենսագրության տվյալները բաղել ենք նրա արխիվում եղած նրբերից, կնոց հաւորդած տեղեկություններից և նկարիչ-արվեստաբան Ռ. Շիշմանյանի «Բնանկարն ու նկարիչները» (Երևան, 1958) գրքից:

չի թողնում նկարելու համար և հոգում փայփայում է ամբողջովին սիրած գործին՝ արվեստին նվիրվելու երավը: Դա հորեղբորք դուք չի գալիս: Ծիշու է, այդ ժամանակ Թիֆլիսում կային պրոֆեսիոնալ նկարիչներ, կազմակերպվում էին ցուցահանդեսներ, բայց նկարչությունը դեռևս մասսայականություն չէր վայելում հասարակության լայն զանգվածների շրջանում: Բողոք չէ, որ հասկանում կամ գնահատում էին արվեստի այդ ճյուղի նշանակությունը: Զարմանալի չէ, որ Սեղրակի հորեղբայրը չէր խրախուսում աշակերտի մտադրությունները, մանավանդ որ համոզված չէր նաև, թե նետագայում նա կիարողանա նկարչության միջոցով հայրայթել օրվա հացը: Ամեն անգամ մատնացուց անելով Սեղրակի նկարչական փորձերը, վարպետ Ստեփանը ասում էր. «Ոչ թե դա, այլ ասեղը բեկ հաց կտա...»:

Եվ այսպես, դերձակը սիստեմատիկորեն աշխատում է կտրել պատանուն «ավելորդ» վրաղմունքից, բայց դեպքի երջանիկ բերումով նրա հույսերը վերջնականապես չեն արդարանում: Սեղրակի նկարչական ընդունակությունը բարեբախտաբար նկատում է վարպետ Ստեփանի հաճախորդներից մեկը՝ նկարիչ Գրինեսկին: Վերջինս կարողանում է համոզել դերձակին, որ պատանին պիտի նկարիչ դատնա և, առժամանակ Սեղրակի հետ իր արվեստանցում պարապելուց հետո, միջնորդությամբ նրան ընդունել է տալիս տեղի գեղարվեստական կպրոցը: Վերջապես պատանին մտնում է իր տարերքի մեջ: Աշխատում է համառ ու քրտնաջան՝ նկարչության ուսուցիչ, նայ ականավոր նկարիչ Եղիշե Թաղեկույանի դեկավարությամբ: Թաղեկույանը սիրում է իր աշակերտին ու մեծ հույսեր կապում նրա հետ:

Բացի նկարչության սկզբունքներին ծանոթանալուց, Առաքելյանը հնարափորություն է ստանում լայնացնելու իր մտահորիկոնը: Նա ակտիվորեն շփում է քաղաքի կուլտուրական կյանքի հետ: Թիֆլիսի առաջարեմ մտավորականությունը, ուսանողությունը, նայ գրականությունը, թատրոնը ձևավորում են նրա կենսահայեցողությունը, խորացնում գիտելիք-

Ները. Նրա մեջ կոփում դժվարությունները հաղթանաբելու ամուր կամք, դաստիարակում աշխատավոր ժողովրդին ծառայելու ազնիվ պազմունքներ:

Մի քանի տարվա ընթացքում Առաքելյանը կուտակում է գիտելիքների ամբան պաշար և ցուցաբերում գեղանկարչի այնպիսի հմտություն, որ Թաղեկոսյանը նրան խորհուրդ է տալիս անպայման մասնագիտական կրթությունը շարունակել Մոսկվա-լում:

Սակայն այդ առաջադիմությանը և հաջողությանը Սեդրակը չէր հասել նեշտությամբ, առանց ցավազին հովանուների ու արտաքին դժվարին արգելուների: Դեռ պատասխի, Առաքելյանը քաղեց կյանքի դժբախտության պտուղները: Հայրը, երկու եղբայրներն ու մի քույր զոհ գնացին ցարիվմի հրահրած կովկասյան դեպքերին: Խոկ սևագոր մայրը, երկու անչափահաս զավակների նետ, ապաստանեց Կրասնոդարում ապրող որդու՝ Սմբատի մոտ: Զգայուն Սեդրակի համար չափավանց դժվար էր հաղբանարել մի կողմից նյութական ոչ բարիքը պայմանների ծանրությունը և ապա տանել այդ ողբերգական պատահարի մեծ վիշտը: Բարեբախտաբար, ուսման ծարավն ու դժվարությունները հաղթահարելու համառությունը օգնեցին նրան իրագործել կրթությունը շարունակելու մտադրությունը:

1908 թվականին ավարտելով Թիֆլիսի դպրոցը, Սերյակ Առաքելյանը մեկնում է Մոսկվա: Հաջողությամբ հանձնում է քննությունները և ընդունվում Մոսկվայի գեղանկարչության, քանդակագործության և ճարտարապետության ուսումնարանը՝ աշակերտելով, հիմնականում, վրձնի ականավոր վարպետներ Կ. Կորովինին և Ա. Արխիպովին: Այդ ուսումնարանը, ուր հայ Նկարիչներից սովորել են նաև Հ. Արծաթբանյանը, Ե. Թադևոսյանը, Մ. Սարյանը և ուրիշներ, Ռուսաստանի ամենաառաջադիմ հաստատություններից մեկն էր*: Արվեստի դեմոկրատական սկզբունքները

* *SL* Н. Дмитриева, Московское училище живописи, ваяния и зодчества, М., 1951.

վաղուց հետեւ խոր արմատներ էին ծգել ուսուցման նիմքում: Պրո-ֆեսորներից շատերը իրենց սաներին տալիս էին ոչ միայն ար-վեստի տեխնիկայի զիտելիքներ, այլև նրաց մեջ սերմանում էին սեր աշխատավոր ժողովրդի հանդեպ: Այդ պարարտ հողում աճում է նաև հայ ուսանողի տաղանդը: Ուսումնառության տարի-ներին Ս. Առաքելյանը ցուցաբերում է բարձր առաջադիմություն:

Նկարչի ընտանեկան, նյութական վիճակը չբարելավվեց նաև Մոռվարդում ուսանելու շրջանում: Ապրուարը դժվար էր ու հա-ձախ պատճառ էր դառնում հիմարափության, բայց պետք էր դի-մարել, և նկարիչ դառնալու ծգումը, դարձյալ, պահեց նրան բարոյապես:

Մայրը երկար չմնաց Կրասնոդարում և երկու զավակների հետ վերադարձավ Զահոնկ: Սեղրակը ամեն տարի արձակուրդին այցելում էր մորը, օգնում նրան տնտեսական գործերում:

Այդպիսով, երիտասարդ նկարիչը հաղթահարում է դժվարու-թյունները և շարունակում ուսումը: 1916 թվականին, ավարտա-կան տարրում նա ստանում է առաջին կարգի դիպլոմ և արտա-սահմանյան ուղեգիր, որը, սակայն, պատերազմական իրադրու-թյան պատճառով, իր նպատակին չի ծառայում:

Ուսումնարանն ավարտելուց հետո ապրուսի թեկուզ մի-նիմումը ապահովող պատվերներ ստանալու նրա շանքերը իկուր են անցնում, ու նկարիչը ստիպված գալիս է իր ծննդավայրը՝ Զա-հոնկ: Խերխին հասկանալի է, որ նրա մասնագիտությունը այստեղ բոլորովին նյութական շահ չէր կարող բերել: Ի՞նչ արվեստի մա-սին կարող էր խոսք լինել: Քայլքայլում էր գյուղի տնտեսությու-նը՝ ծայրահեղ աղքատություն, ոչնեպիսում բերելով նոյի մշակին: Եվ, բացի այդ, ինչ կարող էր հասկանալ գեղանկարչությունից տղիտության, ծանր օրերի, խավարի մեջ ապրող հայ գեղջուկը...

Ծանր տարիներ էին, դրությունը գնալով վատրարանում էր:

1918 թվականին նկարչի մայրը նորից փոխադրվեց Սմբատի մոտ, այս անգամ Պյատիգորսկ, խոկ ինքը՝ Սեղրակը հաստատ-վեց Երևանում: Դարձյալ հասկանալի պատճառներով, Երևանի

Նուան գալվառաքաղաքի լյանքն էլ նպաստավոր չէր կարող լինել արվեստագետի համար: Հանգամանքներն ավելի ու ավելի անսպաստ են դառնում դաշնակիների տիրապետության շրջանում: Սովոր, համաձարակիների, կամայականությունների, սպանությունների, երկրի տնտեսական ու քաղաքական լյանքի ճգնաժամի այդ տարիներին նկարիչը ապրում էր անմիտիք այս գիծակում:

Չնայած լյանքի այդ աննպաստ պայմաններին, Ս. Առաքելյանը չի դադարում ստեղծագործելուց և գնալով զարգացնում է գեղանկարչի իր արտակարգ տաղանդը: Նախասովետական տարիներին ստեղծած նրա գործերի ուսումնասիրությունը ցուց է տալիս, որ նրա արվեստը ընթացել է իրոք վերընթաց ուղիղով թե՛ գաղափարական, թե՛ գեղարվեստական տեսակետից: Այդ գործերը հագեցած են աշխատավոր մարդու նկատմամբ ունեցած անսահման միրով: «Գյուղում», «Ցորեն են ծեծում», «Ցորեն են չորացնում» և մի շարք այլ աշխատանքները վկայում են ոչ միայն նեղինակի գեղանկարչական նուրբ զգացողության, վիրտուոզ կոլորիստի անվիճելի առավելությունների, այլև համոված դեմոկրատիզմի մասին: Հայրենի բնաշխարհը պատկերող նրա բարձրիվ էտյուդները լի են խոր լիրիզմով ու բնըշությամբ, բնությունը արտացոլելու բացառիկ նրբությամբ ու մարդկային սրտամոտ զգացմունքներով: Նախասովետական հայ դեմոկրատական կուլտուրայի ավանիվ գործիչների նման, Ս. Առաքելյանը կուչքնաց ո՛չ բաղրենի ինտելիգենտիկների անարխո-ինիվիլուալիստական իդեալներին և ո՛չ էլ սալոնային, ցածրորակ ճաշակի տեր պատվիրատունների կործանարար պահանջներին: Նա բարձր պահեց իսկական գեղանկարչության սկզբունքները, առաջադիմ արվեստագետի իր արժանապատվությունը:

Հայաստանում սովետական կարգերի հաստատման հետ մեկտեղ Ս. Առաքելյանը ազատագրվեց նրութական աննպաստ պայմանների ծանր կապանքներից և հնարավորություն ստացավ ապրելու այրովիստինալ արվեստագետի լյանքով: Տարբեր վայրերից հայրենիք վերադարձան հայ ժողովրդի բազմաթիվ տաղանդավոր

լավակներ: Երևանում բնակություն հաստատեցին Մ. Սարյանը, Ալ. Թամանյանը, Ալ. Սպենդիարյանը, Ե. Զարենցը, Հր. Ներսիսյանը, Ա. Բակունցը և շատ ուրիշներ, ծևավորվեցին ու բուն թափով գործի անցան գիտության, գրականության, թատրոնի, երաժշտության, կերպարվեստի օջախները: Այդ հրաշալի արվեստագետների ու կոլտուրական կյանքի աշխույժ միջավայրում նոր եռանդ ստացավ նաև Ս. Առաքելյանը: Նա սկսեց ստեղծագործել մեծ ոգևորությամբ ու արգասավորությամբ: Ակտիվորեն մասնակցում էր ռեսպուբլիկական, միութենական ու միջազգային ցուցահանդեսներին՝ շահելով մասնագետների ու լայն հասարակության համակրանքը:

Գեղանկարչական նրա սիստեմը դարձավ ավելի ու ավելի հաստատուն, գրվել՝ հնչել ու տպավորիչ, կերպարի հոգեբանական դրսերումները՝ ավելի այլական ու գեղեցիկ: Բնության ընկալման սահմանները Ս. Առաքելյանի պեղամաներում անհամեմատ ընդլայնվեց ու դարձավ բազմաթերուությունը:

1920-ական թվականների վերջերից սկսած Առաքելյանի արվեստում երևան եկան նոր ժանրեր ու թեմաներ: Նոր երանգներ, քաղաքական, գաղափարական նոր բովանդակություն ստացան նրա գործերը: Ս. Առաքելյանը նկարեց մեծադիր պատկերներ, որոնց թեմատիկան ընդգրկում է կոլեկտիվացման շարժումը, կոլտնտեսային աշխատավորության առօրյան, ռեսպուբլիկայի արդյունաբերությունը, կոլտուր-կենցաղային կյանքը: Նա բազմաթիվ մեծակտավ աշխատանքներ նվիրեց նաև պատմա-ռեսլուցիոն թեմային: Այդ բոլոր գործերը Ս. Առաքելյանը կատարել է սոցիալիստական ռեալիզմի մերողով, պարտիայի տված ցուցումների լույսի տակ:

Առաքելյանը առաջիններից մեկն էր մեզանում, որ ստեղծեց ինդուստրիալ պեղամաներ, որոնցում արտացոլեց բանվոր դասակարգի աշխատանքային միջավայրի յուրատիպ կոլորիտը:

Ս. Աղաջանյանի, Վ. Ախիլլյանի, Հ. Կոջոյանի և այլ նկարիչների հետ միասին Ս. Առաքելյանը հանդիսացավ առաջին անգամ Հայաստանում ստեղծվող (1922) Գեղարվստական ուսումնական հաստատության, այժմյան Փ. Թերլեմելյանի անվան Գեղարվստական ուսումնարանի կազմակերպիչներից և ուսուցիչներից մեկը: Մեծ եռանդով նա իր գիտելիքները հաղորդում էր ուսումնարանի սաներին՝ գործադրելով իր անվանի ուսուցիչներ Ե. Թաղյոսյանի, Վ. Կորովինի և Ա. Արխիպովի մանկավարժական փորձը: Ուսանողությանը նա օրինակ էր ծառայում ոչ միայն իրեն գեղանկարչական տեխնիկայի հմտությունով այլ նաև որպես արվեստի մեծ սիրահար ու կատարյալ ինտելիգենտ և, վերջապես, որպես մարդկային բնափորության ամենալավագույն գծերի, առաքինի բարեմասնությունների տեր անձնավորություն: Ս. Առաքելյանը արվեստի նոր կադրերի պատրաստման գործում թիւ ծառայություններ շնառուցեց նաև որպես դեկավար աշխատող: Նա երկար տարիներ վարեց Գեղարվստական ուսումնարանի դիրեկտորի պաշտոնը՝ հնատորեն դեկավարելով հաստատության գործունեությունը:

Ուսապուբլիկայի գեղարվստական կյանքում կատարած այդ ծառայությունների համար Հայաստանի կառավարությունը 1935 թվականին Ս. Առաքելյանին արժանացրեց Արվեստի վաստակավոր գործիք կոչման:

Հայրենական պատերազմի առաջին իսկ օրերից Ս. Առաքելյանը սկսեց աշխատել բազմապատկված եռանդով: Նա ստեղծեց ջերմ հայրենասիրությամբ տողորված գործեր, որոնցում արտացոլեց ֆաշիզմի դեմ մեր ժողովրդի մղած պայքարի արդարացիությունն ու ներոսականությունը: Սակայն, դժբախտաբար, նա չտեսավ ֆաշիզմի վերջնական ջախջախումը: Ս. Առաքելյանը վախճանվեց անժամանակ, 1942 թվականին, Հայրենական պատերազմի թեժ օրերին:

ԲՈՎԱՆԴԱԿՈՒԹՅՈՒՆ

Երկու խոսք	5
Գլուխ առաջին	7
Գլուխ երկրորդ	37
Գլուխ երրորդ	83
Եպրափակում	116
Հավելված	122



Վիլմելմ Հարությունի Մարեկոսան
Վիլգելմ Արյոնովիչ Մատևոսյան
ՍԵԴՐԱԿ ԱՌԱՋԵԼՅԱՆ

Պատ. խմբագիրներ՝ Ռ. Գ. Դրամբյան,
Ն. Հ. Մուրադյան
Հրատ. խմբագիր՝ Ժ. Մ. Աղոնց
Նկարչական ծևավորումը՝ Ռ. Հ. Հարությունյանի
Տեխ. խմբագիր՝ Խ. Ե. Սամվելյան
Վերատուգող սրբագրի՝ Ա. Գ. Ավագյան

Վ.Ֆ 07030, ԽՀԽ 777, հրատ. № 2166, պատմեր 1, տիրաժ 1000

Հանձնված է արտադրության 23/VIII 1962 թ., ստորագրված է;
տպագրության 12/II 1963 թ., բուլղ 70×108¹/₃₂, տպագր. 8,12
մամ. + 14 ներդիր, հրատ. 3,86 մամ.:
Գինը կազմով 55 կ.:

Հայկական ՍՍՌ գիտությունների ակադեմիայի Հրատարակ-
չության Էջմիածնի տպարան:

ԳԱԱ Հիմնարար Գիտ. Գրադ.



FL0040324

7000 35 1

A 1
4823